

Yesu Kalisi-te banye nivasa lohvu Matai kaavu

Yesu Kalisi-te danggakook-anjo
(Luk 3:23-28)

1 ¹“Hil sen Yesu Kalisi pumak sil-ato ond haalend-anjo. Yesuu-ju ond Devit-ate hil vu taamusin ti, de Devit ond Abalaam-ate hil vu taamusin ti.

²Abalaam hako noow Isak, tonde Isak hako Yaakop, tonde Yaakop hako Yuda-so halindin, ³^btonde Yuda hako Peles ayuuh Sila, yuuhate tangganaan Tema, tonde Peles hako noow Heslon, tonde Heslon hako noow Lam, ⁴de Lam hako noow Aminadap, tonde Aminadap hako noow Naason, tonde Naason hako Salmon, ⁵^cde Salmon hako Boas sen tangganaan Lhap-ato, tonde Boas hako Obet sen tangganaan Lut-ato, tonde Obet hako noow Jesi, ⁶^dtonde Jesi hako noow Devit sen tu omaaho lulemak-ato.

Tonde Devit hako noow Solomon, tonde Solomon tangganaan-anju ond Ulia vane bôôy. ⁷^eTonde Solomon hako noow Liaboam, Liaboam hako Abaisa, Abaisa hako Esa, ⁸tonde Esa hako noow Yosapat, de Yosapat hako Jolam, Jolam hako Usia, ⁹Usia hako Jotam, Jotam hako Ehas, Ehas hako Hesehia, ¹⁰tonde Hesehia hako Manase, de Manase hako Amos, Amos hako Yosia, ¹¹^ftonde Yosia hako Jekonaia-so halindin, tonde hôôk busin-anju hil Babilon landuuh hil Islel-ambe lako sil-ambe lala dando Babilon.

¹²^gLala dando taaku Babilon lung la, tonde Jekonaia hako Sialtiel, de Sialtiel hako Selababel, ¹³Selababel hako Abaiat, Abaiat hako Elaiakim, Elaiakim hako Eso, ¹⁴tonde Eso hako Sedok, de Sedok hako Ekim, Ekim hako Elaiat, ¹⁵tonde Elaiat hako Eleasa, de Eleasa hako Matan, tonde

^a 1:1 1Kro 17:11; Jen 22:18 ^b 1:3 Jen 38:29-30; Rut 4:18-22 ^c 1:5 Rut 4:13-17

^d 1:6 2 Sml 12:24 ^e 1:7-10 1Kro 3:10-16 ^f 1:11 2King 24:12-16; 2Kro 36:10; Jer 27:20

^g 1:12 Esra 3:2

Matan hako Yaakop, ¹⁶tonde Yaakop hako Yusep sen Malia layaa-to, ond Maliaa-ju sen hako noow Yesu sen danêêl nambe Kalisii-to.

¹⁷Omaahonôôn pin-anju sen lapumak Abalaam-ambe laam lôôt-ambe tok laam Devit-anju, ond silate danggakook nomaayuuh-ambe laam yumbeyuuh. Tonde vu Devit-ambe tok laam busin sen lala dando taaku Babilon-ato, ond yik silate danggakook nomaayuuh-ambe laam yumbeyuuh. Tonde vu busin sen lala dando Babilon-ato be tok laam Kalisi-te busin, ond yik danggakook nomaayuuh-ambe laam yumbeyuuh nambêênju having.

Malia hako noow Yesu Kalisi

(Luk 2:1-7)

¹⁸^hYesu Kalisi tangganaan hako yii-to yite danggakook-anjo. Laholin tangganaan Malia vu Yusep, le yuuh-ame dando lavuh ti le, naahen, tonde layi de Malia noow hôök lak Vavi Vaambuung. ¹⁹De laya Yusep ond omaaho nivalok, ondeey me-wiingin nambe naanêêl vakasin langaah-ambe Malia ninaamum e, nganjo yoo wiingin nambe gavuuu Malia kaatokin amu. ²⁰Yusep ka monavu vakasin-anju tombe yi mavin-ande Omaaho Bop-ate angela ti laam nêêl vu nambe, “Yusep, hong sen gate danggakook neep vu Devit-ato, game ganjêênin e. Onggako gate vêêh Malia be naas mando gaving hong, in unoopasiv sen lukaale lopayôô-ju ond Vavi Vaambuung vu vu yi. ²¹“Tombe le gako noow moow ti, tombe gale naateey haale naambe Yesu, in dangga nambe le nôôh yite hil vêêl in silate va nipaya.”

²²Va pin-anju wiing-ambe Omaaho Bop-ate vakasin sen yite omaaho ti nêêl langaah-ato nôôn ak nambe, ²³^j“Angge, vехаавu ti le noow dôök-ambe gako noow moow ti, tombe le daateey haale naambe Emaaniel.” Yaanggilin haale naambe Anutu nando having yiii.

²⁴Yusep neep lung la de kandi, tombe wii-having nambe sen Omaaho Bop-ate angela nêêl vu-to, om hako vane be yuuh dando, ²⁵^klemu Yusep oo lakin yi nivasa lôôt-ambe vêêh hako noow e mem teey haale nambe Yesu.

Hil akand bop heey lalaam in lanji Yesu

2 ¹Malia hako Yesu neep Betlehem Yudia hôök busin sen omaaho lulemak Helot nandôô-to, tombe hil akand bop heey vu taaku me lak valup-ato be lalaam Yelusalem, tombe lalingin nambe, ²^l“Unoopasiv moos sen tok laam-ambe navu naatu Yuda-te omaaho lulemak-ato nando tana? Hey aahe yite matam lak valup naale taaku sen taaku me nalak nalup-ato, ondeey hey alaam in nambe gako haale jak.”

^h 1:18 Luk 1:27,35 ⁱ 1:21 Luk 1:31; 2:21; Sin 4:12 ^j 1:23 Ais 7:14 ^k 1:25 Luk 2:21

^l 2:2 Nam 24:17

³Omaaho lulemak Helot hango vakasin-anju tombe vindis-ambe ka yu-yuuh lôôt, tombe yik hil Yelusalem pin nambêênju having. ⁴Om Helot supin kul vaha sen datung salivangin-ato silate yêêv-aso osin tanasin danggakook-aso pin-ambe lingin sil nambe, “Anutu biing yite omaaho sen yoo holin yi vulôôt in nambe dôôvu yiyi-ato naam ond tangganaan e gako yi nanjip tana?” ⁵Tombe lanêêl vu nambe, “Le gako nanjip Betlehem Yudia, in omaaho ti kaavu Anutu-te vakasin neep bôôy nambe,

⁶“^mHam Betlehem vu taaku Yuda, ham-ame haalem pasiv-ande Yuda-te taaku vaalu kaluuh ham e, malis, ham oo kaluuh, in yêêv bop ti le balup vu ham tombe le ganggin sate hil Islel.’”

⁷Helot hango lung la, tombe sim wiing vakasin la kaatokin vu hil akand bop-aso sen lalaam vu taaku me nalak nalup-ato be lalaam vu, be sim lingin sil nambe layi matam-anju nyendoos ond naangelis. ⁸Tombe sil lanêêl vu, le mem wiing sil lala Betlehem, de nêêl vu sil nambe, “Ham ana anjingin unoopasiv-anju nivasa lôôt, be ham naatovu ond ham anom naanêêl banye vu sa in soo anaas gako haale jak gaving.”

⁹Lango omaaho lulemak lava lung la tonde mem lala lak, de matam sen layi vu taaku me lak valup-ato ond munggin-ambe la naale nivalok vu taaku sen unoopasiv neep-ato. ¹⁰Layi matam-ambe londpayo nivasa, de lapêêlis lôôt, ¹¹“om lalukala bayêên alo be layi unoopasiv ayuuh tangganaan Malia, tombe lato pataav baambund neep voon-ambe lako yi lak, tonde lahôôl kupak hôôk silate vaahes ti ti, gool osin haah anikanggi galovasa yuuh, be lavu vu yi. ¹²Tonde hôôk busin atombe layi mavin-ande Anutu vu kôôvu sil nambe me-lanaah balup vu Helot e, om laloh mopaatôôv ango be lalaah sil ambaand.

Yusep hako vane yuuh noow-ambe yaal lala Ijip

¹³Lalaah lung la tonde Yusep yi mavin-ande Omaaho Bop-ate angela hato nêêl vu nambe, “Okandi gako unoopasiv ayuuh tangganaan-ambe maal napak-ambe maal ana Ijip, tombe maal ana mandôô-ju vêêl e, de soo naanêêl vu hong e mem, in Helot navu salo unoopasiv in nambe nyiis-ambe jimb.” ¹⁴Om Yusep kandi hako unoopasiv ayuuh tangganaan hôôk busin-ambe yaal lala Ijip. ¹⁵“Yaal lala dandôô-ju de Helot yimb e mem. Ke, om Omaaho Bop-ate vakasin sen omaaho ti nêêl langaah bôôy-ato nôôn ak nambe, “Saateey noongg vu Ijip-ambe lom.”

Helot nêêl-ambe layiis unoopasiv ngeeyaata be layimb

¹⁶Ke, Helot yi nambe hil akand bop-anju me-lalom lalu-vu yi le, om lak ni nambe sil tatuhin yi, om ahekalin bopaata lôôt-ambe wiing hil lala Betlehem osin taaku pin sen neep ngaahôô-to, be layiis unoopasiv-ambe

^m 2:6 Mai 5:2; Jon 7:42 ⁿ 2:11 Saam 72:10-15; Ais 60:6 ^o 2:15 Hos 11:1

layimb. Ond layiis unoopasiv moow sen me-savok ta yuuh-ato pin, in Helot aka vu busin sen hil akand bop-aso lanêêl nambe layi matam hôôk nyendoos-ato. ¹⁷Om Anutu-te vakasin sen Yelemia nêêl langaah bôôy-ato nôôn ak nambe,

¹⁸^p“Lango daandun bopaata ti vu taaku Lama. Dasu bopaata lôôt-ambe dateey osin kand pasiv, in Lakel nasu in noondin, tombe nimbaya nambe hil-ame bakaas vu be lopayo nivasa jak e, in noondin lala mend ma lôôt.”

Yusep having vane yuuh noow vu Ijip-ambe lalom

¹⁹Helot yimb lung la, le mem Yusep yi mavin vu Ijip-ande Omaaho Bop-ate angela hato vu ²⁰^qbe nêêl nambe, “Okandi jak-ambe ongkako unoopasiv ayuuh tangganaan-ambe maal anaah Islel-ate taaku, in hil sen dawiingin nambe lanyiis unoopasiv-ato layimb lung la.” ²¹Tombe Yusep kandi hako unoopasiv ayuuh tangganaan-ambe yaal lalaah Islel-ate taaku, ²²lemu hango nambe Akeleas tu omaaho lulemak vu Yudia lukalaah mangganaan Helot ahembaan yesin, om yêênin nambe me-naah-anju le, tombe yi mavin ango yesin-ande Anutu taato mop vu, om yaal lala taaku Galili. ²³Tombe yaal lala lalup taaku ti haale nambe Nasaalet-ambe yaal dandôô-ju, om Anutu-te vakasin sen hil lanêêl langaah bôôy-ato nôôn ak nambe, “Le daanêêl yi naambe hil Nasaalet ti.”

Jon sen nalipis hil-ato nêêl vakasin (Maak 1:2-8; Luk 3:1-18; Jon 1:19-28)

3 ¹Tombe busin ti Jon sen nalipis hil-ato nando taaku lumbalaamb Yudia, ²^stombe nanêêl tanasin nambe, “Ham anggilin ham alompayo in busin sen Anutu navu ganggin yite hil-ato laam ngaaho lak lung la.”

³^tJon-anju ond yik Yesaia nêêl Anutu-te vakasin ti lak yi bôôy nambe, “Omaaho ti nateey vu taaku lumbalaamb nambe, ‘Ham samu Omaaho Bop-ate mop, ham galo yite mop nanjip nivalok.’ ”

⁴Jon-anju lop lolop sen davu samu lak bik kamel anivalus-ato, tonde havêêh let bik naavi, tonde naya sapeek osin bayiiluk natu yite vanôôn. ⁵Nandôô-ju de hil Yelusalem osin Yudia pin-ambe hil sen dando ngaaho vu bel bop Yoladan-ato pin lala vu yi. ⁶Lanêêl silate va nipaya langaah, tombe lipis sil hôôk bel bop Yoladan.

⁷Le Jon yi de hil Palisai osin hil Sadusi ngeeyaata lalaam vu yi in nambe jipis sil gaving, tombe nêêl vu sil nambe, “Nyêêy anipaya noondin

^p **2:18** Jer 31:15; Jen 35:19 ^q **2:20** Eks 4:19 ^r **2:23** Luk 2:39; Ais 11:1; 53:2; Jon 1:45-46

^s **3:2** Mat 4:17; Mak 1:15 ^t **3:3** Ais 40:3 ^u **3:4** 2King 1:8 ^v **3:7** Mat 12:34; Mat 23:33; Lom 2:5; Taato 6:16-17

ham. Lati nêêl vu ham? Ham-ame alohvu nambe ham napak in Anutu-te ahekalin sen le naatok naam vu taamusin-ato le. ⁸Om ham anggilin ham alompayo be ham ambiing va nivasa in yanjak ni naambe ham ahilin ham vasa ond mem. ⁹“Hamambe hamate danggakook neep vu Abalaam om Anutu le ji ham nivasa? Malis. Sa naanêêl vu ham naambe Anutu lohvu nambe jêêvu tatuuh-anjo be daatu Abalaam-ate hil. ¹⁰*Kôôv navu neep nandeng haah dangga lung la, om haah pin sen me-nayiis nôôn anivasaa-to ond le buv-ambe gaate jakana kin.

¹¹“Sa naalipis ham ak bel amu in naanêêl taato naambe ham ahilin ham alompayo, nganjo omaaho sen navu taamuyin sa ond yite niwêêk savok sa. Sak sa omaaho nipaya, same sa ningg vasa in nambe sa kavaayin yite suul osin saambiing kul vaalu naambe hil kul-aso dawiiing vu silate yêêv e. Omaahôô-ju ond le biing-ambe ham anim vasa jak Vavi Vaambuung-ate niwêêk, osin kin sen ja hamate nipayaa-to. ¹²*Puvu yite haah navu salak hôôk nama lung la in nambe japêêh kaalekaale na, le mem naasupin vanôôn nôôn dukana bayêên vanôôn-ate, tonde vanôôn naavi osin ahesa ond le basi jakana kin ti yoo monatum danggata.”

Jon lipis Yesu

(Maak 1:9-11; Luk 3:21-22)

¹³Tonde busin ti Yesu vu Galili be la vu Jon vu bel bop Yoladan in nambe Jon jipis yi, ¹⁴le Jon vu teenin yi de nêêl nambe, “Ganjipis sa ond mem nivasa, ma nambe vaati sen galaam vu saa-jo?” ¹⁵Le Yesu nêêl laah vu nambe, “Lung, hoow samu Anutu-te vakasin pin ond mem nivasa, om yik ganjipis sa.” Tombe mem liinggis in Yesu lava.

¹⁶“Yesu lipis lung la de vu bel alu be lakalom, tonde pavis atombe baandoni kahe, de yi Anutu-te Vavi Vaambuung hato nambe manak tumbaliy-ambe lakando yi. ¹⁷^bTonde lava ti vu baandoni ond nêêl nambe, “Manyinja sa noongg-anja be sahengg having yi lôôt osin sahengg anivasa vu yi.”

Saalang sahi Yesu

(Maak 1:12-13; Luk 4:1-13)

4 ¹“Lung atonde Vavi Vaambuung giyy Yesu la taaku lumbalaamb in nambe Saalang sahi yi. ²^dTombe Yesu me-ya vanôôn daka le, de yoo nando meep lohvu busin doo-yuuh-ande langaah doo-yuuh, tombe yimb ahe lôôt, ³^etombe sim palapin vaha la nêêl vu nambe, “Naambe

^w 3:9 Jon 8:33,39; Lom 2:28-29; 4:12 ^x 3:10 Mat 7:19; Luk 13:6-9; Jon 15:6

^y 3:11 Jon 1:26-27,33; Sin 1:5; Sin 13:24-25 ^z 3:12 Mat 13:30 ^a 3:16 Jon 1:32

^b 3:17 Saam 2:7; Ais 42:1; Mat 12:18; 17:5; Luk 9:35 ^c 4:1 Hiblu 2:18; 4:15

^d 4:2 Eks 34:28 ^e 4:3 Jen 3:1-7

Anutu Noow hong ond onaanêêl-ambe tatuuh-anjo naatu vanôôn.” ^{4f}Le Yesu nêêl laah vu nambe, “Malis, in Anutu-te vakasin neep hôôk kaapiya nambe, ‘Vanôôn timu me-napuvu omaahonôôn e, nganjo vakasin pin sen Anutu nanêêl-ato ond mem napuvu omaahonôôn.’ ”

⁵Tombe sim Saalang hako be yuuh lala lalup taaku vaambuung bop Yelusalem, tombe la valaah Yesu lakala naale lak Anutu-te dumb bop alu baandoni, ^{6g}de nêêl vu nambe, “Naambe Anutu Noow hong ond opasong gana kambii-ju, in Anutu-te vakasin neep hôôk kaapiya nambe, ‘Yoo le naanêêl vu yite angela-so be lanôôh hong ak sil namand de game le kaatuuh ovaham jak tatuuh e.’ ”

^{7h}Le ma de Yesu nêêl vu nambe, “Lemu Anutu-te vakasin ango neep hôôk kaapiya nambe, ‘Game sahi gate Omaaho Bop Anutu le.’ ”

⁸Tombe yik Saalang hako yi be yuuh lalak kandu dinaandiin ti be lala daale, le mem Saalang motaato hil pin-ate taaku vu voon osin silate va nivasa vasa vu Yesu, ⁹tonde nêêl vu nambe, “Naambe onggatung kaatu vu sa osin onggako sa haalengg jak ond mem sale aambu va haale haale pin-anju vu hong.” ¹⁰ⁱLe ma de Yesu nêêl vu nambe, “Saalang, gana vêêl, in Anutu-te vakasin neep hôôk kaapiya nambe, ‘Goo gatung kaatu vu gate Omaaho Bop Anutu be ganohak vu yi timu.’ ” ^{11j}Tombe Saalang havuuh yi de la, tonde mem angela-so lato lahôôvu Yesu.

Yesu hako kul lak nyendoos vu Galili

(Maak 1:14-15; Luk 4:14-15)

^{12k}Yesu hango nambe hil lalôôh Jon-ambe latung lukala kalaambus, tonde laah Galili, ^{13l}tombe havuuh Nasaale-ande la nando Kapenaum. Kapenaum-anju neep betum bop Galili nanyendanga vu taaku bop Sebulon ayuuh Naptaali, ^{14m}om Anutu-te vakasin sen Yesaia nêêl langaah bôôy-ato nôôn ak nambe,

¹⁵ⁿ“Taaku Sebulon ayuuh taaku Naptaali, tonde taaku sen neep betum nanyendanga osin taaku sen neep Yoladan vaalu, de Galili-te taaku sen hil vaalu lalaam dando hôôk-ato, ^{16o}ond hil sen dando hôôk mekanuu-to layi melangaah bopaata. Yik hil sen dando hôôk taaku mekanu in nambe lanjimb-ambe lana mend namaa-to ond melangaah tok laam vu sil.”

^{17p}Hôôk busin-anju Yesu hako yite kul lak-ambe nêêl vakasin langaah nambe, “Ham anggilin ham alompayo in busin sen Anutu navu ganggin yite hil-ato laam ngaaho lak lung la.”

Yesu holin yite maanggêem yumbeyuuh

(Maak 1:16-20; Luk 5:1-11)

^{18q}Yesu monaloh betum Galili nanyendanga, tombe yi maayuuh hali sen omaaho paahuung dangga yuuh-ato, Simon sen danêêl haale nambe

^f 4:4 Diu 8:3 ^g 4:6 Saam 91:11-12 ^h 4:7 Diu 6:16 ⁱ 4:10 Diu 6:13 ^j 4:11 Hiblu 1:6,14
^k 4:12 Mat 14:3; Mak 6:17; Luk 3:19-20 ^l 4:13 Jon 2:12 ^m 4:15 Ais 9:1-2 ⁿ 4:17 Mat 3:2

Pitaa-to ond yuuh hali Endru mondaate govak lukala betum, ¹⁹tombe nêêl vu yuuh nambe, “Manaam taamuyin sa, in saambiing-ambe muuh gako omaahonôôn naambe sen muuh nako paahuung-ato.” ²⁰Pom yik pavis atombe yuuh lavuuh yuuhate govak-ande yuuh sapa yi be yaal lala.

²¹Vuu-ju be la daka having, tombe yik yi omaaho ti yuuh hali, Sebedi noow ayuuh Jems ayuuh hali Jon, ond yuuh dando lak kaanu having mangganaan Sebedi be sil oo mosamu silate govak, tombe Yesu teey yuuh, ²²tombe yik pavis atombe yuuh lavuuh mangganaan osin kaanu de yuuh taamuyin Yesu yaal-ambe sil lala.

Yesu wiing hil ngeeyaata nind vasa lak

(Luk 6:17-19)

²³Yesu la hatup hôôk taaku Galili pin-ambe monawiing tanasin hôôk silate dumb alo ti ti, tombe nanêêl banye nivasa sen Anutu nanggin yite hil-ato langaah, de wiing hil anind lakin vaha vaha pin anind vasa lak. ²⁴Tombe yite banye la lohvu taaku Silia pin, om hil anipaya pin, sil vaalu silate nilakin vaha vaha, de vaalu sen dango nivaane bopaata, tonde hil vaalu sen mamu dahôôvu sil-ato, osin hil vaalu sen baando nasi sil, de hil vaalu vahand ayuuh namand anipaya, ond lako hil-anjo pin lala vu Yesu be wiing sil anind vasa lak. ²⁵Tombe hil vu Galili osin taaku nomaayuu danêêl nambe Dekapolis-ato, be vu Yelusalem osin Yudia de Yoladan vaalu alo, ond sil ngeeyaata davu taamuyin Yesu.

Yesu lakala kandu lu be nêêl tanasin

5 ¹Yesu yi de hil ngeeyaata taamuyin yi om lakala taaku kandu lu ti be la nando de yite maanggêem-aso lala vu yi, ²tombe Yesu wiing tanasin vu sil.

Hil oo kand vasa

(Luk 6:20-23)

³Nêêl nambe, “Hil sen dalak ni nambe sil-ame hil anind vasa le, ond sil akand vasa in sil lalohvu nambe daatu Anutu-te hil.

⁴“Hil sen londpayo nimeen-ato, ond kand vasa in Anutu le biing-ambe londpayo nivasa jak.

⁵“Hil sen yoo daanggôôl sil haalend ond sil akand vasa in sil e daatu ngaanggis dangga.

° 4:19 Mat 13:47 P 4:20 Mat 19:27 ° 4:23 Mak 1:39; Mat 9:35; Sin 10:38

° 4:24 Mak 6:55 ° 4:25 Mak 3:7-8 ° 5:3 Ais 57:15 ° 5:4 Ais 61:2-3; Taato 7:17

° 5:5 Saam 37:11

6^w“Hil sen dawiingin lôôt nambe yoo lambiing va nivasa mu naambe sen hil dayimb ahend in vanôôn-ato, ond sil akand vasa in Anutu le biing-ambe sil daatu sil anind vasa jak.

7^x“Hil sen kand pasiv in hil vaaluu-to, ond sil akand vasa in Anutu le ka pasiv in sil dukanaah.

8^y“Hil sen londpayo la vu Anutu timuu-to, ond kand vasa in le lanjji Anutu.

9^z“Hil sen davu mamaal vu omaahonôôn in nambe ngaamong jip-ato ond sil akand vasa in Anutu le naanêêl naambe yite noonin sil.

10^a“Hil sen daaku nimeen in davu sapa Anutu-te tanasin-ato, ond kand vasa in sil latu Anutu-te hil.

11^b“Tonde hil lanjji naambe ham navu taamuyin sa, tombe daanêêl vakasin navu dees jak ham, de lambiing nindanjeen vu ham osin sil tatuhin vakasin anipaya vaha vaha jak ham, ond ham akam vasa, 12^cde ham alompayo nivasa be ham naapêêlis, in ham e gako nyevahaan nivasa bopaata vu baandoni. Hil oo dawiing nindanjeen vu hil sen danêêl Anutu-te vakasin langaah-ato nambêênja bôôy.”

Vakasin lak gaas osin kin tumin

(Maak 9:50; Luk 14:34-35)

13“Ham alohvu gaas in nambe ham andôôvu hil voon, lemu naambe gaas anikuuh ak ond yale aambiing vaati vu be naatu nanyêên jesin naah? Malis. Nipaya lak lung-ato, om yiyi gaate na be hil baake tatêêl.

14^dDe ham alohvu hil voon-ate kin tumin, in bayêên bop ti nambe nanjip ak kandu lu, ond me-lohvu nambe nanjip vunin e. 15^eTonde hil davu taalungg hôôk lam, ond me-datung hôôk dêêngg alo le, nganjo datung nando lak pêêt in nambe naatum ak hil pin sen dando bayêên alôô-to.

16^fOm hamate kin tumin naatum ak hil pin naambêênja in nambe sil lanjji va nivasa sen ham nawiing-anjaato be sil gako hamate Mom sen nando baandonii-to haale jak.”

Vakasin lak Mose having Anutu-te hil vaalu silate tanasin

17^g“Hamambe mak sa laam in nambe kawiiy Mose-te tanasin osin Anutu-te vakasin sen hil lanêêl langaah bôôy-ato na mava? Malis, same alaam in nambe kawiiy na le, nganjo sa laam in nambe saambiing-ambe nôôn jak. 18^hSa naanêêl keen vu ham naambe Anutu me-le kawiiy

^w 5:6 Ais 55:1-2 ^x 5:7 Jem 2:13 ^y 5:8 Saam 24:3-4; 51:10; 73:11; Jon 3:2-3

^z 5:9 Hiblu 12:14; Jem 3:18 ^a 5:10 1Pi 3:14 ^b 5:11 1Pi 4:14; Jem 1:2 ^c 5:12 2Kro 36:16; Sin 7:52; Hiblu 11:32-38; Jem 5:10 ^d 5:14 Jon 8:12; 9:5; Pil 2:15 ^e 5:15 Mak 4:21;

Luk 8:16; 11:33 ^f 5:16 Ep 5:8-9; 1Pi 2:12 ^g 5:17 Mat 3:15; Lom 3:31; 10:4

^h 5:18 Luk 16:17; 21:33

vakasin sen neep hôôk melaalôô-juuto boow daka me nyengale daka be na menama le, nganjo yoo le nanjip naambêênjo lôôt-ambe na balup busin sen yendak osin ngaanggis na menamaa-to, de vakasin pin nôôn jak e mem. ¹⁹ⁱOm omaaho ti nambe kalêêh tanasin-anju boow daka, be taahu hil hôôk yite kalêêsin-anju be lambiing gaving, ond omaahôô-ju haale le naatu nipasiv lôôt vu hil sen Anutu nanggin sil-ato. De omaaho ti nambe samu tanasin nivasa be taahu hil hôôk in nambe sil lambiing gaving, ond omaahôô-ju haale le naatu bop vu hil sen Anutu nanggin sil-ato. ²⁰Ke, sa naanêêl vu ham naambe ham-ame samu Anutu-te tanasin nivasa savok hil tanasin dangga osin hil Palisai-so le, ond ham-ame le andukana gaving Anutu-te hil e.”

Vakasin lak va ahekalin-ate

(Luk 12:57-59)

²¹^j“Ham hango himbop bôôy-ate tanasin neep nambe, ‘Game ganyiiis omaahonôôn jimb e. Naambe ti nyiis omaaho ango jimb ond lohvu biing vakasin-ambe lambu nyevahaan vu.’ ²²^kLemu sa naanêêl vu ham naambe omaaho ti ahekalin vu hali ond lohvu biing vakasin-ambe lambu nyevahaan vu. De naambe omaaho ti naanêêl vu hali naambe, ‘Galumkook ma,’ ond lohvu biing vakasin vu yêêv bop-aso be lambu nyevahaan vu. Tonde ti naanêêl naambe, ‘Hong baayamb ambu, gahimb lung la,’ ond lohvu jêê-na kin vu taaku nipaya be gako nyevahaan. ²³^lOm naambe onggako gate salivangin-ambe gana baale alata in naambe onggatung, lemu gakam bu naambe halim-ate vakasin ti neep vu hong, ²⁴ond onggavuuh gate va mando hôôk alata dangga de ganaah-ambe muuh halim samu vakasin jung na, le mem ganom gatung salivangin vu Anutu.

²⁵^m“Omaaho ti naambe gako hong na in gambiing vakasin, ond muuh samu vakasin pavis vu mopaatôôv. Le naambe nama ond le bu hong dukana yêêv sen nangoyin vakasin-ato nama, be yêêv-anju bu hong dukana ahevaavu-so namand, tombe ahevaavu-so gatung hong dukana kalaambus. ²⁶Sa naanêêl keen vu hong naambe game le ganom pavis e, de omandôô-ju be gambu dôôk omaahôô-jute nyevahaan lôôt-ambe jung na le mem.”

Game gambiing baayamb e

²⁷ⁿ“Ham hango tanasin neep nambe, ‘Game gambiing baayamb e,’ ²⁸^olemu sa naanêêl vu ham naambe omaaho ti yi vêêh ti be lopayo yiiis

ⁱ 5:19 Jem 2:10 ^j 5:21 Eks 20:13; 21:12; Diu 5:17; Lev 24:17 ^k 5:22 1; Jon 3:15

^l 5:23 Mak 11:25 ^m 5:25 Mat 6:14-15; 18:34-35 ⁿ 5:27 Eks 20:14; Diu 5:18

^o 5:28 2Pi 2:14

yi, ond wiing baayamb vu vêêh-anju hôôk lopayo lung la. ^{29p}Naambe gamem vasa taato va nipaya vu hong-ambe gandupake, ond opasuuh-ambe onngaate na vêêl, mem ganim naavi vuuti la mema om nivasa in sil-ame gaate ganim naavi doos dokana taaku nipaya le. ³⁰De naambe onamam vaalu vasa nôôh

va nipaya ond okatôôv-ambe onngaate na vêêl, mem ganim naavi vuuti la mema om nivasa in ganim naavi doos-ame dukana taaku nipaya le.”

Moow osin vanêêndin-ame bapuu sil e

(Matai 19:9; Maak 10:11-12; Luk 16:18)

^{31q}“Tonde tanasin ango neep nambe, ‘Omaaho ti gavuu vane ond kaavu kaapiya sen havuu vanêê-to be bu vu yi.’ ³²‘Nganjo sa naanêêl vu ham naambe omaaho ti gavuu vane na de vane me-nawiiing baayamb e, ond omaahôô-ju yoo wiing-ambe vane wiing baayamb, in dangga nambe yoo havuu-ato. De omaaho ti nambe gako vêêh sen laya havuu-anjuuto ond omaahôô-ju wiing baayamb having.”

Game naanêêl keen baandoni le

^{33s}“Tonde yik ham hangoyin himbop bôôy-ate tanasin ti neep nambe, ‘Onaanêêl vakasin ti be onaanêêl naambe keen baandoni gaving, ond game tatuhin e. Nganjo vakasin sen ganêêl lak Anutu me, ond gambiing nôôn jak.’ ³⁴‘Nganjo sa naanêêl vu ham naambe ham-ame naanêêl naambe keen baandoni le, malis lôôt.

Ham-ame naanêêl baandoni haale in kaandu hamate vakasin e, in baandonii-ju ond Anutu nando. ³⁵“De ham-ame naanêêl ngaanggis haale in kaandu hamate vakasin e, in ngaanggis ond Anutu nalaah vaha nalakaale. De ham-ame naanêêl Yelusalem haale in kaandu hamate vakasin e, in omaaho lulemak bop-ate taakuu-ju. ³⁶De game naanêêl lak galum in kaandu gate vakasin e, in game galohvu nambe gambiing galumvalus ti naatu nivalôôy me naatu nivaliis e. ³⁷‘Nganjo ham anjiinggis naambe ‘Êê-e,’ me ham naanêêl naambe ‘Malis,’ be lung. Naambe ham oo naanêêl vakasin daka savok na ond hamate vakasin-anja laam vu Omaaho Nipaya.”

Game gambu dôôk nipaya nyevahaan e

(Luk 6:29-30)

^{38w}“Ham hango tanasin neep nambe, ‘Omaaho ango kaatuuh gamem-ambe gamem kanu dôôk, ond okaatuuh yinêên-ambe mekanu dôôk

^p 5:29-30 Mat 18:8-9; Mak 9:43-47; Kol 3:5 ^q 5:31 Diu 24:1-4; Mat 19:7; Mak 10:4

^r 5:32 1Ko 7:10-11 ^s 5:33 Eks 20:7; Lev 19:12; Nam 30:2; Diu 23:21 ^t 5:34-35 Jem 5:12;

Mat 23:22; Ais 66:1; Sin 7:49 ^u 5:35 Saam 48:2 ^v 5:37 Jem 5:12 ^w 5:38 Eks 21:24;

Lev 24:20; Diu 19:21

dukanaah. De naambe kaatuuh onavum-ambe kalêêh ond okaatuuh navu be kalêêh dukanaah.’ ³⁹ *Nganjo sa naanêêl vu ham naambe omaahonôôn lambiing nipaya vu ham ond ham-ame ambiing nipaya dukanaah e. Om omaaho ti patap onngaambôôk vaalu vasa, ond ganggilin vaalu kêênj in patap gaving. ⁴⁰ *De omaaho ti gako hong na in gambiing vakasin in nambe ombaanggo yi jak gate lolop, ond gambu vu tonde gambu tôômb vu gaving. ⁴¹ De naambe omaaho ti osin haale naanêêl vu hong naambe onggako yite kupak-ambe gana mop boow ti gaving yi, ond yik onggako be mana, tonde goo balu-gana boow ango gaving yi. ⁴² De naambe omaaho ti kataangg hong in vati ond yik gambu vu, de omaaho ti wiingin nambe gako gate vati be na vêêl e mem gako nom, ond yik game gambu teenin in yi le.”

Yahengg gaving hil sen dayi yiy payaa-to
(Luk 6:27-28,32-36)

⁴³ * “Ham hangoyin tanasin neep nambe, ‘Gahem gaving gate hil, de ganimbaya hil sen dawiiing hong payaa-to.’ ⁴⁴ *Nganjo sale naanêêl vu ham naambe ham ahem gaving hil sen dawiiing ham payaa-to, osin ham anohak na vu Anutu in bu yite samu samu vu hil sen dawiiing nindanjeen vu ham-ato, ⁴⁵ ^b in taato naambe hamate Mom sen nando baandonii-to noondin ham, in yik Anutu nawiiing yite taaku natum ak vu hil anipaya osin hil anivasa, tonde nawiiing yite luk nato vu hil anivalok osin hil anipaya. ⁴⁶ Naambe ham ahem oo gaving hil sen ahend naving ham-ato mu, de ham ahem-ame naving hil vaalu le, ond yik hil anipaya pin ond sil oo ahend naving silate hil va timu nambêênja, le hamambe Anutu le bu nivasa nyevahaan vu ham a? Malis lôôt. ⁴⁷ De naambe ham oo bakaas vu halim-aso mu, ond yik hil vaalu sen sil doosin Anutuu-to ond sil oo mondakaas having halindin va timu nambêênja, om ham awiing vaati be savok sil? Malis, ⁴⁸ ^c om ham oo mando nivalok lôôt naambe sen hamate Mom nando baandoni be yoo nando nivalok lôôt-ato.”

Gandôovu omaahonôôn

6 ¹ *Yesu nêêl nambe, “Ham ganggin ham, ham-ame ambiing hamate kul anivasa jak hil amend in nambe sil lanji le. Naambe ham ambiing naambêênja ond hamate Mom sen nando baandonii-to me-le bu nyevahaan nivasa vu ham e. ² Om gambu va in dôovu hil sen dativak in va yuuh amêê-to ond game gako hong jak e, in hateesin ambu-so dave vuuk munggin e mem davu va vu hil hôôk dumb alo osin talind in nambe hil lanji sil-ambe gako sil haalend jak, nganjo sa naanêêl keen vu ham

* **5:39** Lev 19:18; Jon 18:22-23 [†] **5:40** 1Ko 6:7 [‡] **5:43** Lev 19:18 [§] **5:44** Eks 23:4-5; Luk 23:34; Sin 7:60; Lom 12:14,20; 1Ko 4:12 ^{||} **5:45** Ep 5:1 [¶] **5:48** Lev 19:2; Diu 18:13
^{|||} **6:1** Mat 23:5

naambe omaahonôôn lako sil lak nivasa lung laa-ju, om me-le daatovu nyevahaan nivasa ango vu taamusin e. ³°Gandôôvu hil sen dativak-ato, ond gate omaaho ti me-gango banye be gako ohaalem jak e, ⁴in va sen onavu de hil doosin-ato ond gate Mom nayi, om yoo le bu nyevahaan vu hong.”

Ganohak
(Luk 11:2-4)

⁵°“De ham anohak ond ham-ame anohak naambe hateesin ambu-so le. Sil-anju daale dalohak hôôk dumb alo osin mop lavuun in nambe hil lanji sil. Sa naanêêl keen vu ham naambe omaahonôôn lako sil lak nivasa lung laa-ju, om me-le daatovu nyevahaan nivasa ango vu taamusin e. ⁶°Om ganohak ond gandukana gate bayêên alopayo be ombaayiy vinavi, le mem ganohak vu gate Mom sen nando vunin-ato, in Mom nayi onalohak hôôk bayêên alôô-to tombe le bu nyevahaan vu hong. ⁷°Ham anohak ond ham-ame anohak vakasin mali-malis naambe hil alundoos e. Sil-anju kand navu nambe daanêêl silate lohakin dinaandiin ond mem sil e gako nôôn. ⁸°Ham-ame anohak dinaandiin naambe sil e, in ham naahen navu kataangg hamate Mom, de yoo lak va pin sen ham nativak in-ato ni lung la. ⁹°Om ham anohak naambêênjo naambe,

‘Aamangg, hong sen onando baandoni, hil lambu vaambuung in ohaalem. ¹⁰°Ganaam naatu heyate Omaaho Bop-ambe ganohvu taaku pin, de hil pin lambiing nohvu gakam nanjip voon naambe sen angela dawiiing vu baandonii-to. ¹¹Gambu vanôôn in dôôvu hey peey-anjo, ¹²°de okawiiy heyate va nipaya na nohvu hey oo navu kawiiy hil-ate nyevahaan sen dawiiing vu hey-ato nala. ¹³°Game naanggiy hey ana ngaaho vu palapin e, nganjo ganôôh hey vêêl in omaaho nipaya. [In goo timu nanggin va pin, tonde niwêêk osin nikaapulisi pin neep vu hong-ambe le nanjip danggata. Keen.]’

¹⁴°“Ke, naambe ham kawiiy omaahonôôn-ate va nipaya sen dawiiing vu ham-ato na, ond hamate Mom vu baandoni le kawiiy hamate va nipaya na gaving. ¹⁵Le naambe ham-ame kawiiy omaahonôôn-ate va nipaya na le, ond hamate Mom-ame le kawiiy hamate va nipaya na le.”

° 6:3 Mat 25:37-40 ° 6:5 Mat 23:5; Luk 18:10-14 ° 6:6 2King 4:33 ° 6:7 Ais 1:15;
1King 18:26-29 ° 6:8 Mat 6:32 ° 6:9 Jon 17:6 ° 6:10 Mat 7:21; 26:39; Luk 22:42
° 6:12 Mat 18:21-35 ° 6:13 Mat 26:41; Luk 22:40; Jem 1:13; Jon 17:15; 2Tes 3:3; 2Ti 4:18;
1Kro 29:11-13 ° 6:14-15 Mak 11:25-26

Vakasin sen hil dalakin sil in vanôôn-ato

¹⁶ “Ham anjakin ham in vanôôn-ande ham-ame angga le, ham oo mando mu in nambe ham anohak vu Anutu,

ond ham-ame mando osin ningook naambe hateesin ambu-so le. Sil dando osin nind ngook in nambe hil lanjakin sil anind naambe dalakin sil in vanôôn, om sa naanêêl keen vu ham naambe omaahonôôn lako sil lak nivasa lung laa-ju, om me-le daatovu nyevahaan nivasa ango vu taamusin e. ¹⁷Le naambe ganjakin hong in vanôôn in nambe ganohak vu Anutu ond gambu dôôk galum osin ganjipis gamem, ¹⁸in nambe hil-ame lanjakin ganim naambe galakin hong in vanôôn e, de Mom sen nando vunin-ato yoo le jak ganim, ond yoo le bu nyevahaan nivasa vu hong.”

Vakasin lak kupak anivasa

(Luk 12:33-34)

¹⁹ “Ham-ame anggôôlis hamate kupak anivasa vasa vu voon-anjo le. Vu voon-anjo vivak naya va osin guvin nalak, de hil hôôndak dalukala bayêên-ambe dahôôndak-ato. ²⁰ “Nganjo ham ambiing va nivasa mu in nambe Anutu gatung nôôn anivasa mando ganggin ham vu baandoni. Vu baandoni ond vivak osin guvin-ame le biliyak va le, de hil hôôndak-ame le landukana be langgôôndak e. ²¹In taaku sen gate nôôn anivasa vasa nandôô-to ond galompayo le na vu taakuu-ju.”

Gamem tu ganim naavi-te kin tumin

(Luk 11:34-36)

²² “Gamem kaalus ond ganim naavi-te kin tumin. Om naambe gamem kaalus anivasa ond le naatum nohvu ganim naavi pin. ²³Le naambe gamem kaalus anipay

ond ganim naavi pin e mekanu. Om naambe gate melangaah-anja mekanu dôôk, ond mekanuu-to le naatu bopaata lôôt.”

Vakasin lak yêêv yuuh, Anutu yuuh kupak

(Luk 16:13)

²⁴ “Omaaho ti me-lohvu nambe biing kul aniwêêk vu yêêv yuuh e, in le nimbaya in ango de ahe gaving ango, om le naapuvu ango de galuh dami vu ango. Om ham-ame alohvu nambe ham ambiing Anutu-te kul aniwêêk-ande ham ambiing kul mone niwêêk gaving e.”

° 6:16 Ais 58:5-9 ° 6:19 Jem 5:1-3 ° 6:20 Mat 19:21; Luk 18:22; Kol 3:1-2

Ham-ame naham jak in vanôôn osin tôômb e
(Luk 12:22-31)

²⁵“Sa naanêêl vu ham naambe ham-ame naham jak in vanôôn sen ham anggaa-to le, de bel sen ham naanum, osin tôômb sen ham anjop in nambe dôôvu ham anim naavii-to le, in yiyi nando metumin ond savok vanôôn,

de yaningg naavi ond savok tôômb. ²⁶“Ham akam bu manak e, in manak-ame daalôôh vanôôn e, de me-dasupin vanôôn nôôn-ambe datung lakala pêêt e, ma de hamate Mom sen nando baandonii-to yoo navaat sil. De ham

ond ham haalem bop savok manak-anju om Anutu le baat ham. ²⁷Ham ti tana lohvu nambe ka monambu be gakoseey yite busin sen mando voon-anjôôto balu-na daka gaving? Malis. ²⁸De nambe vaati sen ham naham nalak in tôômb ayuuh amêê-to? Ham akam bu ngaaola nalup hôôk paahup alo, ond me-dawiiing kul bop osin me-davu samu silate tôômb e, ²⁹“lemu sa naanêêl vu ham naambe bôôy Solomon vunak yi lak vunakin amengali-ngali pin, le yite vunakin-ame nivasa nambe sen ngaaolaa-ju le. ³⁰Paahup sen gêên nando de jeey e hil basii-to ond Anutu yoo navunak, om yoo le ganggin ham savok paahup-anju na, le ham-ame nawii-having niwêêk e. ³¹Om ham-ame naham jak-ambe ham naanêêl naambe, ‘Yale angga vaati?’ me, ‘Yale naanum vaati?’ de, ‘Yale aanjop vaati?’ ³²“Va pin-anja hil vaalu sen sil doosin Anutuu-to ond sil oo mondawiiing mend in, lemu hamate Mom vu baandoni yoo lak ham anim lung la nambe ham nativak in va nambêênja. ³³“Om yik ham akam oo bu sen Anutu nanggîn ham-ato naamunggin, osin ham ambiing va nivalok nohvu ka ond mem va pin-anja Anutu le bu vu ham. ³⁴“Om ham-ame naham jak naambe mak nimeen vaati le naatovu ham jeey. Nganjo va sen jeey-ato ond jeey e mem ham akam bu, de busin ti ti-te nimeen ond ham oo kam bu hôôk yite busin nivalok, tombe yik lung.”

Game sahi omaaho ang-te vakasin e
(Luk 6:37-38,41-42)

7 ¹“Yesu nêêl nambe, “Ham-ame sahi omaaho ang-te vakasin-ambe ham naanêêl ak sil alund e, in nambe mem Anutu me-le sahi hamate vakasin-ambe naanêêl ak ham alum e. ²“Le naambe ham navu sahi hil-ate vakasin ond yik Anutu le sahi hamate vakasin va timu. Yik Anutu le biing dukanaah vu ham naambe sen ham nawiing vu omaaho angôô-to. ³Nambe vaati onahe

^r 6:25 Pil 4:6; 1Ti 6:6-8; Hiblu 13:5; 1Pi 5:7 ^s 6:26 Mat 10:29-31; Luk 12:6-7

^t 6:29 1King 10; 2Kro 9 ^u 6:32 Mat 6:8 ^v 6:33 1King 3:10-14; Saam 37:4,25; Lom 14:17

^w 6:34 Eks 16:4,19; Mat 6:11 ^x 7:1 Lom 2:1; 1Ko 4:5; Jem 4:11-12 ^y 7:2 Mak 4:24

kaalekaale daka hôôk halim ame, de game nahe haah boow sen neep hôôk gamem e? ⁴Haah boow yoo neep hôôk gamem, le nambe vaati sen ganêêl vu halim nambe ‘Ombaale de sa japêêh va daka na vêêl in gamem e.’ ⁵Goo natee hong ak, ganôôh haah boow sen neep hôôk gamem-anjaato na vêêl e, mem gale gangge nivasa be onjapêêh kaalekaale na in halim ame. ⁶Ham-ame ambu Anutu-te va vaambuung vu hil sen sil lalohvu voow-ato le, de ham-ame gaate hamate vunakin anivasa sen ham naanggo lak mone bop-ato vu bik e, in sil e baake jak vahand vêêl e mem le langgilin-ambe lanja ham.”

Yiyy kataangg va vu Anutu

(Luk 11:9-13)

^{7a}“Ham kataangg va vu Anutu ond le bu vu ham, de ham salo ond ham e naatokak, tonde ham anyiis ak vinavi ond Anutu le gatahin in ham. ^{8b}In hil pin sen davu kataangg Anutuu-to ond sil e gako, de hil sen davu salôô-to ond le daatovu, de hil sen dayiis ak vinavii-to ond Anutu le gatahin vinavi in sil. ⁹De naambe ham

ti noow kataangg vanôôn vu mangganaan, ond mak mangganaan e bu tatuuh vu? Malis. ¹⁰De naambe kataangg paahuung vu mangganaan, ond mak mangganaan e bu nyêêy anipaya ti vu? Malis lôôt. ¹¹“Ham hil anipaya voon-ate, lemu ham akam navu noom-aso be ham navu va nivasa vasa vu sil, om ham anjak ni bulôôt naambe hamate Mom sen nando baandonii-to le biing va nivasa vasa vu hil sen davu kataangg vu yii-to. ^{12d}Va pin sen ham nawiingin nambe hil lambiing vu ham-ato, ond yik ham oo ambiing naambêênja vu hil, in Mose-te tanasin-ande Anutu-te vakasin sen hil danêêl langaah bôôy-ato danggakook nambêênja.”

Vakasin lak mop metumin-ate

(Luk 13:24)

¹³“Ham andukana mop avi anggo pasiv in nala metumin-ate. Nganjo mopaatôôv anggo sen nala taaku nipayaa-to, ond tatekin-ambe neep bopaata tombe hil ngeeyaata dalukala mop-anju lôôt. ¹⁴“Nganjo mop sen nala metumin-atêêto ond avi nipasiv-ande mop anipasiv having, om hil daka yuu-mu datovu be dalukala.”

Yiyy ganggin yiyy in hil tanasin tatuhin vaha-so

(Luk 6:43-44)

^{15f}“Ham ganggin ham nivasa in hil sen danêêl tanasin tatuhin-ato, in hil-anja dalaas vu ham nambe sen sipsip amelaas-ato, tombe ham e

^z 7:6 Mat 10:11 ^a 7:7 Jer 29:13-14; Mak 11:24; Jon 14:13-14; 15:7; 16:23-24

^b 7:8 Jem 1:5; 1Jon 3:22; 5:14-15 ^c 7:11 Jem 1:17 ^d 7:12 Mat 22:39-40; Luk 6:31;

Lom 13:8-10 ^e 7:14 Jon 10:7,9; Sin 14:22 ^f 7:15 Mat 24:4,24; Sin 20:29; 2Pi 2:1

kam bu naambe hil anivasa, lemu sil alondpayo nipaya nambe voov bamaan sen dawiingin nambe lanja ham-ato. ¹⁶^gHam oo angge va sen sil dawiing-ato ond mem ham e anjak sil anind, in ganggwak-ame nayiis nôôn kopi le, de dandayin-ame nayiis nôôn bangguk e, malis. ¹⁷Haah anivasa nayiis nôôn anivasa, le haah ti nipaya lak ond nayiis nôôn anipaya. ¹⁸Haah anivasa ond me-le nyiis nôôn anipaya le, de haah anipaya ond me-le nyiis nôôn anivasa le. ¹⁹^hHaah pin sen me-nayiis nôôn anivasaa-to ond dasap-ambe dasi lak kin. ²⁰ⁱOm nambêênja ham angge hil sen danêêl tanasin tatuhin-ato silate mopaatôôv ond mem ham e anjak silate dangga ni.”

Yesu le juus hil vaalu
(Luk 13:25-27)

²¹^j“Hil sen danêêl sa nambe Omaaho Bop, ond sil pin-ame le landukana gaving Anutu-te hil osin doos e, malis. Nganjo hil sen dawiing va lohvu Aamangg sen nando baandonii-to ka ond mem le landukana. ²²^kVu busin taamusin-anju ond hil ngeeyaata le daanêêl vu sa naambe, ‘Omaaho Bop, bôôy hey navu tatekin vakasin lak ohaalem, de hey natiy mamu nipaya nala in omaahonôôn lak ohaalem, de hey naawiing taahu taahu osin niwêêk ngeeyaata lak ohaalem.’ ²³^lTombe sale naanêêl langaah vu sil naambe, ‘Sa doosin ham. Ham hil anipaya, ham ana vêêl in sa.’”

Vakasin pakwesin lak bayêên
(Luk 6:47-49)

²⁴^m“Omaaho ti gango sate vakasin-anjo be biing nôôn jak ond lohvu omaaho ti osin ka haav yite ngaandiin bayêên lukala naale lak tatuuh, ²⁵tombe luk hatolak, de bel vaal bopaata de vavi have bayêên-anju lôôt, le bayêên-ame kape le, in tatuuh puvu ngaandiin tatin. ²⁶Nganjo omaaho ti gango sate vakasin-anjo le me-taamuyin e, ond lohvu omaaho ka ma be haav yite bayêên ngaandiin lukala naale laahel, tombe luk hatolak-ande bel vaal bopaata osin vavi have bayêên-anju lôôt, ²⁷tomem bayêên kape be matelak lôôt.”

²⁸ⁿYesu nêêl vakasin-anju be lung la, tombe hil alu bopaata sen dandô-juuto ond sil lavindis lôôt in yite tanasin, ²⁹in me-nawiing tanasin vu sil nambe sen
hil tanasin dangga-so le, malis, nganjo yoo nanêêl lohvu yêêv bop ti.

^g 7:16 Gal 5:19-22; Jem 3:12 ^h 7:19 Mat 3:10; Luk 3:9; Jon 15:6 ⁱ 7:20 Mat 12:33
^j 7:21 Luk 6:46; Mat 21:31; Lom 2:13; Jem 1:22,25 ^k 7:22 Jer 14:14 ^l 7:23 Saam 6:8;
Mat 10:33; 13:41-42; 25:41; 2Ti 2:19 ^m 7:24 Jem 1:22 ⁿ 7:28-29 Mak 1:22; Luk 4:32;
Jon 7:46

Yesu wiing omaaho ti nipayêês anipaya lôôt-ato nivasa lak
(Maak 1:40-44; Luk 5:12-14)

8 ¹Yesu luus vu kanduu-ju be la, tombe hil ngeeyaata lôôt taamuyin yi. ²Tombe omaaho ti nipayêês anipaya lôôt-ato la vu Yesu be hatung kaatu vu yi, de nêêl nambe, “Omaaho Bop, lohvu ond gandôôvu sa be sa ningg naavi nivasa jak.” ³Tombe Yesu hambe nama lak yi de nêêl nambe, “Êê-e, lohvu saandôôvu hong, om ganim naavi nivasa jak.” Tombe yik payêês-anju lung la pavis-ande nivasa lak. ⁴Tonde Yesu vu kôôvu nambe, “Ongganggin hong, game naanêêl vaa-jo vu omaaho ti le, nganjo gana taato ganim naavi vu kul vaha sen datung salivangin-ato ti, de onggatung salivangin nohvu Mose-te tanasin nêêl-ato in nambe mem hil lanjak ni naambe ganim vasa lak lung la.”

Yesu wiing yêêv ti-te hil kul vaha ti nivasa lak
(Luk 7:1-10)

⁵Yesu tok la Kapenaum, tombe hil Lom-ate yêêv ngaamong vaha ti la vu Yesu be kataangg nambe, ⁶“Omaaho Bop, sate kul vaha daka nilak-ambe neep hôôk bayêên alo, ond nama osin vaha nipaya be nango nivaane bopaata lôôt.” ⁷Tombe Yesu nêêl vu nambe, “Om sa nalaas in saambiing-ambe nivasa jak.” ⁸Le yêêv-anju nêêl laah vu nambe, “Omaaho Bop, sa omaaho nipaya, om me-lohvu nambe gandukanaam sate bayêên alo le, om yik onaanêêl amu de sate unoopasiv-anju nivasa jak. ⁹Nambe sen sa, ond yik sa naahulis sate yêêv bop sen nanggin saa-to baambu, de sate hil ngaamong vaha-so dahulis sa baambungg. Om sa naanêêl vu ti naambe ‘Gana’ ond yik la, de sa naanêêl vu ango naambe ‘Ganaam’ ond yik laam, de sa naanêêl vu sate kul vaha naambe ‘Gambiing kul tii-ja’ ond yik wiing.”

¹⁰⁹Yesu hango vakasin-anju tombe vindis lôôt, de nêêl vu hil sen davu taamuyin yii-to nambe, “Sa naanêêl

keen vu ham naambe same aatovu ham Islel ti wii-having niwêêk lôôt nambêênjo le. ¹¹Om sa naanêêl vu ham naambe hil ngeeyaata lohvu taaku nanyendangga pin, ond le lana lanja vanôôn gaving Abalaam ayuuh Isak-ambe Yaakop mando taaku sen Anutu nanggin yite hil-ato. ¹²¹²De Anutu le gatiiy Yuda vaalu lana taaku mekanu sen neep dami lôôt-ato, be sil lana mondaasu osin navund monaangitak vuu-ju.” ¹³Tombe Yesu nêêl vu yêêv-anju nambe, “Om ganaah, gate vakasin navu nôôn jak nohvu gawii-having-anja.” Tombe yik yêêv-anjute kul vaha nivasa lak hôôk taaku me tii-ju vulotin.

° 8:4 Mat 9:30; Mak 7:36; Lev 14:1-32; Luk 17:14 ° 8:5 Jon 4:46-47 ° 8:10 Mat 15:28

° 8:11 Saam 107:3; Luk 13:28-29 ° 8:12 Mat 22:13; 25:30; Luk 13:28

Yesu wiing Pita yenaavêêh having hil ngeeyaata nind vasa lak
(Maak 1:29-34; Luk 4:38-41)

¹⁴“Tonde Yesu lukala Pita-te bayêên alo, tombe yi de Pita yenaavêêh anivaane be neep. ¹⁵Om Yesu puvu hôôk nama, tonde mem nivaanêê-to lung la, de kandi be la hayêêh vanôôn-ambe vu vu Yesu.

¹⁶Tonde soosin atombe lako hil sen mamu nipaya dahôôvu sil-ato ngeeyaata be lala vu Yesu, tombe yik nêêl-ande mamu nipaya lato dala in omaahonôôn, de wiing-ambe hil anilakin pin nind vasa lak laah. ¹⁷“Om nambêênju wiing Anutu-te vakasin ti sen Yesaia nêêl bôôy-ato nôôn ak nambe, “Yoo hako yate nilakin vêêl-ambe vu vêêl yate nivaane.”

Vakasin sen hil lawiingin nambe taamuyin Yesuu-to
(Luk 9:57-60)

¹⁸Yesu yi hil ngeeyaata lambuuh yi tatup, tombe nêêl vu yite maanggêêm-aso nambe, “Yana betum vaalu.” ¹⁹Tombe tanasin dangga ti la nêêl vu nambe, “Kaputung, taaku pin sen ganaa-to ond sale taamuyin hong-ambe sana gaving.” ²⁰“Le Yesu nêêl vu nambe, “Manggalôôn ond deep hôôk haah vuun, de manak ond dahaav vunis, nganjo Omaahonôôn Noow ond baan sen nanjip hôôk-ato ma.” ²¹“Tonde yik maanggêêm-aso ti nêêl vu nambe, “Omaaho Bop, ganjiinggis-ande sana ganggin mangg-ambe jimb-ambe sa daav vêêl e.” ²²“Le Yesu nêêl vu nambe, “Otaamuyin sa, de hil sen nanyendoos in Anutu-te vakasin-ambe sil lalohvu hil yimbin-ato ond sil oo landaav silate halanjang.”

Yesu nêêl-ambe vavi bop osin bel amelaas ak
(Maak 4:36-41; Luk 8:22-25)

²³Yesu lakala kaanu tombe yite maanggêêm-aso lalakala having-ambe sil lala. ²⁴“Lala lalup betum lavuun atombe vavi bopaata wiing-ambe bel anipaya lak lôôt-ambe wiingin nambe savun kaanu na, le Yesu yoo neep ka lingin. ²⁵Tombe lala layêêvu de lanêêl vu nambe, “Omaaho Bop, gandôôvu yiyi in yiyi navu ana mengg nama.” ²⁶“Tombe nêêl vu sil nambe, “Ham naham nalak in? Ham-ame awii-having niwêêk e.” Nêêl atonde kandi lak-ambe nêêl vavi yuuh bel, tombe vavi ma la de bel neep tatimasin. ²⁷Tombe kanund la lôôt-ande lanêêl nambe, “Omaahôô-jo yi vaati ondeey vavi yuuh bel nanyend vuun in lava?”

Yesu hatiïy mamu nipaya la in omaaho yuuh
(Maak 5:1-17; Luk 8:26-37)

²⁸Yesu-so mondala be latok lala hil Gadala-te taaku neep betum vaalu, tombe omaaho yuuh yik mamu nipaya lahôôvu yuuh-ato ond yuuh vu lavandangga

^t 8:14 1Ko 9:5 ^u 8:17 Ais 53:4 ^v 8:20 2Ko 8:9 ^w 8:21 1King 19:20 ^x 8:22 Jon 5:25
^y 8:24 Saam 4:8 ^z 8:26 Mat 14:31; 16:8; Saam 89:9

sen omaahonôn bandumb-ato be lato vu yi. Omaaho yuuh-anju yuuh lalohvu mamu bamaan anipaya om hil dayêenin-ambe me-daloh mop-anju le. ²⁹aTombe yuuh lateey nambe, “Anutu Noow, gayêêvu hey in? Busin naahen-ande galaam in nambe gambu nivaane vu hey pavis a?” ³⁰Taakuu-ju ond bik ngeeyaata daale mondaya va daale diin, ³¹tombe mamu nipaya kataangg Yesu nambe, “Naambe onggatiy hey, ond gambiing-ambe hey aandukana bik ngeeyaataa-ju londpayo.” ³²Tombe nêêl vu mamu nambe, “Ham ana.” Tombe sil lato lala in omaaho yuuh-anjuuto be lalukala bik alo, tombe bik pin-anju latup lôôt-ambe laluus taaku pake be lalukala betum, tombe lanum bel-ambe layimb valok-ate. ³³De hil sen danggin bik-ato lapak-ambe lala bayêen bop, tombe latulin vakasin pin osin omaaho yuuh sen mamu nipaya lahôôvu yuuh-ato ond yuuhate vakasin, ³⁴tombe hil pin vu taakuu-ju lala in nambe lana vu Yesu, tombe latovu yi be sil kataangg nambe gavuu silate taaku de na taaku ango.

Yesu wiing omaaho vaha yuuh nama nipayaa-to nivasa lak

(Maak 2:1-12; Luk 5:17-26)

9 ¹bYesu lakala kaanu be laah betum vaalu, tombe tok la baan, ²tonde laaku omaaho nipaling ti vaha yuuh nama nipayaa-to neep ak yêenin-ambe lala vu. Tombe Yesu lak ni nambe sil alondpayo la timu vu yi, om nêêl vu omaaho nipaling-anjo nambe, “Noongg-e, gakam vasa jak. Gate nipaya ond sa kawiiy la.” ³Tombe tanasin dangga-so vaalu yoo kand navu hôôk lond nambe, “Omaahôô-ju wiingin nambe savok Anutu.” ⁴cTombe Yesu lak silate vakasin sen kand navuu-to ni, om nêêl nambe, “Nambe vaati sen ham akam navu paya hôôk ham alompayo?” ⁵De sa naanêêl vakasin ango tana in ham ange be ham anjak ni naambe nôôn keen? Sa naanêêl naambe ‘Gate nipaya ond sa kawiiy la,’ ond ham-ame le anjak ni le. Nganjo sa naanêêl naambe ‘Okandi baale be gana,’ ond mem ham e anjak ni naambe nôôn keen. ⁶dOm peey-anjo ham anjak ni naambe Omaahonôn Noow laam vu baandoni ond yoo tu danggakook vu voon in nambe kawiiy hil-ate va nipaya na.” Tonde nêêl vu omaaho nipaling-anjôôto nambe, “Okandi gako gate kaanye jak-ambe ganaah gambaam.” ⁷Tombe omaahôô-ju kandi lak-ambe laah baan. ⁸Hil ngeeyaata layi be layêenin lôôt, tombe lako Anutu haale lak in vu niwêêk nambêenjo vu omaahonôn in nambe landôôvu omaaho ango.

Yesu teey Matai

(Maak 2:13-17; Luk 5:27-32)

⁹Tonde Yesu vuu-ju be la, tombe yi de omaaho ti nando hôôk bayêen sen dako taakis hôôk-ato, haale nambe Matai. Tombe Yesu nêêl vu nambe, “Ganaam taamuyin sa.” Tombe kandi be la sapa yi.

^a 8:29 Mak 1:24; Luk 4:34,41 ^b 9:1 Mat 4:13 ^c 9:4 Mat 12:25; Luk 9:47; Jon 2:25

^d 9:6 Jon 17:2; 5:8

¹⁰Tombe Yesu having yite maanggêem-aso be lala dando be mondaya vanôôn hôôk Matai-te bayêên alo, tonde hil sen dako taakis osin hil sen davu kalêêh tanasin-ato ngeeyaata lalaam-ambe dando daya vanôôn having sil. ¹¹^eTombe hil Palisai heey layi be lanêêl vu

yite maanggêem-aso nambe, “Nambe vaati sen hamate kaputung naya vanôôn having hil sen dako taakis osin hil anipaya vaaluu-ju?”

¹²Le Yesu hangoyin atombe nêêl nambe, “Hil anind vasa ond me-dala vu dokta le, hil sen nind nalak ond mem dala vu. ¹³^fHam ana de ham akam bu vakasin munggin-anjo dangga le, sen Anutu nêêl nambe, ‘Same aawiingin salivangin e, nganjo sahengg having nambe ham akam pasiv in omaahonôôn-ambe ham andôôvu sil.’ De sak, same alaam in nambe naateey hil sen datee sil lak nambe sil anivasaa-to le, ma, nganjo sa laam in naateey hil anipaya.”

Lalingin Yesu in hil dalakin sil in vanôôn

(Maak 2:18-22; Luk 5:33-39)

¹⁴^gLung laa tonde Jon-ate maanggêem-aso lala vu Yesu be lanêêl vu nambe, “Hey-ande Palisai-so ond hey nalakin hey in vanôôn-ande hey nando meep in nambe hey monaanoahak na vu Anutu, le nambe vaati sen gate maanggêem-ame dalakin sil in vanôôn e?” ¹⁵^hLe Yesu nêêl vu sil nambe, “Hil lasupin lala in daapêêlis gaving omaaho ti in hako vêêh moos ond sil-ame lalohvu nambe lanjakin sil in vanôôn-ande sil mando meep e, le nama. Nganjo busin ti le naatok naam atombe hil e lanôôh omaahôô-juuto na vêêl in yite hil, ond mem le lanjakin sil in vanôôn.

¹⁶“De tôômb ti nimbôôy-ambe ahembalap ak tombe kweek, ond omaaho ti me-naanduuh moos kamu ti jakanaah e. Le naambe naanduuh moos kamu ti jakanaah ond le naakweek nimbôôy-ato be naatu bopaata jak. ¹⁷De hil-ame datooy wain moos nalokala bik naavi nimbôôy-ande bambôôv e. Naambe daatooy dukana ond wain e buuk-ambe bapuuu bik naavi nimbôôy-anju bilyak-ande kaasêêh na. Nganjo daatooy wain moos dukana bik naavi moos ond mem wain osin bik naavi le mando nivasa.”

Yesu yêêvu yêêv nowaavêêh-ambe kandi lak laah, de

wiing vêêh ango nivasa lak

(Maak 5:22-43; Luk 8:41-56)

¹⁸Yesu naahen nanêêl vakasin-anju vu sil, tonde yêêv ti la hatung kaatu vu de nêêl nambe, “Sa nonggaavêêh naahen nayimb gesaange, om ganaam gambe namam jak yi tombe mem le kandi vasa dôôk.” ¹⁹Tombe Yesu kandi taamuyin yi be yuuh lala, de yite maanggêem-aso lala having.

^e 9:11 Luk 15:2; 19:7 ^f 9:13 Mat 12:7; Hos 6:6 ^g 9:14 Luk 18:12 ^h 9:15 Jon 3:29

²⁰ ⁱTonde sim vêêh ti ond vêêh-ate nilakin tovu tombe yoo nando bayêên pasiv nalak busin pin lohvu ta nomaayuuu-ambe laam yuuu, ond valu-naale Yesu dami, tombe hambe nama lak Yesu-te lolop anyendaambu. ²¹ Vêêh-anju yoo ka vu nambe, “Sa gambe namangg jak yite lolop amu ond sale sa ningg vasa dôôk.” ²² ^jTombe Yesu hilin-ambe yi vêêh-anju be nêêl vu nambe, “Nonggaavêêh, galompayo ahelavis jak. Gawii-having om ganim vasa lak.” Tombe yik pavis atombe vêêh-anju nivasa lak.

²³ Tonde mem Yesu la valup yêêv-anju baan, tombe yi de hil dave gavêêngg osin dawiiing nindaandun bopaata, ²⁴ ^ktombe Yesu nêêl nambe, “Ham ana vêêl. Unaavepasiv-ame yimb e, nganjo yoo neep anêên.” Le sil lanop ak yi. ²⁵ ^lLatiiy hil lato lala vêêl e, tonde mem Yesu lukala bayêên alo be lôôh hôôk unaavepasiv-anju nama be kandi lak. ²⁶ Tombe vaa-ju banye la lohvu taakuu-ju pin.

Yesu wiing omaaho mekanôônd yuuh de ka ma ti nind vasa lak

²⁷ ^lYesu kandi vuu-ju be la, tombe omaaho mekanôônd yuuh oo mosapa yi, be mondateey nambe, “Hong sen gate danggakook neep vu Devit-ato, gakam pasiv in haay.” ²⁸ Tombe Yesu lukala bayêên alo de omaaho mekanôônd ayuuu-ato lala vu, tombe Yesu lingin yuuh nambe, “Mak mawii-having sa nambe saalohvu aandôôvu muuh a?” Tombe yuuh laliinggis vu nambe, “Êê-e Omaaho Bop, galohvu.” ²⁹ ^mTombe hambe nama lak yuuh amend-ande nêêl nambe, “Om mamem anivasa jak nohvu mawii-having-ato.” ³⁰ ⁿOm yuuh amend tum, tombe Yesu vu kôôvu yuuh niwêêk nambe, “Maayuuu, mame naanêêl vaa-jo vu omaaho ti le.” ³¹ Le ma de yuuh lala

lanêêl vaa-ju banye be lohvu taakuu-ju pin.

³² ^oYuuh lala lak tonde hil lako omaaho ti mamu nipaya hôôvu tombe ka ma be lalaam vu Yesu. ³³ ^pTombe Yesu hatiiy mamu nipayaa-ju hato la in omaaho sen ka maa-juuto tonde vakaas, tombe hil ngeeyaata lavindis lôôt, de lanêêl nambe, “Yame aahe vati nambêênjo vu Islel

bôôy e.” ³⁴ ^qLemu Palisai-so lanêêl nambe, “Mamu nipaya-te yêêv bop vu niwêêk vu yi ondeey natiyy mamu nipaya dala in omaahonôôn.”

Yesu ka pasiv in omaahonôôn

³⁵ ^rYesu la hatup hôôk taaku bop osin pasiv pin-ambe monawiiing tanasin hôôk silate dumb ti ti. Nanêêl banye nivasa sen Anutu nanggin

ⁱ 9:20 Mat 14:36 ^j 9:22 Mak 10:52; Luk 17:19 ^k 9:24 Jon 11:11 ^l 9:27 Mat 20:29-34

^m 9:29 Mat 8:13 ⁿ 9:30 Mat 8:4 ^o 9:32-33 Mat 12:22 ^p 9:33 Mak 2:12

^q 9:34 Mat 12:24; Mak 3:22; Luk 11:15 ^r 9:35 Mat 4:23; Mak 1:39

yite hil-ato langaah, de nawiing hil anilakin vaha vaha osin nipaling pin nind vasa nalak.

³⁶Yesu nayi hil ngeeyaataa-ju tombe ka pasiv in sil in nambe kand nala nge-ngeey, de dando paya lôôt nambe bik sipsip sen heendin lavuuh sil-ato, ³⁷tombe nêêl vu

yite maanggêêm-aso nambe, “Vanôôn ngeeyaata nôôn ak hôôk kulaanôôn lung la, lemu kul vaha-so daka yuu-mu, ³⁸om ham kataangg kul mangganaan in biing kul vaha-so heey lana daasupin yite vanôôn gaving.”

Yesu-te maanggêêm nomaayuuu-ambe laam yuuh-ato haalend
(Maak 3:13-19; Luk 6:12-16)

10 ¹Yesu teey yite maanggêêm nomaayuuu-ambe laam yuuh-ato lalaam-ambe vu niwêêk vu sil in nambe sil gatiy mamu nipaya na in omaahonôôn, de lambiing hil anind lakin osin hil anind paling pin-ambe nind vasa jak. ²De sinaale-so nomaayuuu-ambe laam yuuh haalend-anjo, omaaho sen munggin ond Simon, haale ango nambe Pita, de hali Endru, tonde Sebedi noow Jems ayuuh hali Jon, ³tonde Pilip ayuuh Batolomai, de Tomas ayuuh Matai sen nako taakis-ato, tonde Alpias noow Jems, de Tadias, ⁴tonde Simon ango sen naanjiihin hil Yuda in nambe gatiy hil Lom lanaa-to, de Yudas Iskaliot sen taato Yesu langaah-ambe hil lalôôh-ato.

Yesu nêêl tanasin vu maanggêêm-aso de wiing sil lala kul
(Maak 6:7-13; Luk 9:1-5)

⁵Yesu wiing hil nomaayuuu-ambe laam yuuh-anju lala kul, om nêêl tanasin vu sil nambe, “Ham-ame anoh hil vaalu sen sil-ame Yudaa-to silate mop e, de ham-ame andukana Samaalia-te taaku ti le, ⁶ham oo ana vu hil Islél in sil lalohvu sipsip-ambe dala mend nama. ⁷Ham ana naanêêl langaah naambe, ‘Ngaaho lak in Anutu ganggin yite hil.’ ⁸Ham ambiing hil anilakin nind vasa jak, de ham anjêêvu hil yimbin-ambe kandi jak, de ham ambiing hil anind payêês anipaya lôôt-ato nind vasa jak, osin ham gatiy mamu nipaya lana in omaahonôôn. In saavu niwêêk vu ham-ato ond ham hako malis-ande vaanggosin ma, om yik ham ambiing kul jak malis amu vu hil, de ham-ame gako mone jak e. ⁹De ham-ame gako mone gool osin siliva having mone noow dombaale hamate gis e, ¹⁰de ham-ame ganja vaahes-ambe ham ana mop e, de

^{*} 9:36 Mat 14:14; Nam 27:17; 1King 22:17; Esi 34:5; Sek 10:2; Mak 6:34 [†] 9:37 Luk 10:2
^u 10:1 Mak 6:7; Luk 9:1 ^v 10:5 Sin 13:46 ^w 10:6 Jer 50:6; Mat 15:24 ^x 10:7 Mat 3:2;
 4:17; Luk 10:9,11 ^y 10:8 Sin 20:33 ^z 10:9 Luk 10:4 ^a 10:10 Nam 18:31; Luk 10:7;
 1Ko 9:14; 1Ti 5:18

ham-ame gako lolop yu-yuuh e, de ham-ame gako suul osin paatôôn e, jip, in kul sen ham ambiing vu hil-ato ond yoo neep vu sil in nambe landôôvu ham in vanôôn ayuuh ame.

¹¹ “Ham andukana taaku bop ti, me bayêên pasiv ti, ond ham anjingin hil-anju naambe ti nivasa lohvu ganggin ham ond ham mando gaving yi nivalok-ambe na balup busin sen ham ana jak-ato. ¹² ^bTonde ham andukana bayêên alo ond ham naanêêl vakasin anivasa vu hil-anju. ¹³ Naambe hil sen ham alakala vu sil-anju nind vasa, ond mem hamate vakasin melaas e na vu sil, le naambe sil-ame nind vasa le, ond hamate vakasin melaas e gilin-ambe nom vu ham. ¹⁴ ^cNaambe vaheey-ame gako ham jak e, de me-gango hamate vakasin e, ond ham gavuuu bayêên-anju me taakuu-ju, de ham tatehin kambus sen nando lak ham vaham-ato naah-ande ham ana. ¹⁵ ^dSa naanêêl keen

vu ham naambe vu busin taamusin sen Anutu gangoyin omaahonôôn-ate vakasin-ato, ond hil vu taakuu-ju le daatovu nimeen bopaata kaluuh Sodom osin Gomola.”

Nimeen ngeeyaata le naam
(*Maak 13:9-13; Luk 21:12-17*)

¹⁶ ^e“Ham gango, saambiang-ambe ham ana naambe sen bik sipsip-ato melaas in nambe ham andukana voow bamaan lavuun, om ham oo angge hamate mop nivasa naambe nyêêy, de ham ambiing va melaas naambe manak sen nawiing melaas-ato. ¹⁷ ^fOm ham ganggin ham nivasa in hil, in sil e gako ham ana vu kaansol-aso be ham ambiing vakasin, de sil e gaveek ham dôôk silate dumb alo. ¹⁸ ^gDe sil e gako ham ana baale hôôk yêêv bop osin omaaho lulemak-aso mend in sate hil ham, tombe ham e naanêêl sa banyengg langaah vu yêêv-asôônju, de vu hil vaalu sen sil-ame Yudaa-to gaving. ¹⁹ ^hOm hil gako ham ana in ham ambiing vakasin, ond ham-ame naham jak naambe ham

e ambiing vakasin naambe tana me ham e naanêêl vaati, malis, yik Anutu yoo le taato va sen ham naanêêl-ato hôôk busin tii-ju vu ham bulôôt. ²⁰ ⁱHam-ame yoo le naanêêl vakasin e, malis, nganjo Mom-ate Vavi Vaambuung e dôôvu ham in vakasin.

²¹ ^j“Omaahonôôn e daanêêl halindin langaah, tombe lanyiis sil-ambe lanjimb, de yik maandin e lambiing naambêênju vu noondin. Tonde yik unoopasiv e lanji maandin ayuuh taandin paya be daanêêl sil langaah, tombe hil lanyiis sil-ambe lanjimb. ²² ^kDe omaahonôôn pin e nind baya lôôt in ham in sate hil ham, om ham baale niwêêk lôôt-

^b 10:12 Luk 10:5-6 ^c 10:14 Luk 10:10-12; Sin 13:51; 18:6 ^d 10:15 Mat 11:24; Jen 18:20-19:28; 2Pi 2:6; Jut 7 ^e 10:16 Luk 10:3; Jon 10:12; Sin 20:29; Lom 16:19 ^f 10:17 Mat 24:9

^g 10:18 Sin 25:23; 27:24 ^h 10:19-20 Luk 12:11-12 ⁱ 10:20 Jon 14:26; 1Ko 2:4

^j 10:21 Mai 7:6; Mat 10:35 ^k 10:22 Mat 24:9,13; Jon 15:18-21

ambe ham baaku nimeen pin, ond ham e ana mando metumin gaving Anutu. ²³ ¹De hil lambiing nindanjeen vu ham dôk taaku ti, ond ham napakambe ham ana taaku ango. Sa naanêl keen vu ham naambe ham-ame le anohvu Islel-ate taaku pin e, tonde Omaahonôn Noow e nom.

²⁴ ^m“Unoopasiv-ame savok yite kaputung e, de kul vaha me-savok yite yêv e. ²⁵ ⁿNaambe unoopasiv mando naambe yite kaputung ond lung, de kul vaha

mando naambe yite yêv ond lohvu. Lanêl mamu nipaya-te yêv Belsebul lak bayêen danggakook sa, om yik le daanêl yêv anipaya heey jak sate hil gaving.”

Omaahonôn lanjêenin Anutu

(Luk 12:2-7)

²⁶ ^o“Om ham-ame anjêenin hil e, in vakasin p sen neep vuninato ond le naatok naam langaah, yik vakasin pin sen hil akand navu be neep hôk londpayôd-to ond taamusin hil e lanjak ni pin. ²⁷ Tanasin sen yiy oo nando de sa naanêl vu ham-ato ond ham naanêl na langaah, yik vakasin sen ham oo nangoyin-ande sa naanêl-ato ond ham ana baale talind-ambe ham naanêl vu hil pin. ²⁸ ^pHam-ame anjêenin omaahonôn in nambe le lanyis ham anim naavi jimb, in sil-ame lalohvu nambe lanyis ham kanum e. Nganjo ham oo anjêenin Anutu in yoo lohvu nambe nyis ham anim naavi osin ham kanum hôk taaku nipaya. ²⁹ Hil daanggo manak taapêv daka yuuh lak mone noow timu, lemu manak pasiv pasiv-anjuuto ti

me-le dupake malis e, nganjo hamate Mom sen nando baandonii-to jinggis ond mem. ³⁰ De ham ond sevin ham alumvalus pin lôt lung la, ³¹ ^qom ham-ame anjêenin e, in ham atu Anutu-te va-so savok manak pasiv pasiv-anju pin.”

Yiy naanêl Yesu haale langaah

(Luk 12:8-9)

³² ^r“Omaaho ti naanêl sa haalengg langaah vu hil ond sale naanêl omaaho tii-ju haale langaah vu Aamangg sen nando baandonii-to, ³³ ^sle naambe omaaho ti jak alu in sa vu hil ond sale anjak alungg in yi vu Aamangg sen nando baandonii-to.”

¹ **10:23** Mat 16:28 ^m **10:24** Luk 6:40; Jon 13:16; 15:20 ⁿ **10:25** Mat 9:34; 12:24; Mak 3:22; Luk 11:15 ^o **10:26** Mak 4:22; Luk 8:17 ^p **10:28** Jem 4:12 ^q **10:31** Mat 6:26; 12:12 ^r **10:32** Taato 3:5 ^s **10:33** Mak 8:38; Luk 9:26; 2Ti 2:12

Yesu laam in ngaamong
(*Luk 12:51-53; 14:26-27*)

³⁴“Ham akam-ame bu naambe sa laam in aambu mamaal vu voon e. Same alaam in aambu mamaal e, malis, sa laam in ngaamong. ³⁵‘Sa laam atombe hil daasuh sil in sa, om noondin alondpayo le na ango, de maandin alondpayo le na ango, tonde nondinaavêêh alondpayo le na ango, de taandin alondpayo le na ango, tonde vêêh-aso londpayo le na ango, de yendinaavêêh alondpayo le na ango, ³⁶de hil sen dando lak bayêên timuu-to ond yoo le lanji sil paya lôôt.

³⁷“Omaaho ti ahe having mangganaan me tangganaan savok sa, ond me-lohvu nambe naatu sate hil e, de omaaho ti ahe having noow me nowaavêêh savok sa, ond me-lohvu nambe naatu sate hil e. ³⁸’De omaaho ti me-baaku yite haah pako” be taamuyin sa le, ond me-lohvu nambe naatu sate omaaho le. ³⁹Omaaho ti yoo ganggin ninaavi nivasa in nambe mando metumin ond le jimb-ambe na menama, le naambe omaaho ti baaku nimeen ak sa haalengg-ambe jimb, ond mem le mando metumin danggata.”

Hil e gako nyevahaan nivasa
(*Maak 9:41*)

⁴⁰“Omaaho ti gako ham jak ond lohvu hako sa lak, de hako sa lak ond lohvu hako omaaho sen wiing sa laam-ato lak. ⁴¹Omaaho ti gako Anutu-te omaaho nanêêl yite vakasin-ato jak in dangga nambe nanêêl Anutu-te vakasin langaah, ond yuuh ahondoos e gako nyevahaan nivasa nanjip ti. Tonde naambe omaaho ti gako omaaho nivalok ti jak in dangga nambe yi omaaho nivalok-ato, ond yik yuuh ahondoos e gako nyevahaan nivasa nanjip ti. ⁴²’De naambe omaaho ti bu bel kuuh vu sate hil malis ti be naanum in dangga nambe sate hil yi ti, ond sa naanêêl keenaanôn vu ham naambe omaahô-jû le gako yite samu samu nivasa nyevahaan dukanaah.”

Jon wiing yite maanggêem-aso lala vu Yesu
(*Luk 7:18-35*)

11 ¹Yesu wiing tanasin vu yite maanggêem nomaayuu-h-ambe laam yuuh-ato lung la, le mem kandi lak vuu-ju be la hatup hôök

[†] 10:35 Mai 7:6 [‡] 10:37 Diu 33:9 [¶] 10:38-39 Mat 16:24-25; Mak 8:34-35; Luk 9:23-24; 17:33; Jon 12:25 ^{*} **Matai 10:38** Yêêv Lom-aso danêêl nambe omaaho ti wiing va nipaya om lanyis dukanaah nyevahaan-ambe jimb, ond layiis lakala haah pako in nambe bu nimumin vu yi osin yite hil. Tonde Yesu nêêl nambe omaaho ti wiingin nambe sapa yi ond yoo baaku yite haah pako be sapa yi, ond dangga nambe yame aanjêênin nimeen osin nimumin sen hil lambu vu yiyi jak Yesu haalêê-to le, yiyi baaku be yiyi oo sapa Yesu.

^{*} 10:40 Mak 9:37; Luk 10:16; Jon 13:20; Gal 4:14 [¶] 10:42 Mat 25:40

bayêên bu ti ti vu taakuu-ju be nanêêl yite vakasin langaah, de navu tatekin tanasin vu sil.

²Latung Jon sen nalipis hil-ato lukala kalaambus-ambe nando, tonde hangoyin kul sen Kalisi nawiing-ato banye, tombe wiing yite maanggêem lala vu Yesu, ³tombe lalingin yi nambe, “Mak hong omaaho sen Jon nêêl banye nambe le naam-ato, me hey mongganggin omaaho ango le?” ⁴Le Yesu nêêl laah vu sil nambe, “Ham anaah gatulin va pin sen ham nago osin ham nahêê-to vu Jon, ⁵naambe hil amend kanu dayi taaku yesin laah, de vahand anipaya dala mop, de payêês anipaya lôôt anind vasa nalak, de hil nanyend katôônd dango taaku, tonde hil yimbin davu kandi lak, de hil anipaya paya dango banye nivasa. ⁶Tonde omaaho ti me-ka yu-yuuh in sa le ond le ka vasa.”

⁷Jon-ate maanggêem-aso dala lak tonde mem Yesu nêêl Jon langaah vu hil alu bopaataa-ju nambe, “Bôôy ham ala vu Jon vu taaku lumbalaamb in nambe ham angge vaati? Mak ham ala in angge omaaho sen lohvu vavi nayêêyak ngasing a? ⁸Me ham ala in angge vaati? Mak ham ala in angge omaaho ti lop lolop anivasa vasa? Malis, hil sen dalop lolop anivasa vasa ond yoo dando lak lulemak-asote bayêên, ⁹om ham ala in angge vaati? Ham ala in angge omaaho ti nanêêl Anutu-te vakasin langaah a?

Êê-e, de sa naanêêl vu ham naambe omaahôô-ju savok hil sen danêêl Anutu-te vakasin langaah-ato la. ¹⁰Jon-anju ond Anutu nêêl yite vakasin munggin-ambe neep hôôk kaapiya nambe,

‘Onggango le, sa navu aambiing sate omaaho ti
na naamunggin vu hong in samu gate mop.’

¹¹Sa naanêêl keen vu ham naambe Jon sen nalipis hil-ato ond savok hil pin sen taandin dako sil vu voon-anjôôto, lemu hil sen Anutu nanggin sil-ato vaalu haalend nipasiv lôôt, ond le savok Jon na.

¹²“Vu bôôy sen Jon nalipis hil-ato be tok laam gêên-anjo ond Anutu nawiing va vaha vaha osin niwêêk in taato naambe navu ganggin yite hil-ato, tonde hil sen londpayo naanjiihin sil lôôt ond sil anindwêêk in nambe landukana gaving Anutu-te hil. ¹³Mose-te tanasin osin hil sen danêêl Anutu-te vakasin langaah-ato pin-ambe la valup Jon ond lanêêl vakasin langaah lak sen Anutu le ganggin yite hil-ato, ¹⁴om naambe ham awiingin

nambe gangoyin ond ham gango naambe Jon-anju ond Eliya sen vakasin neep nambe le naam-ato. ¹⁵Omaaho ti nanye neep ond gangoyin.

² 11:2 Mat 14:3 ³ 11:3 Mal 3:1; Mat 3:11; Jon 1:15 ⁴ 11:5 Ais 35:5-6; 61:1

⁵ 11:6 Mat 13:57; 26:31 ⁶ 11:7 Mat 3:5 ⁷ 11:9 Luk 1:76 ⁸ 11:10 Mal 3:1; Mak 1:2; Jon 3:28 ⁹ 11:12 Luk 16:16 ¹⁰ 11:14 Mal 4:5; Mat 17:10-13; Mak 9:11-13

¹⁶ “Sale naanêl ham hil sen gêên-anjo naambe va? Ham nambe unoopasiv sen dando talind-ambe davu teey la vu ango-so nambe,

¹⁷ ‘Hey aawiing kombin in ham, lemu ham-ame nakôômb e, de hey aasu kangg paya paya le ma de ham-ame navu kaatuuh ham e.’

¹⁸ ⁱIn Jon laam atombe me-ya vanôôn anivasa de me-num wain e, tombe ham anêl nambe, ‘Mamu nipaya nahôôvu yi.’ ¹⁹ ^jDe Omaahonôôn Noow laam-ambe ya osin num, tombe ham anêl nambe, ‘Ham angge, omaaho aheta om yoo naya osin nanum wain ngeeyaata, om hil sen dako taakis-ato osin hil sen dawiiing va nipayaa-to vaalu

silate omaaho tii-ju.’ Lemu yaangge kul nôôn sen omaaho ti nawiing-ato ond mem yale anjak ni naambe omaaho osin ka.”

Nimeen vu hil sen me-lawiihaving-ato

(Luk 10:13-15)

²⁰ Vu taaku bop vaalu ond Yesu wiing taahu taahu osin niwêêk ngeeyaata, le hil-ame lahilin londpayo le, om Yesu nêl sil nambe, ²¹ ^k“Ham Kolasin, de ham Betsaida, ham e naatovu nimeen, in nambe saambiing taahu taahu osin niwêêk ngeeyaata vu Taia osin Saidon naambe sen saawiing vu hamate taakuu-to, ond bôôy hil Taia osin Saidon e gayêêh vaahes-ambe sil mando osin nind ngook in taato naambe londpayo nimeen om lahilin sil laah vu Anutu. ²² ^lOm sa naanêl vu ham naambe vu busin taamusin sen Anutu gangoyin omaahonôôn pin-ate vakasin-ato, ond ham e naatovu nimeen bopaata kaluuh Taia osin Saidon. ²³ ^mDe ham Kapenaum-anja, hamambe ham e gako ham jakana baandoni? Malis, ham e andukana taaku nipaya, in nambe saambiing taahu taahu osin niwêêk ngeeyaata vu Sodom naambe sen saawiing vu hamate taakuu-to, ond Sodom yoo le mando be gêên-anjo. ²⁴ ⁿOm sa naanêl vu ham naambe vu busin taamusin sen Anutu gangoyin omaahonôôn pin-ate vakasin-ato ond ham e naatovu nimeen bopaata kaluuh Sodom.”

Yesu nêl nambe yana vu be yiyi sawaah

(Luk 10:21-22)

²⁵ ^oHôôk busin-anju Yesu lohak nambe, “O Aamangg, hong Omaaho Bop vu baandoni osin voon, sa naapêêlis vu hong, in gavun va pin-anjo in hil sen omaahonôôn dayi sil nambe hil osin kand bop de hil alukook bop, tonde otaato langaah vu hil mali-malis. ²⁶ Keen Aamangg, in goo gahe nivasa ondeey gawiing nambêênja.”

ⁱ 11:18 Mat 3:4 ^j 11:19 Mat 9:14; Luk 15:1-2 ^k 11:21 Jona 3:6 ^l 11:22 Ais 23; Esi 26:1-28:26; Joel 3:4-8; Emo 1:9-10; Sek 9:2-4 ^m 11:23 Ais 14:13-15; Jen 19:24-28; Jut 7

ⁿ 11:24 Mat 10:15; Luk 10:12 ^o 11:25 1Ko 1:26-29

^{27P}Yesu lohak lung atonde nêêl vu sil nambe, “Aamangg vu va pin lukala sa namangg lung la, de omaaho ti me-lak Noow ani le, Mangganaan timu yoo lak ni. De omaaho ti me-lak Mangganaan ani le, Noow oo lak ni, de hil sen Noow navu tatekin Mangganaan vu sil-ato, ond mem lalak Mangganaan ani having.

^{28 q}“Ham pin sen ham sakem ma laa-to, osin ham sen va nimeen nanjingin ham-ato, ond ham pin anaam vu sa tombe mem saambu sawaasin vu ham. ²⁹Ham naatu sate hil kul vaha-so be ham gako kakook vu sa, in sa omaaho melaas, de sa longgpayo me-natee yi lak e, ond mem hamate nôôn e naatovu yite sawaasin, ^{30 s}in tanasin sen saambu vu ham-ato ond nivasa, de kul sen saambu vu ham in ham baakuu-to ond ahelavis.”

Vakasin lak busin sawaasin

(Maak 2:23-28; Luk 6:1-5)

12 ^{1 t}Hôôk busin-anju ond busin sawaasin ti, tombe Yesu having yite maanggêem-aso be laloh mop sen neep hôôk kul lavuun-ato be lala, tombe yite maanggêem-aso layimb ahend om sil kalêêh wit nôôn-ambe landaah”. ²Tombe Palisai layi be lanêêl vu nambe, “Gangge, gate maanggêem-aso davu kalêêh wit nôôn, le me-lohvu nambe yaambiing kul hôôk busin sawaasin e.” ^{3 w}Tombe Yesu nêêl vu sil nambe, “Vu bôôy Devit having yite hil sen laving yii-to ond layimb ahend tombe wiing vaati? Mak ham-ame asevin mava? ^{4 x}Nambe Devit lukala Anutu-te dumb alo tombe sil o yite maanggêem-aso laya vanôôn sen hil latung vu Anutuu-to, ond vanôôn-anju me-lohvu nambe Devit-aso yite hil lanja le, nganjo kul vaha sen datung salivangin-ato yoo lanja. ^{5 y}De vakasin sen neep hôôk Mose-te tanasin nambe kul vaha sen datung salivangin-ato silate kul neep hôôk Anutu-te dumb bop alo, ond mak ham-ame asevin vakasin-anju mava? Tombe dawiiing kul dumb-anju hôôk busin sawaasin, ond davu kalêêh tanasin sen nêêl nambe yame aambiing kul hôôk busin sawaasin e, lemu nipaya me-neep vu sil e, ^{6 z}om sa naanêêl vu ham naambe saa-jo

^P 11:27 Mat 28:18; Jon 3:35; 17:2; 1:18; 10:15; Pil 2:9 ^q 11:28 Jer 31:25 ^r 11:29 Jer 6:16

^s 11:30 1; Jon 5:3 ^t 12:1 Diu 23:25 ^u Matai 12:1 Yuda-te tanasin ti neep hôôk Diuteronomi 23:25 nambe omaaho ti-te kul neep vu mop nanyendangga, tombe hil daloh mop-ambe dayimb ahend, ond sil kalêêh omaahôô-ju yite wit nôôn daka nanjip mop nanyendangga be sil gandaah-ande vakasin ma. Nganjo yêêv-aso danêêl nambe dôôk busin sawaasin ond hil-ame kalêêh wit nôôn daka be gandaah e, in danêêlin va pin nambe hil-ame lambiing kul pasivdaka dôôk busin sawaasin e, malis lôôt. Le Yesu nêêl Devit-ate vakasin laah vu Palisai-so in nambe bêêl sil alund jak, in sil sahi nambe Devit yimb ahe be ya vanôôn om lung, tonde Yesu-te maanggêem-aso ond me-kand pasiv in sil e. ^v 12:2 Eks 20:10 ^w 12:3 1 Sml 21:1-6 ^x 12:4 Lev 24:5-9 ^y 12:5 Nam 28:9-10 ^z 12:6 Mat 12:41-42; Luk 11:31-32

sa savok Anutu-te dumb bop. ⁷aDe naambe ham anjak Anutu-te vakasin-anjo danggakook ani naambe, ‘Same aawiingin salivangin e, nganjo sahengg having nambe ham akam pasiv in omaahonôn-ambe ham andôovu sil.’ Ke, ham akam bu vakasin-anjo nivasa ond mem ham-ame le naanêl hil sen silanêend nipaya maa-to naambe sil lawiing nipaya le, malis. ⁸In Omaahonôn Noow tu busin sawaasin-ate danggakook.”

Yesu wiing omaaho nama nipayaa-to nivasa lak
(Maak 3:1-6; Luk 6:6-11)

⁹Tonde Yesu vuu-ju be la lukala silate dumb alo,
¹⁰^btombe omaaho ti nama vaalu nipaya nandô-jû, ond omaaheey lawiingin nambe lambiing vakasin vu Yesu om lalingin yi nambe, “Mak lohvu nambe yaambiing hil anilakin nind vasa jak dôk busin sawaasin me malis?” ¹¹^cLe Yesu nêl vu sil nambe, “De ham ti-te bik sipsip ti duus sov dôk busin sawaasin, ond le biing naambe va? Yik le na daandiy jakanom. ¹²^dDe omaahonôn savok sipsip, om lohvu nambe yaambiing va nivasa dôk busin sawaasin.” ¹³Tombe nêl vu omaaho nama nipayaa-to nambe, “Otalo namam.” Om talo nama, tombe nama nivasa lak nambe sen nama vaaluu-to. ¹⁴^eLe ma de hil Palisai lala lasupin-ambe sil salo mopaatôv
in nambe lanyiis Yesu be jimb.

Anutu-te kul vaha Yesu

¹⁵^fYesu lak ni nambe davu salo mopaatôv in nambe lanyiis yi om havuuh taakuu-ju de la, tombe hil ngeeyaata taamuyin yi, tombe wiing hil anilakin pin nind vasa lak. ¹⁶^gTonde Yesu vu kôovu sil nambe me-daanêl yi langaah e, ¹⁷om Anutu-te vakasin sen Yesaia nêl langaah bôy-ato nôon ak nambe,

¹⁸^hⁱ“Ham angge sate kul vaha, saaholin yi lung la tombe sahengg having yi lôôt, be sa longg anivasa vu yi. Sale gatung sate Vavi Vaambuung jakana yi, tombe le naanêl sate vakasin keen vu hil vaalu sen sil-ame Yudaa-to le. ¹⁹Tonde me-le mahôh omaahonôn in vakasin e, de me-le napaak e, tonde hil-ame le gango lava vu talind e. ²⁰Omaahonôn vaalu lalohvu ganggwak sen daka kalêh-ambe neep hôk-ato, de sate kul vahaa-ju me-le kalêh na lôôt e. Tonde vaalu lalohvu lam sen naahen natum paya payaa-to de me-le naapuv e, yoo le mando

^a 12:7 Hos 6:6; Mat 9:13 ^b 12:10 Luk 14:3 ^c 12:11 Luk 14:5 ^d 12:12 Mat 10:31

^e 12:14 Jon 5:16 ^f 12:15 Mak 3:7-10 ^g 12:16 Mat 8:4; Mak 3:12 ^h 12:18 Mat 3:17

ⁱ 12:18-21 Ais 42:1-4

monambiing kul lôôt-ambe vakasin anivalok nôôn jak-ambe kaluuh va nipaya pin jung na le, ²¹ de hil vaalu sen sil-ame Yudaa-to ond le lambiing gaving haale be mongganggin yi.”

Lanêêl nambe Yesu nawiing kul lak Saalang-ate niwêêk
(Maak 3:20-30; Luk 11:14-23; 12:10)

²²^jTombe lako omaaho ti la vu Yesu ond omaahôô-ju mamu nipaya hôôvu tombe mekanu osin ka ma. Tombe Yesu wiing-ambe nivasa lak, tombe ka ma vakaas-ande me tum having. ²³Tombe hil ngeeyaataa-ju pin lavindis lôôt de lanêêl nambe, “Mak omaaho sen le naam vu danggakook Devit-ato ond yii-ju?” ²⁴^kLe Palisai-so lango tombe lanêêl nambe, “Mamu nipaya-te yêêv Belsebul vu niwêêk vu yi, ondeey natiy mamu dala in omaahonôôn.” ²⁵Lemu vakasin sen sil akand navuu-ju ond Yesu lak ni pin-ambe nêêl vu sil nambe, “Om naambe hil taaku bop ti yoo lanyis sil-ambe baasuh sil na lu yuuh, ond sil-ame lalohvu nambe mando nivasa le. De naambe hil bayêên bop ti me hil dangga ti sen dando hôôk bayêên timu yoo lanyis sil-ambe baasuh sil na lu yuuh, ond sil-ame le mando nivasa le. ²⁶De naambe Saalang gatiy yite kul vaha mamu nipaya-so ond sil o Saalang-aso yoo laasuh sil la lu yuuh, tombe sil e mando javuh ti naambe tana? Malis. ²⁷Ham nanêêl nambe Belsebul navu niwêêk vu sa be sa natiy mamu nipaya dala in omaahonôôn, ond lati navu niwêêk vu hamate hil vaalu be datiy mamu nipaya dala in omaahonôôn? Yik Anutu timu, om hamate hil-anju le daanêêl vu ham naambe ham oo nakaas paya. ²⁸^lOm sen Anutu-te Vavi Vaambuung hôôvu sa be sa natiy mamu nipaya dala in omaahonôôn, om ham anjak ni naambe Anutu laam nanggin yite hil hôôk ham lavuun gêên-anjo.

²⁹^m“Omaaho ti me-lohvu nambe jakana omaaho nipaya niwêêk ambaan-ambe bu vêêl yite va le. Biing naambêênjo ond naanduuh yi tatin e mem gako yinêên va pin sen lukando bayêên alôô-to be na.

³⁰ⁿ“Omaaho ti nambe same sate omaaho yi le ond nayis ngaamong vu sa, yik omaaho ti me-nasupin omaahonôôn having sa le, ond natiy sil-ambe davuuh taale. ³¹^oOm sa naanêêl vu ham naambe va nipaya osin vakasin palesin pin sen omaahonôôn danêêl-ato ond Anutu lohvu nambe kawiiy na pin, nganjo vakasin palesin sen danêêl lak Vavi Vaambuung-ato, ond Anutu me-le kawiiy na le. ³²Ti naanêêl vakasin anipaya jak Omaahonôôn Noow, ond Anutu le kawiiy yite nipayaa-ju na, le naambe ti naanêêl vakasin anipaya jak Vavi Vaambuung, ond Anutu me-le kawiiy yite nipayaa-ju na le, le nama vu gêên-anjo be vu busin taamusin gaving.”

^j 12:22 Mat 9:32-33 ^k 12:24 Mat 9:34; 10:25 ^l 12:28 Sin 10:38; 1Jon 3:8

^m 12:29 Ais 49:24; 1Jon 4:4 ⁿ 12:30 Mak 9:40; Luk 9:50 ^o 12:31 1Ti 1:13; Hiblu 6:4-6; 10:26

Haah anipaya nayiis nôôn anipaya
(Luk 6:43-45)

³³“Haah ti nivasa ond le nyiis nôôn anivasa, le haah anipaya lak ond le nyiis nôôn anipaya, in yiyi naahe hahaanôôn-ambe yalak ni nambe haah anivasa me nipaya. ³⁴“Nyêy noondin-aso ham, ham anipaya om ham alohvu nambe naanêêl vakasin anivasa naambe vaati? Malis. Va sen pup hôôk ham alompayo ond sen ham nanêêl laam langaah. ³⁵Omaaho nivasa ond ka navu va nivasa ngeeyaata naale hôôk lopayo ondeey nanêêl vakasin anivasa, de omaaho nipaya ond ka navu va nipaya ngeeyaata naale hôôk lopayo ondeey nanêêl vakasin anipaya. ³⁶Lemu sa naanêêl vu ham

naambe vakasin anindanjeen pin sen hil danêêl-ato, ond Anutu le jingin sil dôôk busin taamusin sen gangoyin omaahonôôn-ate vakasin-ato. ³⁷Olavam anivasa ond le taato naambe hong omaaho nivalok, le naambe olavam anipaya ond gale naatokak nipaya nyevahaan.”

Hil lanêêl nambe Yesu biing taahu taahu be lanjji
(Maak 8:11-12; Luk 11:29-32)

³⁸“Yesu nêêl lung la tonde tanasin dangga heey osin Palisai-so lanêêl vu nambe, “Kaputung, gambiing taahu taahu niwêêk-ate be hey aange mengg ak.” ³⁹“Le nêêl laah vu sil nambe, “Ham hil anipaya sen gêên-anjo, ond ham-ame awii-having e, ondeey ham awiingin nambe ham aange taahu taahu ti, lemu same le aambiing taahu taahu vu ham e, nganjo ham akam bu Yona-te taahu taahu mu. ⁴⁰“In bôôy Yona nando hôôk paahuung bopaata lopayo lohvu langaah yaal-ande busin yaal, tonde yik Omaahonôôn Noow e nanjip hôôk ngaanggis alopayo nohvu langaah yaal-ande busin yaal. ⁴¹“Om vu busin taamusin sen Anutu gangoyin omaahonôôn-ate vakasin-ato ond moow Ninive le baale be daanêêl vakasin jak ham sen gêên-anjo naambe hamate nipaya neep, in hil Ninive lango vakasin sen Yona nêêl-ato be lahilin londpayo. Nganjo sa sen sa nando naanêêl vakasin vu ham-anjo ond sa savok Yona la, le ham-ame nahilin ham alompayo le. ⁴²“Vu busin taamusin sen Anutu gangoyin omaahonôôn-ate vakasin-ato ond vêêh lulemak Seba le kandi baale be naanêêl vakasin jak ham sen gêên-anjo naambe hamate nipaya neep. In vêêh lulemak-anju vu taaku danggakook-ambe laam in nambe gango Solomon-ate vakasin nivasa osin ka, lemu sa sen gêên sa nandôô-jo ond sa savok Solomon la, le ma de ham-ame nangoyin sa lavangg e.”

^p 12:33 Mat 7:16-20 ^q 12:34 Mat 3:7; 15:18; 23:33; Luk 3:7 ^r 12:38 Mat 16:1;
 Luk 11:16; Jon 6:30; 1Ko 1:22 ^s 12:39 Mat 16:4 ^t 12:40 Jona 1:17 ^u 12:41 Jona 3:5
^v 12:42 Mat 12:6; 1King 10:1-10

Mamu nipaya lukalom baan
(*Luk 11:24-26*)

⁴³“Mamu nipaya nambe gato na in omaaho ti de yoo monana taaku lumbalaamb in naatovu taaku vuuti in nambe sawaah yi dôôk, le me-naatovu le, ⁴⁴ond le naanêêl naambe, ‘Mam sa naah sa baangg sen sa nando hôôk bôôy-ambe sa laam-ato.’ Tombe laah valup e yi de lasêêh bayêên-anju be lavunak lung la, le nando malis. ⁴⁵”Yi lung la tonde laah hako mamu namaavaalu be vindak yuuh sen silate nipaya savok yii-to, le mem lalom-ambe lulukala dando hôôk bayêên-anjuuto. Bôôy ond omaaho sen mamu nahôôvu-ju nando paya, lemu gêên le mando nipaya valok-ate lôôt. Tonde yik va nipaya ngeeyaata le naatovu ham hil anipaya sen gêên-anjo naambêênja.”

Yesu tangganaan osin halindin
(*Maak 3:31-35; Luk 8:19-21*)

⁴⁶”Yesu naahen nanêêl vakasin vu hil ngeeyaataa-ju tonde tangganaan osin halindin lato daale voon in nambe bakaas gaving yi, ⁴⁷tombe omaaho ti nêêl vu nambe, “Angge, tam having halim-aso be lato daale voon in nambe bakaas vu hong.” ⁴⁸Le Yesu nêêl laah vu omaaho tii-ju nambe, “Ataak lati? De halingg-aso laheey?” ⁴⁹Tonde taato yite maanggêem-aso lak nama de nêêl nambe, “Ham angge, ataak-aso halingg-aso sen manyinjo. ⁵⁰”In hil dawiiing va lohvu Mangg sen nando baandonii-to ka, ond mem sa halingg osin sa vangaangg-ambe sa ataak-aso sil.”

Vakasin pakwesin lak omaaho ti vaalôôh vave
(*Maak 4:1-9; Luk 8:4-8*)

13 ¹Hôôk busin-anju Yesu vu bayêên alo be hatu la voon, tombe la nando betum nanyendangga, ²le mem hil ngeeyaata lasupin lala vu yi om lakala nando kaanu ti, de hil pin daale lonak, ³tonde mem nêêl vakasin pakwesin ngeeyaata vu sil. Nêêl ti nambe, “Ham gango, omaaho ti la in nambe baalil yite vave dukana kul moos. ⁴Monaalil atombe vaalu tok nando mop, tombe manak lalaam-ambe laya lôôt. ⁵De vaalu tok lakando ngaanggis pasivdaka sen lakando tatuuh baandonii-to, tombe sen ngaanggis pasivdaka muu-to om me valup pavis, ⁶lemu taaku vavak ak-ambe malan pavis, tombe bambôôv valok-ate, in kangga me-lukala le. ⁷De vaalu lokala ganggwak dangga tombe ganggwak valup having be yêês, om me-yiis nôôn e. ⁸Tonde vaalu lokala ngaanggis anivasa ond valup-ambe yiis nôôn. Heey yiis nôôn doo-namaavaalu, de heey yiis nôôn doo-yaal, de heey yiis doo-ti be nomaayuu. ⁹Ke, omaaho ti nambe nanye neep ond gangoyin.”

” 12:45 2Pi 2:20 * 12:46 Mat 13:55 † 12:50 Jon 15:14; Lom 8:29 ‡ 13:2 Luk 5:1-3

Maanggêem-aso lalingin Yesu in vakasin pakwesin dangga
(Maak 4:10-12; Luk 8:9-10)

¹⁰Tombe maanggêem-aso lala lalingin Yesu nambe, “Nambe vaati sen onanêêl vakasin pakwesin vu sil?” ¹¹^aLe nêêl laah vu sil nambe, “Ham ond mem Anutu nanêêl vakasin sen vun yii-to langaah vu ham lak sen Anutu nanggin yiyi-ato, le me-nanêêl langaah vu hil-anju le. ¹²^bNaambe omaaho ti ka navu vakasin nivasa, ond Anutu le bu ka vaalu gaving-ambe jak ni lôôt. Le naambe omaaho ti doosin vakasin, de me-ka navu vakasin ti le, ond kakook daka sen neep vu yii-to ond Anutu le nôôh vêêl. ¹³^cSa naanêêl vakasin pakwesin vu sil-anju in dangga nambe sil dayi va lemu me-dalak ni le, de nanyend nango taaku lemu me-dango be datokak dangga le. ¹⁴^dOm Anutu-te vakasin sen Yesaia nêêl langaah bôôy-ato nôôn ak lak sil nambe,

‘Ham e gango lôôt, lemu ham-ame le naatokak dangga le. Ham e angge lôôt, le ham-ame le anjak ni le. ¹⁵In hil-anju londpayo niwêêk ak osin nanyend doos ak, de sil amend yip in nind baya nambe me-lanji va jak mend e, de me-gango vakasin e, de kand-ame bu vakasin danggakook e, de sil-ame langgilin londpayo nom vu sa in nambe saambiing-ambe nind vasa jak e.’

¹⁶^e“Nganjo ham ond ham akam vasa in ham amem nayi va, de ham nanyem nango vakasin. ¹⁷Sa naanêêl keen vu ham naambe bôôy hil sen danêêl Anutu-te vakasin langaah osin hil anivalok ngeeyaata datung mend in nambe lanji va sen ham nahêê-jo, le ma de me-layi le, de dambe nanyend in nambe gango vakasin sen ham nangô-jo, le ma de me-lango le.”

Yesu tatekin vakasin pakwesin lak vavêê-to
(Maak 4:13-20; Luk 8:11-15)

¹⁸“Om ham gango vakasin pakwesin danggakook jak omaaho sen vaalil vavêê-to le. ¹⁹Hil pin sen dango vakasin nambe Anutu nanggin yite hil-ato le me-datokak dangga le, ond sil lalohvu vave sen tok nando mop-ato, tonde Omaaho Nipaya la navu sapos vakasin sen Anutu vaalôôh lokala sil alondpayôô-to. ²⁰Tonde vave vaalu sen tok lakando ngaanggis daka lakando tatuuh baandonii-to ond lohvu hil sen dangoyin vakasin-ambe dako lak pavis-ambe dapêêlis, ²¹lemu lalohvu va sen kangga me-lukala le, om dando daka vêêl e mem va nimeen natokak sil, me omaaheey dawiiing nindanjeen vu sil in davu sapa Anutu-te vakasin, tombe sim nind baya be davuuh Anutu la pavis. ²²^fDe vave vaalu tok lokala ganggwak danggaa-to ond lohvu hil sen dango Anutu-te vakasin,

^a 13:11 1Ko 4:1 ^b 13:12 Mat 25:29; Mak 4:25; Luk 8:18; 19:26

^c 13:13 Diu 29:4 ^d 13:14-15 Ais 6:9-10; Jon 12:40; Sin 28:26-27 ^e 13:16 Luk 10:23-24

^f 13:22 Mat 6:19-34; Luk 12:16-21; 1Ti 6:9-10,17

lemu sil alondpayo nimeen in kand navu va voon-ate osin mend nôôn in kupak ayuuh mone bop, tombe sil akand oo navu va nambêênjo natu bopaata nahilin Anutu-te vakasin, om me-le nôôn jak vu sil e. ²³Tonde vave vaalu sentok lukala ngaanggis anivasaa-to ond lohvu hil vaalu sen dango vakasin-ambe dawii-having tombe dayiis nôôn lohvu vave nayiis nôôn-ato. Vaalu dayiis nôôn ngeeyaata lôôt lohvu vave vaalu nayiis nôôn 100, de vaalu dayiis nôôn ngeey daka lohvu vave vaalu nayiis nôôn 60, de vaalu dayiis pasivdaka lohvu vave vaalu nayiis nôôn 30.”

Vakasin pakwesin lak taavêêt anipaya valup hôôk kul

²⁴Yesu nêêl vakasin pakwesin ango having vu sil nambe, “Anutu nanggin yite hil ond lohvu omaaho ti vaalil vave nivasa hôôk yite kul, ²⁵tombe hil deep busin-ande omaaho sen nayi yi payaa-to valup-ambe vaalil taavêêt anipaya nôôn yêês vave nivasa baandoni de lom-ambe la. ²⁶Tombe vanôôn nôôn ak lôôt-ambe wiingin nambe nyiis nôôn, le sim layi taavêêt anipaya valup having, ²⁷tombe yite kul vaha-so lala vu kul mangganaan-ambe lanêêl vu nambe, ‘Himbop, ovaalil vave nivasa hôôk gate kul, tonde taavêêt sen valup hôôk-anju vu tana?’ ²⁸Tombe nêêl vu sil nambe, ‘Omaaho sen nayi sa payaa-to wiing vaa-ja.’ Tombe kul vaha-so lalingin yi nambe, ‘Om hey ana bapuu taavêêt-anju na?’ ²⁹Le nêêl vu sil nambe, ‘Ôôye, ham e bapuu atombe ham bapuu vanôôn gaving, ³⁰om ham baale de yuuh ahosin balup-ambe lanjak hôôk ti, de busin sen hil daasupin vanôôn e mem. Sale naanêêl vu hil sen daasupin vanôôn-ato naambe sil bapuu taavêêt anipaya naamunggin-ambe lambaav, le mem daasupin vanôôn nôôn jakana sate bayêên vanôôn-ate.’ ”

Vakasin pakwesin lak môônd nôôvoow osin yis (*Maak 4:30-32; Luk 13:18-21*)

³¹Tonde Yesu nêêl vakasin pakwesin ango vu sil nambe, “Anutu nanggin yite hil-ato ond lohvu môônd nôôvoow sen tok-ambe valup, tombe omaaho ti hako be la vaalôôh-ato. ³²Môônd nôôvoow-anju nipasiv lôôt, de me-bop nambe haah vaalu nôôn e, lemu taamusin valup-ambe kaluuh haah pasi-pasiv pin la de tu haah bopaata lak, tombe manak dahaav vunis-ambe dando lak nama.”

³³Tonde yik nêêl vakasin pakwesin ango vu sil nambe, “Anutu nanggin yite hil-ato ond lohvu va sen datung lukala balet-ambe nalinj-ato, danêêl nambe yis. Ond vêêh ti hako yis-anju be monanggingg having balet hôôk kaambum bopaata, tombe yis la hanggwang balet alopayo lôôt atombe linj.”

Yesu nêêl vakasin pakwesin ngeeyaata
(Maak 4:33-34)

³⁴ Yesu nêêl vakasin pakwesin pin-anju ond me-nêêl ti langaah e, yik yoo nêêl tu vakasin pakwesin amu vu hil alu bopaataa-ju, ³⁵ ^hom Anutu-te vakasin sen omaaho ti nêêl langaah bôôy-ato nôôn ak nambe,

“Sale naanêêl vakasin naatu vakasin pakwesin
vu sil, de vakasin heey neep vunin vu bôôy sen
Anutu hatung ngaanggis osin yendak-ato be tok
laam gêên-anjo ond sale naanêêl langaah.”

Yesu tatekin vakasin pakwesin lak taavêêt anipaya

³⁶ Yesu nêêl lung la tonde havuuh hil ngeeyaataa-ju de lukala bayêên alo, tombe yite maanggêêm-aso lala vu yi be lanêêl nambe, “Otatekin vakasin pakwesin lak taavêêt anipaya sen valup hôôk kul-ato dangga vu hey e.” ³⁷ Tombe Yesu nêêl laah vu sil nambe, “Omaaho ti vaalil vave nivasa ond Omaahonôôn Noow, ³⁸ ⁱde kul ond taaku voon-anjo pin, de vave nivasa ond hil sen latu Anutu-te hil-ato, de taavêêt anipaya ond Omaaho Nipaya Saalang-ate hil. ³⁹ De omaaho sen vaalil taavêêt anipayaa-to ond Saalang, de busin sen daasupin nôôn ond lohvu busin taamusin lôôt. De hil sen daasupin vanôôn-ato ond angela-so, ⁴⁰ ^jtonde sil bapuuu taavêêt anipaya be lambaav jak kin ond le lambiing naambêênju vu busin taamusin. ⁴¹ ^kOmaahonôôn Noow e biing yite angela-so lana bapuuu hil anipaya pin sen davu palapin hil-ato, osin bapuuu hil kalêês in ambu-so pin vu Anutu-te hil lavuun, ⁴² ^ltombe gaate sil jakana kin bopaata. Hôôk kin-anju ond le daasu bopaata, de navund monaangitak. ⁴³ ^mTombe hôôk busin-anju ond hil anivalok e daatêêlang naambe taaku mêê-to dôôk Maandin Anutu-te taaku. Omaaho ti nambe nanye neep ond gango.”

Vakasin pakwesin lak omaaho tovu va nivasa hôôk ngaanggis

⁴⁴ ⁿ“Anutu nanggin yite hil-ato ond lohvu kupak anivasa sen omaaho ti vun lukala ngaanggis-ambe nando de yimb, tombe taamusin atombe omaaho ango tokak-ambe wiingin, om kambu yesin laah, de la osin ka vasa lôôt, tomem la vu yinêên va pin-ambe hil laanggo, tombe hako monêê-ju be la vaanggo ngaanggis boow tii-ju sen kupak lukando hôôk-ato lak.”

^h 13:35 Saam 78:2 ⁱ 13:38 1Ko 3:9; 1Jon 3:10 ^j 13:40 Mat 7:19; Jon 15:6

^k 13:41 Mat 24:31; 25:31-46; Mak 13:27 ^l 13:42 Mat 8:12 ^m 13:43 Dan 12:3

ⁿ 13:44 Mat 19:29; Luk 14:33; Pil 3:7

Vakasin pakwesin lak vaali nivasa

⁴⁵“Ti having nambe Anutu nanggin yite hil-ato ond lohvu omaaho ti navu taahuun va, ond navu salo vaali nivasa vasa, ⁴⁶tombe yi vaali ti nivasa lôôt om vu yinêen va pin-ambe hil laanggo, de hako monêê-ju be la vaanggo vaali nivasaa-ju lak.”

Vakasin pakwesin lak govak

⁴⁷“Tonde yik ti having nambe Anutu nanggin yite hil-ato ond lohvu govak sen daate lokala bel-ambe paahuung vaha vaha nalokalaa-to, ⁴⁸be pup govak la le mem sil laandiyi lakalaam lonak, tombe sil dando be laholin paahuung anivasa vasa lokala kaambum, de nipaya ond laate la. ⁴⁹Vu busin taamusin lôôt ond le naambêênja. Angela-so le lanaam-ambe langgolin hil anipaya dôôk hil anivasa lavuun, ⁵⁰tombe gaate sil jêê-na kin bopaata, tombe le daasu be le janga navund.”

Vakasin pakwesin lak omaaho ti-te va nivasa moos osin bôôy

⁵¹Tonde Yesu lingin sil nambe, “Vakasin pin-anjo ond ham alak ni?” Tombe lalinggis nambe, “Êê-e.” ⁵²Tombe nêêl vu sil nambe, “Hil tanasin dangga-so pin sen kand navu Anutu-te tanasin bôôy osin sil lango sate vakasin lak Anutu nanggin yite hil-ato having-ambe lako lak, ond sil lalohvu bayêên mangganaan lokala yite bayêên alo kupak-atêeto be hako yite va moos osin va nimbôôy hôôk ti be lukalom.”

Hil Nasalet daluuh damind vu Yesu

(Maak 6:1-6; Luk 4:16-30)

⁵³“Yesu nêêl vakasin pakwesin-anju lung la tonde kandi vuu-ju be la. ⁵⁴Tok la baan atombe huli-la dumb alo be wiing tanasin vu hil, tombe lavindis lôôt-ande lanêêl nambe, “Omaahôô-ju hako lukook bopaataa-ju osin nawiang taahu taahu osin niwêêk-anju vu tana? ⁵⁵“Omaahôô-ju mak kaamunda noow, tangganaan Malia, de halindin Yaakop ayuuh Yusep de Simon ayuuh Yudas, ⁵⁶de vangaandin pin sen dando having yiyi-anjo, om hako va pin-anju vu tana?” ⁵⁷“Tombe sil ahend kalin vu yi. Tombe Yesu nêêl vu sil nambe, “Omaaho ti nanêêl Anutu-te vakasin langaah ond hil dako omaahôô-ju haale lak lohvu taaku pin, lemu hil vu yite baan dangga dosin osin hil sen sil dangga timuu-to ond sil-ame dako yi

lak e.” ⁵⁸Tombe Yesu me-wiing taahu taahu osin niwêêk ngeeyaata vu taakuu-ju le, in hil-ame lawii-having yi le.

° 13:47 Mat 22:9-10 P 13:50 Mat 13:42; Luk 13:28 ° 13:53 Mat 7:28 ° 13:54 Jon 7:15

* 13:55 Luk 3:23; Jon 6:42 ° 13:57 Jon 4:44

Jon sen nalipis hil-ato yimb
(*Maak 6:14-29; Luk 3:19-20; 9:7-9*)

14 ¹Hôôk busin-anju tombe omaaho lulemak Helot hangoyin Yesu banye, ²tombe nêêl vu yite hil kul vaha-so nambe, “Omaahôô-ju mak Jon sen nalipis hil-ato, kandi lak vu hil yimbin-ate ondeey nawiing taahu taahu osin niwêêk.” ³“In Helot-anju bôôy lôôh Jon-ambe duuh, de hatung hôôk kalaambus, in dangga nambe Helot hali Pilip ond Helot lakin vane Helodias, ⁴“le Jon nêêl Helot nambe, “Ohako vêêh-anja me-lohvu le.” ⁵“Tombe Helot wiingin nambe nyiis Jon-ambe jimb, lemu yêênin hil ngeeyaata in layi Jon nambe omaaho sen nanêêl Anutu-te vakasin langaah-ato. ⁶Tonde busin ti Helot aka vu yite busin sen tangganaan hako yii-to om wiing vanôôn bop-ambe teey yite omaaheey lalaam, tombe Helodias nowaavêêh monakôômb hôôk sil lavuun, tombe Helot yi be ahe nivasa lôôt, ⁷om nêêl vu vêêh-anju nambe, “Onaanêêl naambe saambu vati vu hong, ond sale aambu vu hong keen baandoni.” ⁸Tombe vêêh-anju tangganaan nêêl hôôk nowaavêêh ahe, om nowaavêêh nêêl vu Helot nambe, “Okatôôv Jon sen nalipis hil-ato lukook-ambe onggatung hôôk kaambum ti be gambu naam vu sa.”

⁹Nêêl nambêênju tombe omaaho lulemak lopayo nimeen, le ma de ka vu sen nêêl lak baandonii-to osin hil ngeeyaata dando having yii-to, om nêêl nambe lambu vu yi. ¹⁰“Tombe wiing omaaho ti la lukala kalaambus alopayo be katôôv Jon aka, ¹¹tombe hatung lukook hôôk kaambum ti be hako be laah vu vu vahaavuu-ju, le mem hako la vu tangganaan. ¹²Tonde Jon-ate maanggêêm-aso lala lako Jon aninaavi be lala lahaav, de lalaah lanêêl banye vu Yesu.

Yesu vaat hil ngeeyaata lôôt lohvu 5 taosen
(*Maak 6:31-44; Luk 9:10-17; Jon 6:1-13*)

¹³Yesu hangoyin Jon yimb-ato banye, tombe havuuh taaku de lakala kaanu be la in nambe yoo na

mando taaku lundoos ti, le ma de hil ngeeyaata vu taaku bo-bop lango nambe Yesu la, om latup voon-ambe lala taamuyin yi. ¹⁴“Yesu lakala lonak, le yi de hil ngeeyaata dando, tombe ka pasiv in sil-ambe wiing silate hil anilakin nind vasa lak.

¹⁵Tonde soosin hôôk atombe yite maanggêêm-aso lala lanêêl vu nambe, “Taaku lung la de taakuu-jo lumbalaamb, om gambiing-ambe hil-anju lana bayêên ti ti in sil baanggo silate vanôôn in sil lanja.” ¹⁶Le ma de Yesu

“ 14:3 Mat 11:2 14:4 Lev 18:16; 20:21 14:5 Mat 21:26 14:10 Mat 17:12

14:14 Mat 9:36

nêêl vu maanggêêm-aso nambe, “Me-lana le, yik ham oo ambu vanôôn vu sil.” ¹⁷Tombe sil lanêêl vu nambe, “Heyanêengg vanôôn ma, yik balet namaavaalu having paahuung yuuh amu neep.” ¹⁸Om nêêl vu sil nambe, “Om ham gako naam vu sa le.” ¹⁹Tonde nêêl-ambe hil ngeeyaataa-ju lato dando voon, tombe hako balet namaavaalu de paahuung yuuh-anju, tonde mem valaah me lak baandoni de lohak, le mem hapok balet be vu vu yite maanggêêm-aso be sil latiiy lohvu hil, ²⁰“tombe sil pin laya lôôt-ambe lohvu sil. Laya lung atonde sil lasupin nyengale hôôk jaambang nomaayuuu-ambe laam yuuh-ambe pup la. ²¹Hil sen laya vanôôn-ato ond moow ngeeyaata lôôt lohvu 5 taosen, de vêêh ayuuh unoopasiv ond me-lasevin e.

Yesu naale lak bel baandoni be la
(Maak 6:45-52; Jon 6:15-21)

²²Lung atonde Yesu haanjiihin yite maanggêêm-aso nambe lanjak kaanu be daamunggin-ambe lana betum vaalu, de yoo mando be biing hil lana le. ²³^bTombe wiing hil lala de yoo ti lak kandu be la nando monalohak nandôô-ju, tombe yoo timu nando be taaku bus la. ²⁴Tonde kaanu la lavuun lôôt-ande vavi laam niwêêk neep kaanu nalu be bel yiis ak kaanu lôôt. ²⁵Tonde hôôk heendiisin atombe Yesu naale nala lak bel baandoni be la vu sil. ²⁶“Tombe yite maanggêêm-aso layi de naale lak bel baandoni be nalaam vu sil, tombe kanund la lôôt, om lanêêl nambe, “Ham hil, peey mamu ti.” Tombe layêênin-ambe langeeyak lôôt. ²⁷Tombe Yesu nêêl la vu sil pavis nambe, “Ham naham aniwêêk, yik saa-jo, om ham-ame anjêênin e.” ²⁸Tombe Pita nêêl laah vu nambe, “Omaaho Bop, hong-anja ond onaanêêl-ambe sa jambaale bel baandoni be sa naas vu hong.” ²⁹^dTombe Yesu nêêl nambe, “Hong-o.” Tombe Pita luus vu kaanu be naale lak betum alis baandoni be la vu Yesu, ³⁰le sim yi bel yiis bopaata, tombe yêênin-ande wiingin nambe davin na betum, om teey nambe, “Omaaho Bop, ganôôh sa jak.” ³¹^eTonde Yesu nama la pavis-ambe lôôh Pita de nêêl vu nambe, “Game gawii-having niwêêk e. Nambe vaati sen gakam yu-yuuh?” ³²^fTombe yuuh lalakalaah kaanu tonde vavi tôômin. ³³^gTombe sil sen lalakando kaanuu-to lako Yesu haale lak nambe, “Hong Anutu Noow keen.”

Yesu wiing hil anilakin nind vasa lak vu Genesaalet
(Maak 6:53-56)

³⁴Sil latok lala betum vaalu vu taaku Genesaalet,

^z 14:19 Mat 15:35-39; Mak 8:6-10 ^a 14:20 2King 4:44 ^b 14:23 Luk 6:12;

9:28 ^c 14:26 Luk 24:37 ^d 14:29 Jon 21:7 ^e 14:31 Mat 8:26 ^f 14:32 Mak 4:39

^g 14:33 Mat 27:54; Jon 1:49

³⁵ tombe hil vu taakuu-ju lalak Yesu ni, om sil lanêêl vakasin la lohvu taakuu-ju pin, om lako hil anilakin pin lalaam vu yi. ³⁶ ^hTombe sil kataangg yi nambe hil anilakin gambe namand jak yite lolop anyendaambu mu, tombe mem hil sen lambe namand ak-ato ond nind vasa lak pin.

Anutu-te tanasin savok himbop bôôy-ate tanasin
(Maak 7:1-13)

15 ¹Tombe Palisai osin tanasin dangga heey vu Yelusalem-ambe lala vu Yesu be lalingin nambe, ² ⁱ“Nambe vaati sen gate maanggêem-aso davu kalêêh himbop bôôy-ate tanasin om daya vanôôn danjeen-ande me-dalipis namand e.” ³Le Yesu nêêl laah vu sil nambe, “De nambe vaati sen ham navu kalêêh Anutute tanasin, de ham oo navu taamuyin himbop bôôy-ate tanasin? ⁴ ^kIn Anutu nêêl nambe, ‘Onggako mom ayuuh tam jak.’ De nêêl vakasin ango having nambe, ‘Omaaho ti naanêêl vakasin anipaya jak mangganaan me tangganaan ond hil lanyiis-ambe jimb.’ ⁵Nganjo ham ond ham nanêêl nambe omaaho ti naanêêl vu mangganaan me tangganaan naambe bu va na in dôôvu yuuh, le nêêl Anutu haale lak lung la, ⁶ond ham nanêêl nambe lung-ande omaahôô-ju me-dôôvu mangganaan ayuuh tangganaan e. Om nambêênja ham oo kawiiy Anutu-te vakasin lak himbop bôôy-ate tanasin-ambe natu va malis amu. ⁷Ham hil tatuhin ambu-so, Yesaia nêêl Anutu-te vakasin lak ham bôôy-ato ond yoo nêêl lohvu. In nêêl nambe,

⁸ ^l“Hil-anjo dako sa haalengg ak avind malis amu, de londpayo nando diin in sa. ⁹Dalohak malis amu vu sa, tonde davu taahu hil hôôk omaahonôôn oote tanasin nambe sate tanasin keen.’ ”

Va sen nawiing omaahonôôn anipaya nalak-ato
(Maak 7:14-23)

¹⁰Tonde Yesu teey hil ngeeyaataa-ju lala vu yi be nêêl vu sil nambe, “Ham gango vakasin-anjo be ham anjak ni vanuh. ¹¹ ^mVanôôn pin sen nalukala omaahonôôn avind ond me-nawiing-ambe Anutu nayi

^h 14:36 Mat 9:20-21; Mak 5:27-28; Luk 8:44 ⁱ 15:2 Luk 11:38 ^j Matai 15:2 Hil Palisai osin hil Yuda pin yoo davu sapa bundin bôôy-ate gambum, om me-kand navu va ningook keen e, nganjo kand navu vakasin lak hil vaalu sen sil-ame Yudaa-to. Naambe hil Yuda lana mop me lana maaket-ambe namand nôôh va sen hil vaalu datung-ato, ond kand navu nambe hil vaaluu-juuto silate nipaya lakala sil. Om lanom balup bayêên atombe lanjipis sil namand vêêl e mem lanja vanôôn, in kand navu nambe lanja vanôôn danjeen ond hil vaalu sen sil-ame Yudaa-to silate nipaya le dukana sil alondpayo. ^k 15:4 Eks 20:12; 21:17; Diu 5:16 ^l 15:8-9 Ais 29:13 ^m 15:11 Mat 12:34

omaahonôôn nambe nipaya le. Nganjo va pin sen kand navu be danêêl langaah-ato ond mem nawiing-ambe Anutu nayi omaahonôôn nambe nipaya.”

¹²Tombe yite maanggêêm-aso lala lanêêl vu nambe, “Palisai-so lango vakasin-anja be ahend kalin, mak galak ni?” ¹³Le Yesu nêêl laah vu sil nambe, “Va pin sen Aamangg vu baandoni me-vaalôôh e, ond le bapuuu ha osin kangga. ¹⁴Ham baale de sil oote va, sil amend kanu, le lawiingin nambe taato mopaatôôv vu hil amekanu vaalu, de mekanu ti nambe daandiiy mekanu ango be yuuu lana mopaatôôv ond yuuu ahondoos e landupake.” ¹⁵Tombe Pita nêêl vu Yesu nambe, “Otakekin vakasin pakwesin-anjo dangga vu hey e.” ¹⁶Om Yesu nêêl vu sil nambe, “De ham-anjo, ham-ame alak ni le? ¹⁷Mak ham-ame alak ni le, nambe vanôôn pin sen nalukala omaahonôôn avind ond nalukala sil ahend-ambe hato nala be nalukala lôôvin, ¹⁸lemu va pin sen naale hôôk hil alondpayo be danêêl langaah-ato ond mem nawiing-ambe Anutu nayi omaahonôôn nambe nipaya. ¹⁹In va sen vu omaahonôôn alondpayo be nalaam-ato ond kand navu va nipaya osin dayiis omaahonôôn dayimb, de omaaho ango hôôndak ango vane, de vêêh ango hôôndak ango laya, osin vahaavu yuuu maanggêêm dawiing baayamb, de dahôôndak va, osin davu tatuhin vakasin malis vu omaaho ango, de danêêl vakasin palesin. ²⁰Va pin-anja nawiing-ambe Anutu nayi omaahonôôn nambe nipaya, nganjo daya vanôôn-ande me-dalipis namand e, ond vaa-ju me-nawiing-ambe Anutu nayi omaahonôôn nambe nipaya le.”

Vêêh Kanaan ti wii-having Yesu keen
(Maak 7:24-30)

²¹Yesu-so lavuuh taakuu-ju de lala taaku sen Taia yuuu Saidon neep-ato, ²²tombe vêêh Kanaan ti vu taakuu-ju laam-ambe teey nambe, “Omaaho Bop, hong sen gate danggakook neep vu Devit-ato, gakam pasiv in sa le. Mamu nipaya nahôôvu sa nonggaavêêh lôôt.” ²³Le Yesu me-nêêl vakasin ti laah vu le, tombe yite maanggêêm-aso lala kataangg Yesu nambe, “Vêêh-anju monateey-ambe navu sapa yiyi lôôt, om onaanêêl-ambe naah e.” ²⁴Tombe Yesu nêêl laah nambe, “Aamangg wiing-ambe sa laam in saandôôvu hil Islél amu sen sil lalohvu sipsip-ambe dala mend namaa-to.” ²⁵Le vêêh-anju laam-ambe hatung kaatu vu Yesu de nêêl nambe, “Omaaho Bop, gandôôvu sa.” ²⁶Tombe Yesu nêêl laah vu nambe, “Me-lohvu nambe omaaho ti gako unoopasiv-ate vanôôn-ambe gaate na vu voow e.” ²⁷Le vêêh-anju nêêl

ⁿ 15:13 Jon 15:2 ^o 15:14 Mat 23:16,24; Luk 6:39; Lom 2:19 ^p 15:18 Mat 12:34

^q 15:19 Jen 8:21; Gal 5:19-21 ^r 15:24 Mat 10:6 ^s Matai 15:26 Hil Yuda lanêêl hil vaalu sen sil-ame Yuda-a-to nambe sil lalohvu voow, om Yesu nêêl vakasin pakwesin lak unoopasiv osin voow-anju, ond unoopasiv lohvu hil Yuda, de voow lohvu hil vaalu sen sil-ame Yuda-a-to le.

nambe, “Êê-e Omaaho Bop, manyinja ganêel keen, lemu vanôon paapu sen natok hôok heendin-ate pêet ahendanggaa-to ond voow daya.” ²⁸Tombe Yesu nêel laah vu nambe, “Gawii-having niwêêk om gate vakasin navu nôôn jak nohvu gawii-having-anja.” Tombe yik vêêh-anju nowaavêêh anivasa lak pavis hôok taaku me tii-ju vulotin.

Yesu wiing hil anilakin ngeeyaata nind vasa lak

²⁹“Tonde Yesu havuuh taaku-ju de loh betum Galili nanyendangga be la, tombe lak kandu ti be la nando. ³⁰Tombe hil ngeeyaata lala vu yi be lako hil vahand anipaya osin hil amend kanu, de hil sen kook nawiiing payaa-to, osin hil akand ma, tonde hil anilakin ngeeyaata having be lala vu yi, tombe lambe sil deep hôok Yesu vaha be wiing-ambe sil anind vasa lak. ³¹Tombe hil layi kama-so lakaas osin hil sen kook wiing payaa-to nind vasa lak, de vahand paaya lala mop, osin mekanu-so layi taaku, om lavindis lôôt-ande lako Islel-ate Anutu haale lak.

Yesu vaat hil ngeeyaata lôôt lohvu 4 taosen (Maak 8:1-10)

³²“Yesu teey yite maanggêem-aso lala vu yi be nêel vu sil nambe, “Sa kangg pasiv in hil ngeeyaataa-jo in dando busin yaal having sa, de silanêend vanôon sen lanjaa-to ma, de sa nimbaya nambe same aambiing-ambe lana meep e, in le lana sakend nama jak vu mop lavuun.” ³³Tombe maanggêem-aso lanêel vu nambe, “Yiyi nando taaku lumbalaamb-anjo om yale gako vanôon vu tana be yambaat hil ngeeyaataa-jo?” ³⁴Tombe Yesu lingin sil nambe, “Hamate vanôon nôôn vaaheey naahen nando?” Le lanêel vu nambe, “Balet namaavaalu be vindak yuuh, de paahuung daka yuuh.” ³⁵Tombe mem nêel-ambe hil lato dando voon, ³⁶de hako balet namaavaalu be vindak yuuh having paahuung-anju be lohak osin pêêlis la vu Anutu, de hapok-ambe vu vu yite maanggêem-aso, le mem maanggêem-aso latiiy lohvu hil. ³⁷Tombe sil pin laya be lohvu sil, de lasupin nyengale hôok jaambang namaavaalu be vindak yuuh-ambe pup la. ³⁸Hil sen laya vanôon-anju ond moow ngeeyaata lôôt lohvu 4 taosen, tonde vêêh ayuuh unoopasiv ond me-lasevin e. ³⁹Lung laa tonde wiing-ambe sil lala, le mem lakala kaanu be la taaku Magadan.

Palisai tambe Yesu in nambe biing taahu taahu osin niwêêk (Maak 8:11-13; Luk 12:54-56)

16 ¹Tombe Palisai osin Sadusi-so lala vu Yesu in nambe sahi yi, om lanêel nambe biing taahu taahu jak va niwêêk baandoni-te be lanj. ²Le nêel laah vu

¹ 15:28 Mat 8:10,13 ^u 15:29 Mak 7:31 ^v 15:31 Mak 7:37 ^w 15:32-33 Mat 14:14-15

^x 16:1 Mat 12:38; Luk 11:16; Jon 6:30

sil nambe, “Ham nahe hôôk soosin nambe taaku suuh ahemasangin ond ham nanêêl nambe, ‘Taaku navu galevang.’ ³Tonde samiinaanôn ham nahe nambe taaku tumak le kakuup hilin, ond ham nanêêl nambe, ‘Om peey e luk osin vavi.’ Ke, ham navu sahi lak va baandoni nambêênja be lohvu, lemu va sen Anutu nawiing taahu taahu osin niwêêk hôôk ham amem ond ham-ame alohvu nambe anjak ni le, ham doosin. ⁴Ham hil anipaya sen gêên-anjo, ham-ame awii-having Anutu le, ondeey ham awiingin nambe ham angge taahu taahu ti, lemu same le aambiing taahu taahu ti vu ham e, nganjo ham akam bu Yona sen nanêêl Anutu-te vakasin langaah bôôy-ato yite taahu taahu mu.” Lung laa tonde Yesu havuuh sil-ande la.

**Hil Palisai osin Sadusi-te tanasin lohvu yis sen nalukala
balet-ambe nalinj-ato
(Maak 8:14-21)**

⁵Yesu having yite maanggêêm-aso be lalakala kaanu be lala betum vaalu, lemu sil akand lingin vanôn-ande me-lako having e, ⁶Tombe Yesu nêêl vu sil nambe, “Ham gango, ham ganggin ham nivasa in Palisai osin Sadusi-te yis balet-ate.” ⁷Tombe sil oo mondanêêl vu sil nambe, “Yame hako balet e, ondeey nêêl nambêênju.” ⁸Le Yesu lak ni om nêêl nambe, “Ham-ame awii-having niwêêk e. Nambe vaati sen ham oo vakaas danjeen vu ham nambe, ‘Yame hako balet e.’ ⁹“Ham akam-ame neep e? Ham akam-ame navu balet namaavaalu sen saavu vu hil ngeeyaata lôôt lohvu ⁵taosen-ambe layaa-to, ond ham asupin nyengale hôôk jaambang vilis? ¹⁰^bDe ham akam-ame navu balet namaavaalu be vindak yuuh sen hil ngeeyaata lôôt lohvu ⁴taosen layaa-to, ond ham asupin nyengale hôôk jaambang vilis? ¹¹Nambe vaati sen ham-ame alak ni le nambe same naanêêl vanôn vu ham e? Nganjo ham ganggin ham in Palisai osin Sadusi-te yis.” ¹²Tombe mem sil lalak ni nambe me-nêêl in nambe sil ganggin sil in yis balet-ate le, nganjo nêêl in nambe sil ganggin sil in hil Palisai osin Sadusi-te tanasin.

**Pita nêêl langaah nambe Yesu yi Kalisi
(Maak 8:27-30; Luk 9:18-21)**

¹³Yesu-so lala taaku Sisalia Pilipai le mem Yesu lingin yite maanggêêm-aso nambe, “Hil danêêl Omaahonôn Noow nambe yi lati?” ¹⁴Tombe lanêêl nambe, “Hil vaalu danêêl nambe hong Jon sen nalipis hil-ato, de vaalu danêêl nambe Eliya, de vaalu danêêl nambe Yelemia me hil sen danêêl Anutu-te vakasin langaah-ato ti.” ¹⁵Tonde Yesu lingin sil nambe,

^y 16:4 Mat 12:39; Luk 11:29 ^z 16:6 Luk 12:1 ^a 16:9 Mat 14:17-21 ^b 16:10 Mat 15:34-38

^c 16:14 Mat 14:1-2; Mak 6:14-15; Luk 9:7-8

“De ham-ok? Ham nanêl sa nambe lati?” ¹⁶ ^dTombe Simon Pita nêl laah vu nambe, “Hong omaaho sen Anutu yoo holin hong vulôot in nambe gandôvu hey-ato, ond Anutu metumin Noow hong.” ¹⁷ ^eTombe Yesu nêl laah vu nambe, “Yona noow Simon, gakam vasa, in hil vu voon-anjo ti me-nêl vakasin-anjo vu hong e, nganjo Aamangg sen nando baandonii-to yoo taato vu hong. ¹⁸ ^fDe sa naanêl hong naambe Pita, haale Pita dangga nambe tatuuh. Sale balaah sate hil landukana baale tatuuh-anjo, de taaku nipaya yite niwêêk-ame lohvu nambe kape sil e. ¹⁹ ^gDe taaku sen hil dalukala be Anutu nanggin sil-ato, ond sale aambu yite kiiy vu hong, tombe va sen onaapuvu hôon vu voon ond Anutu le naapuvu hôon vu baandoni gaving, de va sen okavaayin vu voon ond Anutu le kavaayin vu baandoni gaving.” ²⁰ ^hTonde Yesu vu kôovu yite maanggêem-aso niwêêk nambe me-daanêl vu vaheey naambe yi omaaho sen Anutu yoo holin yi vulôot-ato le.

Yesu nêl nambe le gango nivaane be jimb-ande kandi jak
(Maak 8:31–9:1; Luk 9:22-27)

²¹ Tombe hôok busin-anju Yesu monanêl vakasin langaah vu yite maanggêem-aso nambe le na Yelusalem, tombe himbop-aso osin kul vaha sen datung salivangin-ato silate yêêv-aso de tanasin dangga-so le lambu nivaane ngeeyaata vu yi, tonde lanyiiis-ambe jimb, de busin yaal vêl e mem le kandi jak metumin jesin naah. ²² Tombe Pita hako Yesu be yuuh lala daale lundoos, le mem nêl yi nambe, “Omaaho Bop, game naanêl e. Va naambêênja me-le naatovu hong e.” ²³ Le Yesu hilin-ambe nêl vu Pita nambe, “Saalang, gana vêl, gawiingin ganggilin mop in sa. Gakam-ame navu va lohvu Anutu ka le, nganjo gakam oo navu va lohvu omaahonôn akand amu.”

²⁴ ⁱTonde yik Yesu nêl vu yite maanggêem-aso nambe, “Omaaho ti wiingin nambe sapa sa ond yoo daanggôl yi, le mem baaku yite haah pako^j be sapa sa. ²⁵ ^kDe omaaho ti yoo wiingin nambe ganggin ninaavi nivasa in

mando metumin, ond le jimb-ambe na menama osin nôon metuminate. Le naambe omaaho ti baaku nimeen jak sa haalengg-ambe jimb, ond mem le mando metumin danggata. ²⁶ ^lLe omaaho ti gôolis va voon-ate

^d 16:16 Jon 6:69 ^e 16:17 Mat 17:5; Gal 1:15-16 ^f 16:18 Jon 1:42; Ep 2:20

^g 16:19 Mat 18:18; Jon 20:23 ^h 16:20 Mat 17:9; Mak 9:9 ⁱ 16:24 Mat 10:38; Luk 14:27

^j **Matai 16:24** Yêêv Lom-aso danêl nambe omaaho ti wiing va nipaya om lanyiiis dukanaah nyevahaan-ambe jimb, ond layiis lakala haah pako in nambe bu nimumin vu yi osin yite hil. Tonde Yesu nêl nambe omaaho ti wiingin nambe sapa yi ond yoo baaku yite haah pako be sapa yi, ond dangga nambe yame aanjêênin nimeen osin nimumin sen hil lambu vu yiy jak Yesu haalêê-to le, yiy baaku be yiy oo sapa Yesu. ^k 16:25 Mat 10:39; Luk 17:33; Jon 12:25 ^l 16:26 Mat 4:8-9

pin, de jimb-ambe na menama osin nôôn metumin-ate, ond va voon-ate me-le dôôvu yi le, le nama. De va voon-ate ti

me-neep in nambe omaaho ti me-baanggo kanu jak-ambe mando metumin danggata le, malis. ^{27m}Omaahonôôn Noow e nom osin Mangganaan-ate nikaapulig gaving yite angela-so, tombe mem le bu nyevahaan dokanaah vu omaahonôôn pin, nohvu va sen dawiing-ato. ²⁸Sa naanêêl vu ham keen naambe ham sen ham naalêê-jo ond vaalu me-le lanjimb e, de lanjji Omaahonôôn Noow e nom naambe omaaho lulemak vu yite hil e mem.”

Yesu ninaavi angoo yoo ak
(Maak 9:2-13; Luk 9:28-36)

17 ¹Busin namaavaalu vindak ti la vêêl e, mem Yesu hako Pita yuuh Jems having hali Jon-ambe sil oo lalak kandu bopaata ti be lala. ²ⁿTombe sil pin-ambe daale, tonde sim Yesu ninaavi angoo yoo ak hôôk yaal amend, de mekaalus tum bop nambe taaku me, tombe yite lolop ayuuh ame yoo nivalôôy lôôt nambe bayiimb ahevalôôy. ³Tombe sim yaal layi de Mose yuuh Eliya daale dakaas having Yesu, ⁴tombe Pita nêêl vu Yesu nambe, “Omaaho Bop, yiyi nandôô-jo nivasa lôôt,

om naambe gawiingin ond sa daav numang daka yaal mandôô-jo, gate ti, Mose-te ti, de Eliya-te ti.”

⁵Naahen nanêêl atonde layi de bayiimb ti têêlang lôôt-ambe vayum sil, tombe lava ti laam hôôk bayiimb-anju lopayo nambe, “Sa Noongganja. Sahengg having yi lôôt osin sahengg anivasa vu yi, om ham gango lava.” ⁶Maanggêem-aso langoyin vakasin-anju, tombe yaal lato pataav baambund neep voon de layêênin lôôt, ⁷tombe Yesu la hambe nama lak yaal, de nêêl nambe, “Maal kandi. Maal-ame anjêênin e.”

⁸Tombe yaal amend velak, le me-layi omaaho ti le, malis, yik Yesu yoo timu naale.

^{9p}Tombe sil vu kanduu-ju be daahen mondaluu, tombe Yesu vu kôôvu yaal nambe, “Taahu taahu sen maal ahêê-to ond maal-ame naanêêl vu omaaho ti le, de Omaahonôôn Noow kandi jak naah vu hil yimbin-ate vêêl e mem.” ^{10q}Tombe maanggêem-aso lalingin yi nambe, “Nambe vaati sen tanasin dangga-so danêêl nambe Eliya le naamunggin, le mem omaaho sen Anutu yoo holin yi vulôôt-ato naam?” ¹¹Le nêêl laah nambe, “De. Eliya le naamunggin in samu va pin dukanaah. ^{12r}Le sa naanêêl vu ham naambe Eliya laam lung la, le hil-ame lalak ni le, malis. Hil oo dawiing va nindanjeen vu yi lohvu sil

^m 16:27 Mat 25:31; Saam 62:12; Pro 24:12; Lom 2:6; Taato 22:12 ⁿ 17:2 2Pi 1:16-18

^o 17:5 Saam 2:7; Ais 42:1; Mat 3:17; Mak 1:11; Luk 3:22; Diu 18:15 ^p 17:9 Mat 16:20

^q 17:10 Mal 4:5 ^r 17:12 Mat 11:14; 14:10

oo kand, om yik le lambu nivaane vu Omaahonôôn Noow naambêênju gaving.”

¹³“Yesu nêêl nambêênju tombe mem yite maanggêêm-aso lalak ni nambe nêêl vakasin-anju lak Jon sen nalipis hil-ato.

Yesu hatiiy mamu nipaya hato la in unoopasiv ti be nivasa lak
(Maak 9:14-29; Luk 9:37-42)

¹⁴Latok lala vu hil ngeeyaata tombe omaaho ti la hatung kaatu vu Yesu ¹⁵de nêêl nambe, “Omaaho Bop, gakam pasiv in sa noongg in baando nasi be nango nivaane bopaata. Nalupake be nayêês kin osin nalukala bel balon ngeeyaata, ¹⁶tombe sa hako laam vu gate maanggêêm-aso le me-lalohvu nambe lambiing-ambe nivasa jak e.” ¹⁷“Tombe Yesu nêêl laah nambe, “Ham hil anipaya, ham-ame awii-having e. Sa mando gaving ham-ambe naangelis e mem ham anjak sate kul ani? De sa gako nimeen in ham na nohvu busin vilis e? Ham gako naam vu sa.” ¹⁸Tombe Yesu nêêl mamu nipaya be hato la in unoopasiv tii-ju de baando nasii-to lung la pavis-ande nivasa lak.

¹⁹“Tonde mem Yesu having yite maanggêêm-aso be sil oo dando, tombe maanggêêm-aso lalingin nambe, “Nambe vaati sen hey-ame aalohvu nambe gatiiy mamu nipayaa-ju na le?” ²⁰“Le Yesu nêêl vu sil nambe, “Ham-ame awii-having niwêêk e, ondeey ham-ame alohvu le. Sa naanêêl keen vu ham naambe ham ambiing gaving pasivdaka nohvu môônd nôôvoow, ond mem ham naanêêl vu kandu tii-ju naambe, ‘Okandi jak-ambe gana baale nganju,’ ond le na. Om naambe ham ambiing gaving ond mem ham alohvu nambe ham e ambiing va pin. ²¹[Lohakin osin yanjakin yiyi in vanôôn in nambe yame angga le de yaanohak amu, ond vaa-jo mu ond mem lohvu nambe gatiiy mamu na, de vaheey ond me-lohvu le.”]

Yesu nêêl balon angu having nambe le jimb-ande kandi jak naah
(Maak 9:30-32; Luk 9:43-45)

²²Yesu having yite maanggêêm-aso be sil ahondoos oo motatuuvu mop Galili, tombe nêêl vu sil nambe, “Le lambu Omaahonôôn Noow dukana hil namand, ²³“tombe le lanyiis-ambe jimb, tonde busin yaal vêêl e mem kandi jak jesin naah.” Tombe maanggêêm-aso londpayo nimeen lôôt.

Yesu haate taakis Anutu-te dumb bop-ate

²⁴*Latok lala Kapenaum, tombe hil sen dako taakis Anutu-te dumb bop-atêêto ond lala lalingin Pita nambe, “Mak hamate kaputung naate

* 17:13 Luk 1:17 † 17:17 Diu 32:5,20; Jon 14:9 † 17:19 Mat 10:1 † 17:20 Mat 21:21; Mak 11:23; Luk 17:6; 1Ko 13:2 † 17:23 Mat 16:21 * 17:24 Eks 30:13; 38:26

taakis dumb-ate having a?” ²⁵Tombe Pita liinggis nambe, “Êê-e, naate.” Tonde Pita lukala bayêên alo, tombe Yesu nêêl Pita-te vakasin sen la in nambe naanêêl-ato langaah laah lak yi nambe, “Simon, gakam vu nambe vaati? Hil alulemak vu voon-anja dako taakis kupak osin omaahonôôn-atêeto vu laheey? Mak yoo dako vu silate hil a? Me, dako vu hil vaalu?” ²⁶Tombe Pita nêêl laah nambe, “Dako vu

hil vaalu.” Tombe Yesu nêêl nambe, “Êê-e, om silate hil dando mu. Tombe yik dumb-anju ond Aamangg oote dumb, ²⁷lemu wame aambiing-ambe sil ahend kalin jak e, om gana gaate pang dokana betum, tombe paahuung ti dôôk nyendoos ond onggapok avi, tombe gale naatovu mone ti neep hôôk, mem onggako monêê-ja be gana gaate naatu wanêêngg taakis.”

Lati tu bop vu taaku sen Anutu nanggin-ato?

(Maak 9:33-37; Luk 9:46-48)

18 ¹Tombe maanggêêm-aso lala vu Yesu be lalingin nambe, “Om lati tu lukook bop savok angso vu taaku sen Anutu nanggin-ato?” ²Om Yesu teey unoopasiv ti laam-ambe valaah naale hôôk sil lavuun, ³de nêêl nambe, “Sa naanêêl keen vu ham naambe ham-ame anggilin ham-ambe ham daanggôôl ham naambe sen unoopasiv-anjo le, ond ham-ame le andukana Anutu nama in ganggin ham e, ma lôôt. ⁴“Omaaho ti nambe daanggôôl yi naambe sen unoopasiv-anjo, ond mem tu haale bop-ambe savok angso vu taaku sen Anutu nanggin-ato. ⁵^bTonde naambe omaaho ti ka bu sa haalengg-ambe gako unoopasiv naambêênjo ti jak, ond lohvu hako sa lak.”

Va nipaya nawiing nipaya vu hil

(Maak 9:42-48; Luk 17:1-2)

⁶“De naambe omaaho ti taahu va nipaya vu sate unoopasiv-aso sen londpayo nalaam timu vu saa-to ti be biing va nipaya ond le naatokak nyevahaan bopaata vu taamusin, ond hil talu tatuuh bopaata dôôk omaahôô-ja ka naamunggin-ambe gaate dukana lôôy-ambe davin na, ond mem nivasa, in me-taahu omaahonôôn dôôk va nipaya le. ⁷Hil vu voon-anjo le daatovu nimeen, in

va nipaya neep in nambe biing-ambe sil landupake.

Keen, va nipaya nambêênja le balup, lemu hil sen dawiiing va nipaya be davu kape hil vaaluu-to ond sil e daatovu nimeen.

⁸“De naambe onamam vaalu me ovaham vaalu biing-ambe va nipaya kape hong, ond okatôôv-ambe onngaate na vêêl, de onamam vaalu bati me ovaham vaalu bati, ond mem nivasa in gale mando metumin danggata. In onamam yuuh ahondoos-ande ovaham yuuh ahondoos, ond le gaate

^y 18:1 Luk 22:24 ^z 18:3 Mat 19:14; Mak 10:15; Luk 18:17 ^a 18:4 Mak 10:43-44

^b 18:5 Mat 10:40; Luk 10:16; Jon 13:20 ^c 18:8 Mat 5:29-30

hong jêê-na kin sen natum danggataa-to. ⁹De naambe gamem kaalus vaalu taato va nipaya vu hong-ambe gandupake in va nipaya, ond opasuuh-ambe onngaate na vêêl, de gamem vaalu bati mu ond mem nivasa, in gale mando metumin danggata. In gamem kaalus yuuh ahondoos e nanjip atombe le gaate hong jêê-na kin sen neep hôôk taaku nipayaa-to.”

Vakasin pakwesin lak bik sipsip ti mema
(Luk 15:3-7)

¹⁰ ^d“Ham ganggin ham. Ham-ame angge unoopasiv ayuuh unaavepasiv-anjo naambe va malis e, ma. Sa naanêêl vu ham naambe silate angela-so vu baandoni danggin sil ond angela-so dayi Aamangg sen nando baandonii-to lak busin pin. ¹¹ ^e[In Omaahonôôn Noow lukalaam in nambe dôôvu hil sen mend maa-to.] ¹²Ham akam bu le, naambe omaaho ti-te bik sipsip 100 naale tombe ti na menama, ond le na salo me le nama? Le na salo. Le balaah sipsip 99 yoo baale kandu, tonde na salo sipsip ti sen memaa-to. ¹³Sa naanêêl keen vu ham naambe naatovu sipsip tii-ju, ond le ka vasa in lôôt kaluuh sipsip 99 sen daalêê-to. ¹⁴Om yik ham Mom sen nando baandonii-to me-nawiingin nambe unoopasiv-anjo ti na menama le.”

Yiyi samu vakasin vu halingg-aso

¹⁵ ^f“Naambe halim biing va nipaya vu hong, ond gana vu be muuh mando javuh ti le mem onaanêêl yite nipaya kaatokin vu yi. Naambe gangoyin olavam ond gavu vêêl halim in va nipaya. ¹⁶ ^gLe naambe me-gango olavam e, ond onggaako omaaho ti me omaaho yuuh gaving hong-ambe maal anaah dôôk ti, in ‘muuh me maal naanêêl vakasin langaah e mem ham samu.’ ¹⁷ ^hLe naambe me-gango maal lavam e, ond onaanêêl vu hil bel-ate pin, le naambe me-gango hil bel lavand gaving e, ond ham angge yi naambe hil bamaan osin yi nipaya lohvu omaaho nako taakis.

¹⁸ ⁱSa naanêêl keen vu ham naambe va pin sen ham naapuvu hôôn vu voon-ato ond Anutu le naapuvu hôôn vu baandoni, de va pin sen ham kavaayin vu voon-ato ond Anutu le kavaayin vu baandoni. ¹⁹ ^jTonde sa naanêêl ango vu ham naambe ham vu voon-anjo ond omaaho yuuh alondpayo javuh ti in vati be yuuh kataangg, ond Aamangg sen nando baandonii-to le biing nôôn jak vu yuuh. ²⁰ ^kKe, tonde naambe omaaho yuuh me omaaho yaal daasupin ak sa haalengg-ambe yaal mando javuh ti, ond yik sale mando hôôk yaal lavuun.”

^d 18:10 Hiblu 1:14 ^e 18:11 Luk 19:10 ^f 18:15 Lev 19:17; Luk 17:3; Gal 6:1

^g 18:16 Diu 19:15; Jon 8:17 ^h 18:17 1Ko 5:13 ⁱ 18:18 Mat 16:19; Jon 20:23

^j 18:19 Mak 11:24; Jon 15:7; Jem 1:5 ^k 18:20 Mat 28:20; Jon 14:23

Vakasin pakwesin lak kul vaha sen me-kawiiy ango-te nyevahaan la le

²¹ Tonde Pita la vu Yesu be nêêl nambe, “Omaaho Bop, halingg biing va nipaya vu sa be sa kawiiy na balon vilis? Mak balon namaavaalu be vindak yuuh mava?” ²² Tombe Yesu nêêl laah vu nambe, “Same naanêêl vu hong naambe okawiiy halim-ate nipaya na balon namaavaalu be vindak yuuh amu le, malis, sa naanêêl vu hong naambe okawiiy yite va nipaya na nohvu balon 70 naatu balon namaavaalu be vindak yuuh”.

²³ “Ham gango le. Anutu nanggîn yite hil-ato ond lohvu omaaho lulemak ti wiingin nambe gako nyevahaan vu yite hil kul vaha-so. ²⁴ Naahen nawiing kul lakala in nambe gako va nyevahaan, tonde lako omaaho ti la vu yi, in bôôy hako mone ngeeyaata lôôt lohvu 10 milion kina, ²⁵ lemu yinêên mone me-lohvu in nambe bu dôôk-anju le. Tombe omaaho lulemak nêêl nambe vaheey baanggo omaahôô-ju gaving vane osin noondin-ambe yinêên va pin be daatu silate va kul-ate, de gako mone sen laanggo yi lak-anju be bu dokanaah yite nyevahaan. ²⁶ Le ma de hil kul vahaa-ju hato pataav baambu neep voon hôôk omaaho lulemak vaha de kataangg nambe, ‘Gakam pasiv in sa de ombaale vêêl e, in sale aambu dôôk gate nyevahaan pin vu hong.’ ²⁷ Tombe yite himbop aka wiingin yi, om kawiiy yite nyevahaan la, de nêêl-ambe laah. ²⁸ Om hil kul vaha tii-ju hato la voon atombe tovu omaaho ango sen yuuh dawiiing kul hôôk tii-to, in yite nyevahaan lohvu 100 kina neep vu, tombe lôôh omaaho ango sen yuuh kul timuu-to be gimbak nama hôôk ka lôôt, de nêêl vu nambe, ‘Gambu dôôk sate nyevahaan vu sa.’ ²⁹ Tombe omaaho angôô-ju yik hato pataav baambu neep voon hôôk vaha de kataangg yi nambe, ‘Gakam pasiv in sa de ombaale vêêl e, in sale aambu dôôk gate nyevahaan vu hong.’ ³⁰ Le ma de nimbaya, om hatung lukala kalaambus in nambe mandôô-ju be bu dôôk yite nyevahaan e mem. ³¹ Hil kul vaha-so vaalu layi vaa-ju tombe londpayo nimeen lôôt, om lala lanêêl vakasin-anju pin langaah vu silate yêêv, ³² tombe yêêv teey yite hil kul vaha tii-to laam-ambe nêêl vu nambe, ‘Hong omaaho nipaya. Munggin okataangg sa om sa kawiiy gate nyevahaan pin la. ³³ Sa kangg pasiv in hong, le nambe vaati om game gakam pasiv in omaaho sen muuh nawiing kul tii-to nambêênja le?’ ³⁴ Tombe yite yêêv ahekalin-ambe hatung lokala kalaambus in lambu nivaane vu be mando, de yoo monambu dôôk yêêv-ate nyevahaan pin-ambe jung na le mem. ³⁵ Om sa naanêêl vu ham naambe ham ti ti pin, ham-ame kawiiy halim-asote va nipaya na valok-ate lôôt e, ond Aamangg sen nando baandonii-to le biing vu ham naambe sen yêêv tii-ju wiing vu yite kul vahaa-to.”

¹ **18:22** Luk 17:4 ^m **Matai 18:22** Yesu nêêl balon 70-jo ond nêêl taato nambe yiyi kawiiy hil-ate va nipaya sen dawiiing vu yiyi-ato na pin. ⁿ **18:34** Mat 5:25-26 ^o **18:35** Mat 6:15; Mak 11:25; Ep 4:32; Kol 3:13

Moow osin vanêêndin-ame bapuu sil e
(Maak 10:1-12; Luk 16:18)

19 ¹Yesu nêêl vakasin-anjo lung la tonde havuuh Galili de la taaku Yudia vahaan sen neep bel bop Yoladan vaalu-to, ²tombe hil ngeeyaata taamuyin yi be lalaa-ju, tombe wiing-ambe silate hil anilakin nind vasa lak.

³Tombe hil Palisai heey lala vu in nambe sahi yi, om lalingin nambe, “Omaaho ti bapuu vane jak vakasin ti jeen ond lohvu tanasin me malis?” ⁴Le Yesu lingin sil nambe, “Mak vakasin sen neep hôôk Anutu-te kaapiyaa-to ond ham-ame asevin mava? Nambe Anutu hatung va pin vu nyendoos, be hatung omaahonôn moow ayuuh vêêh, ⁵tonde Anutu nêêl nambe, ‘Nambêênja om moow e gavuu mangganaan ayuuh tangganaan de gako vêêh-ambe yuuh mando javuh ti be yuuh daatu nôôn timu, ⁶de yuuh-ame yuuh e, nganjo yuuh latu nôôn timu.’ Om va sen Anutu wiing-ambe tu nôôn timuu-to ond ango me-kahe le.”

⁷Tombe hil Palisai lanêêl vu nambe, “Om nambe vaati sen Mose nêêl tanasin nambe omaaho ti kaavu kaapiya sen bapuu vanêê-to be bu vu le mem bapuu?” ⁸Tombe Yesu nêêl laah vu sil nambe, “Mose lak ham anim nambe ham alompayo niwêêk ak, ondeey liinggis nambe ham bapuu vanem-aso, nganjo vu bôôy nyendoos ond me-nambêênjo le. ⁹‘Sa naanêêl vu ham naambe omaaho ti vane me-wiing baayamb e, le laya havuuh-ande hako vêêh ango, ond omaahôô-ja wiing baayamb.” ¹⁰“Tombe yite maanggêem-aso lanêêl vu nambe, “Naambe moow osin vêêh-ate vakasin neep nambêênja, ond mam moow-ame gako vêêh e, jip.” ¹¹Le nêêl vu sil nambe, “Hil pin-ame lalohvu nambe lambiing nohvu vakasin-anjo le, malis, hil sen Anutu vu niwêêk vu sil-ato ond mem sil lalohvu nambe lambiing nohvu. ¹²Hil vaalu dando ond taandin lako sil lohvu nambe me-le gako vêêh e, de vaalu ond omaahonôn lawiing sil anind paya lak, om me-dako vêêh e, tonde hil vaalu kand navu nambe Anutu nanggin sil-ato be yoo dalakin sil nivasa de me-dako vêêh e. Omaaho ti lohvu nambe biing nohvu vakasin-anjo ond biing.”

Yesu lohak ak unoopasiv
(Maak 10:13-16; Luk 18:15-17)

¹³Tonde hil lako unoopasiv laam vu Yesu in nambe gambe nama jak sil osin nohak ak sil, le yite maanggêem-aso lanêêl hil-anju, ¹⁴le Yesu nêêl nambe, “Ham baale de unoopasiv-anju lanaam vu sa le. Ham-ame

^P 19:3 Mat 16:1 ^Q 19:4 Jen 1:27; 5:2 ^R 19:5 Jen 2:24; Ep 5:31 ^S 19:7 Diu 24:1-4;
Mat 5:31 ^T 19:9 Mat 5:32; 1Ko 7:10-11 ^U 19:10 1Ko 7:1-2,7-9 ^V 19:14 Mat 18:2-3

anggilin sil e, in Anutu nanggin hil nambêênja having.” ¹⁵ Tonde hambe nama lak sil vêêl e mem la taaku ango.

Omaaho maanggêêm ti osin yite kupak ngeeyaata
(*Maak 10:17-31; Luk 18:18-30*)

¹⁶ Tombe omaaho ti la valup vu Yesu be lingin nambe, “Kaputung, saambiing va nivasa vaati le mem sa mando metumin danggata?” ¹⁷ Tombe Yesu nêêl vu nambe, “Galingin sa in va nivasa in? Yik Anutu timu nivasa, om gawiingin nambe omando metumin ond osamu tanasin pin.” ¹⁸ Le omaahô-jû lingin nambe, “Tanasin vaati?” Tombe Yesu nêêl vu nambe, “Tanasin nambe game ganyiis omaahonôn jimb e, game gambiing baayamb e, de game gambiing hôôndak e, game tatuhin vakasin jak omaaho ango le, ¹⁹ xonggako mom ayuuh tam jak, de gahem gaving hil sen dando ngaaho vu hong naambe sen goo gahem naving hong-ato.”

²⁰ Tombe maanggêêm-anjuuto nêêl vu nambe, “Va pin-anja sa samu lung la, de vaati naahen?” ²¹ Tombe Yesu nêêl vu nambe, “Gahem having nambe onaatu omaaho nivasa nôôn ond ganaah-ambe gambu gate va pin na be hil baanggo, de gambu mone na vu hil sen dativak in va yuuh amêê-to, in mem gale gako nôôn nivasa vu baandoni, tonde ganaam taamuyin sa.”

²² Maanggêêm tii-to hango vakasin-anju tombe laah osin lopayo nimeen lôôt, in yite kupak ngeeyaata lôôt nando. ²³ Tombe Yesu nêêl vu yite maanggêêm-aso nambe, “Sa naanêêl keen vu ham naambe hil sen silate va ngeeyaataa-to, ond le lanôôhin in nambe landukana gaving Anutu-te hil. ²⁴ Tonde yik sa naanêêl vu ham naambe bik kamel ti me-lohvu nambe dokana lulak vuun e, le nôôhin, de hil sen silate va ngeeyaataa-to ond yik me-lalohvu nambe landukana gaving Anutu-te hil e, le lanôôhin lôôt.”

²⁵ Tombe yite maanggêêm-aso lango vakasin-anjo be lavindis bopaata lôôt, be lalingin nambe, “Om lati lohvu nambe mando metumin danggata?” ²⁶ Tombe Yesu me la vu sil-ande nêêl vu sil nambe, “Omaahonôn-ame lalohvu va nambêênjo le, lemu Anutu timu yoo lohvu biing va pin.” ²⁷ Tombe Pita nêêl laah vu nambe, “Gangge, hey-anjo ond hey havuuh va pin la de hey navu taamuyin hong, tombe le naambe vaati vu hey?” ²⁸ Tombe Yesu nêêl vu sil nambe, “Sa naanêêl keen vu ham naambe vu busin taamusin sen va pin naatu moos jak, tonde Omaahonôn Noow mando jak omaaho lulemak-ate sia osin yite

^w 19:17 Lev 18:5; Luk 10:28 ^x 19:19 Eks 20:12-16; Diu 5:16-20; Lev 19:18; Lom 13:9

^y 19:21 Mat 6:20; Luk 12:33; Sin 2:45; 4:34-37 ^z 19:26 Jen 18:14; Iyop 42:2

^a 19:28 Mat 25:31; Luk 22:30; Taato 3:21; Dan 7:9-10

nikaapulisi, ond mem hôök busin-anju ham nomaayuuhambe laam yuuh sen ham navu taamuyin saa-to, ham e mando jak sia nomaayuuhambe laam yuuh-ato gaving sa, tombe ham e gangoyin hil Islel dangga nomaayuuhambe laam yuuh-ato silate vakasin. ²⁹De hil pin sen kand navu sa haalenggambe lavuuh silate bayêên me halindin, me vangaandin, me maandin, me

taandin, me noondin osin silate ngaanggis, ond sil e gako nivasa nyevahaan ngeeyaata lôôt savok sen-anjo na, tonde sil e mando metumin danggata osin danggata. ³⁰Lemu hil sen lamunggin-ato ond ngeeyaata le lanaah taamu, de hil sen davu taamuu-to ond ngeeyaata le lana daamunggin.”

Hil dawiiing kul wain

20 ¹“Ke, Anutu nanggin yite hil-ato ond lohvu kul wain mangganaan ti kandi hôök samiinaanôôn-ambe la in gako hil-ambe lana lambiiing kul in yite wain. ²Om la vakaas having hil kul vaalu be laliinggis nambe lambiiing kul hôök busin tii-ju de baanggo sil jak mone doo-ti ti tonde mem wiing sil lala yite kul wain.

³Tonde 9 kilok samiinaanôôn atombe laah hatu, le yi de omaaheey daale malis lak talind, ⁴tombe nêêl vu sil nambe, ‘Ham ana ambiing sate kul wain gaving, de sale baanggo ham nivasa.’ ⁵Tombe sil lala kul, tonde 12 kilok vandiisin osin 3 kilok soosin ond yik laah hatu be wiing nambêênju vu hil vaalu having. ⁶Tonde hôök 5 kilok soosin atombe laah hatu le yi de omaaheey daale, tombe nêêl vu sil nambe, ‘Nambe vaati sen ham naalêê-jo vandiisin-aandiin-ande kul ma?’ ⁷Tombe lanêêl vu nambe, ‘Mu omaaho ti me-vu kul vu hey e.’ Tombe nêêl vu sil nambe, ‘Om ham ana ambiing sate kul wain gaving.’

⁸“Tonde busin hôök atombe kul wain mangganaan nêêl vu yite omaaho sen nanggin hil kul-ato nambe, ‘Oteey hil kul lanaam-ambe ombaanggo sil, ond ombaanggo nanjip hil sen lalaam kul hôök soosin-ambe na naatok na hil sen lalaam kul hôök samiin-ato.’ ⁹Om vaanggo sil atombe hil sen lawiiing kul hôök 5 kilok soosin-ato lako mone doo-ti ti, ¹⁰tonde hil sen lawiiing kul munggin hôök samiinaanôôn-ato lala vu, tombe kand vu nambe mak sil e gako mone ngeeyaata lôôt savok hil vaalu, le ma, yik sil lako mone doo-ti ti having. ¹¹Lako lemu lanyuung hôök vu kul wain mangganaan ¹²nambe, ‘Hil-anju lalaam hôök soosin-ambe lawiiing kul lohvu taaku me timu, nganjo hey amu aawiiing kul bopaata vandiisinaandiin-ambe taaku ya hey lôôt, le yik ovaanggo hey va timu nambe sil-ato.’ ¹³Tombe kul mangganaan nêêl laah vu sil ti

^b 19:29 Hiblu 10:34 ^c 19:30 Mat 20:16; Luk 13:30 ^d 20:1 Mat 21:33 ^e 20:8 Lev 19:13; Diu 24:15

nambe, ‘Hali, same aawiiing nipaya vu hong e. Galiinggis in sate vakasin gêên nambe sale baanggo hong jak mone doo-tiito, ¹⁴om onggako gate mone be gana. Soo aawiiingin ondeey saavu mone vu hil sen lalup-ambe lawiing kul taamu, yik lohvu sen saavu vu hong-ato. ¹⁵Naambe saambiing vati jak soo sate monêê-jo ond yik yoo neep vu sa. Saawiiing va nivasa, le nambe vaati sen gahem anipaya in?’

^{16f}“Ke, om hil sen davu taamuu-to le daamunggin, de hil sen lamunggin-ato le lanaah taamu.”

Yesu nêêl tu balon yaal nambe le jimb-ande kandi jak naah
(Maak 10:32-34; Luk 18:31-33)

¹⁷Yesu lak-ambe la in na Yelusalem, tombe hako yite maanggêêm nomaayuuuh-ambe laam yuuh-ato, be sil oo lala, tombe mem nêêl vu sil nambe, ^{18g}“Ham gango le, yiiy navu ana balup Yelusalem, tombe hil davu lambu Omaahonôôn Noow dukana kul vaha sen datung salivangin-ato silate yêêv-aso osin tanasin dangga-so namand, tombe le daanêêl naambe lanyiis-ambe jimb. ^{19h}Tonde le lambu dukana hil vaalu sen sil-ame Yudaa-to namand, be sil pale yi, osin gaveek yi, de lanyiis ak haah pako, tonde busin naatu yaal e mem kandi jak jesin naah.”

Jems ayuuh Jon lawiingin nambe daatu yêêv bop
(Maak 10:35-45)

²⁰Tombe Sebedi vane hako noow ayuuh, be yaal lala vu Yesu, tombe hatung kaatu vu in nambe kataangg vati vu yi, ²¹‘tombe Yesu lingin nambe, “Galaam in vaati?” Tombe nêêl vu Yesu nambe, “Onaanêêl-ande vu taamusin sen onaatu omaaho lulemak-ambe ongganggin gate hil-ato, ond sa noongg ayuuh-anjo daatu yêêv yuuh, tombe ango le mando onamam vasa de ango mando onamam kêênj gaving hong.” ^{22j}Le Yesu nêêl laah vu nambe, “Va sen maal navu kataangg-anja ond maal doosin danggakook. Kap nimeen-ate sen sa navu naanum hôôk-ato ond malohvu nambe naanum hôôk a?” Le yuuh lanêêl vu nambe, “De, haay aalohvu.” ²³Tombe Yesu nêêl vu yuuh nambe, “Nimeen sen sa navu baaku ond male baaku, lemu vakasin sen manêêl nambe muuh naatu yêêv-ambe muuh mando sa namangg vasa osin sa namangg kêênj gaving saa-to ond same sate va in nambe sa naanêêl e, nganjo hil sen Aamangg samu taaku vu sil-ato ond sil e mando jak.”

²⁴Maanggêêm nomaayuuuh-ato langoyin vakasin-anju tombe sil alondpayo nipaya vu yuuh hali, ^{25k}le Yesu teey sil lalaam-ambe nêêl nambe, “Ham alak ni nambe hil vaalu-te yêêv sen danggin sil-ato ond danêêl vakasin osin niwêêk lôôt-ambe daanggôôl silate hil, de silate

^f 20:16 Mat 19:30; Mak 10:31; Luk 13:30 ^g 20:18 Mat 16:21; 17:22-23 ^h 20:19 1Ko 15:4

ⁱ 20:21 Mat 19:28; Luk 22:30 ^j 20:22 Mat 26:39; Jon 18:11 ^k 20:25 Luk 22:25-26

himbop oo danggin sil niwêêk lôôt, ²⁶ ¹lemu ham ond ham-ame ambiing naambêênja le. Nganjo ham ti wiingin nambe naatu bop, ond yoo biing va naambe sen yi omaaho malis ti in dôôvu ham pin. ²⁷De omaaho ti wiingin nambe naatu hamate lukook-ambe naamunggin, ond yoo naatu ham pin-ate hil kul malis amu. ²⁸^mYik nambe sen Omaahonôôn Noow, ond me-laam in nambe hil lambiing kul vu yi le, nganjo laam in nambe biing kul vu omaahonôôn osin jimb in baanggo omaahonôôn ngeeyaata naah.”

Yesu wiing omaaho mekanôônd yuuh amend tum
(*Maak 10:46-52; Luk 18:35-43*)

²⁹Yesu having yite maanggêêm-aso be sil lalup Yeliko be lala, tombe hil ngeeyaata taamuyin. ³⁰ⁿTombe omaaho mekanu yuuh dando hôôk mop nanyendangga, ond yuuh lango nambe Yesu valup, tombe yuuh lateey nambe, “Omaaho Bop, hong sen gate danggakook neep vu Devit-ato, gakam pasiv in haay e.” ³¹Tombe hil ngeeyaataa-ju lanêêl yuuh nambe yuuh lavand nama, le ma de yuuh lateey bopaata nambe, “Omaaho Bop, hong sen gate danggakook neep vu Devit-ato, gakam pasiv in haay e.” ³²Tombe Yesu naale be teey yuuh lalaam-ambe nêêl nambe, “De mawiingin nambe saambiing vaati vu muuh?” ³³Le yuuh lanêêl vu nambe, “Omaaho Bop, gambiing-ambe haay amengg naatum.” ³⁴Tombe Yesu ka pasiv in yuuh om hambe nama lak yuuh amend, tombe yik yuuh amend tum pavis-ambe yuuh taamuyin Yesu be lala.

Yesu lukala Yelusalem nambe omaaho lulemak ti
(*Maak 11:1-11; Luk 19:28-40; Jon 12:12-19*)

21 ¹Sil lalup ngaaho vu bayêên Betpaasi vu kandu Oliv in nambe daatok na Yelusalem, le mem Yesu wiing yite maanggêêm yuuh lamunggin-ambe lala. ²Tombe nêêl vu yuuh nambe, “Mana be mandukana bayêên Betpaasii-ju ond male angge donggi ti pavis, sil talu be naale having noow, ond muuh kavaayin-ambe gako naam vu sa. ³^oDe omaaho ti naanêêl vakasin ti vu muuh, ond muuh naanêêl naambe, ‘Omaaho Bop wiingin nambe biing kul ti jak pavis e mem gako nom.’ ”

⁴Ke, lawiing nambêênjo om Anutu-te vakasin sen omaaho ti nêêl langaah bôôy-ato nôôn ak nambe,

⁵^p“Ham naanêêl vu hil Saion naambe, ‘Ham angge hamate omaaho lulemak nalaas vu ham. Yi omaaho osin melaas, tombe lakando donggi be nalaas vu ham, yik lakando donggi noow ti be nalaas.’ ”

⁶Ke, tonde maanggêêm ayuuh lala lawiing lohvu vakasin sen Yesu nêêl vu yuuh-ato. ⁷Yuuh lako donggi tanggaan having noow, tombe

¹ 20:26 Mat 23:11; Mak 9:35; Luk 9:48 ^m 20:28 Luk 22:27; Pil 2:7; 1Ti 2:6

ⁿ 20:30 Mat 9:27; 15:22 ^o 21:3 Mat 26:18 ^p 21:5 Ais 62:11; Sek 9:9

yuuh lakaah yuuhate lolop-ambe lavaah lakala donggi yuuh damind, le mem Yesu lakando be la. ⁸“Tonde hil ngeeyaata lakaah silate lolop-ambe lavaah neep mopaatôôv, de hil vaalu lasap haah nama osin lis-ambe lambe neep mop in nambe Yesu gato jêês-ambe na. ⁹“Tombe hil vaalu damunggin, de vaalu davu taamu be sil pin daakôôhin nambe,

“Ham-o, yiiy lavangg dôôk omaaho sen laam vu danggakook Devit-anja. Anutu biing samu samu vu omaahôô-ja in laam ak Omaaho Bop haale. De yiiy gako Anutu haale jak nanjip baandoni.”

¹⁰ Yesu tok la Yelusalem, tombe hil pin lavindis de lawiing nindaandun bopaata de lateey nambe, “Omaaho latii-ja?” ¹¹“Tombe hil ngeeyaata sen laving yii-to ond lanêêl nambe, “Omaaho sen nanêêl Anutu-te vakasin langaah-ato Yesu vu Nasaalet Galili.”

Yesu hatiiy hil sen daanggo va hôôk Anutu-te dumb bop alôô-to
(Maak 11:15-19; Luk 19:45-48; Jon 2:13-22)

¹² Tombe Yesu lokala Anutu-te dumb bop alpayo, be hatiiy hil pin sen daanggo va salivangin-ate hôôk dumb alopayôô-to be lala voon, tonde hil sen davu Yuda osin Lom-ate mone nyevaha-vahaan hôôk yii-to^t, ond kayovakin silate tavolo, de hil sen daanggo manak tumbaliiy in hil gatung naatu salivangin-ato, ond kaasêêh silate sia la, ¹³“tonde nêêl vu sil nambe, “Anutu-te vakasin neep hôôk kaapiya nambe, ‘Sate bayêên ond le daanêêl naambe bayêên lohakin,’ lemu ham awiing-ambe tu hil hôôndak-ate bayêên sen dahôôpis hôôk-ato.”

¹⁴ Lung laa tonde hil vaalu mend kanu osin vahand anipaya lala vu Yesu hôôk dumb alo be wiing sil anind vasa lak. ¹⁵ Lemu kul vaha sen datung salivangin-ato silate yêêv-aso osin tanasin dangga-so layi de nawiing va nivasa nambêênju, tonde lango unoopasiv daakôôhin hôôk dumb alo nambe, “Ham-o, yiiy lavangg dôôk omaaho sen laam vu danggakook Devit-anja.” Tombe sil ahend kalin, ¹⁶“om lalingin Yesu nambe, “Game hango vakasin sen danêêl-anjo le?” Tombe Yesu nêêl laah vu sil nambe, “Êê-e, sa hango. De ham-ame asevin vakasin sen neep hôôk Anutu-te kaapiyaa-to le? Nambe, ‘Otaahu unoopasiv sen daahen dakaas paya, osin sen taandin davu sum vu sil-ato, de lavand nahôôk hong nivasa lôôt.’” ¹⁷ Tombe havuuh sil osin taaku bop-anju de having yite maanggêem-aso be lalaah deep Betaani.

⁸ 21:8 2King 9:13 ^t 21:9 Saam 118:25-26 ^s 21:11 Mat 21:46 ^t Matai 21:12 Hil davu Yuda osin Lom-ate mone nyevaha-vahaan hôôk yi, ond dangga nambe yêêv-aso danêêlin Lom-ate mone nambe hil-ame gatung dukana salivangin e, sil oo gatung Yuda-te mone nivalok. ^u 21:13 Ais 56:7; Jer 7:11 ^v 21:16 Saam 8:2

Yesu talôôt haah bangguk

(Maak 11:12-14, 20-24)

¹⁸Tombe Yesu kandi hôök samiinaanôôn-ambe laah in na taaku bop, tombe yimb ahe. ¹⁹*Tonde yi haah bangguk ti naale mop nanyendangga tombe la ngaaho vu be yi le nôôn ma, de lis malis amu, tombe nêêl vu haah-anju nambe, “Game le ganyiis nôôn jesin naah e, nama lôôt.” Tombe haah bangguk-anjuuto bambôôv la pavis.

²⁰Yesu-te maanggêem-aso layi tombe lavindis lôôt, de lanêêl nambe, “Nambe vaati sen haah bangguk-anju bambôôv la pavis?” ²¹*Tombe Yesu nêêl laah vu sil nambe, “Sa naanêêl keen vu ham naambe ham ambiing gaving niwêêk-ande ham-ame kam yu-yuuh e, ond mem ham e ambiing naambe sen saawiing vu haah bangguk-anjo. Tombe ham-ame le ambiing vaa-jo mu le, malis, yik ham naanêêl vu kanduu-ju naambe, ‘Okandi jak-ambe gandukana lôôy,’ ond le na. ²²†Naambe ham ambiing gaving Anutu naambe va sen ham navu kataangg hôök lohakin-ato ond le biing nôôn jak, ond ham e gako nôôn.”

Lalingin Yesu nambe laam nawiing kul lak lati haale

(Maak 11:27-33; Luk 20:1-8)

²³‡Tombe Yesu lokalaah Anutu-te dumb bop alo be monanêêl tanasin vu hil, tombe kul vaha sen datung salivangin-ato silate yêêv-aso osin Islel-ate himbop-aso lala vu be lalingin nambe, “Lati nêêl-ambe galaam nawiing va pin-anjo? Onawiing kul-anjo lak lati haale?” ²⁴Tombe Yesu nêêl laah vu sil nambe, “Om yik sa having, saanjingin ham in vakasin ti be ham naanêêl nom vu sa, le mem sale naanêêl omaaho sen sa naawiing kul lak haalêê-to nos vu ham. ²⁵De Jon nalipis hil-ato ond lati nêêl? Anutu nêêl me omaahonôôn yoo lanêêl?” Tombe sil oo lakaas in nambe, “Yiyy naanêêl naambe Anutu nêêl ond le naanêêl vu yiyy naambe, ‘Le nambe tana ham-ame awii-having yi le?’ ²⁶“Me yiyy naanêêl naambe omaahonôôn lanêêl-ambe Jon nalipis hil, lemu yiyy naayêênin hil ngeeyaataa-ju in sil pin lako Jon ak nambe nanêêl Anutu-te vakasin langaah.” ²⁷Om lanêêl laah vu Yesu nambe, “Hey doosin.” Tombe Yesu nêêl vu sil nambe, “Om same le naanêêl omaaho sen sa naawiing kul lak haalêê-to vu ham e.”

Vakasin pakwesin lak omaaho ti noow ayuuh

²⁸“Ham akam bu le. Omaaho ti noow yuuh dando, tombe la vu nowaatuk-ambe nêêl vu nambe, “Tuk-e, peey-anjo gana gambiing sate kul

* **21:19** Luk 13:6 * **21:21** Mat 17:20; Luk 17:6; 1Ko 13:2; Jon 14:12 † **21:22** Mat 7:7-11; 18:19; Jon 14:13-14 ‡ **21:23** Jon 2:18 † **21:26** Mat 14:5; 21:46 † **21:28** Luk 15:11

wain.’ ²⁹Tombe nowaatuk nêêl laah nambe, ‘Sa nimbaya,’ le sim hilin lopayo de la wiing kul wain. ³⁰Tonde yik mangganaan la nêêl vu nowaamiin having, tombe liinggis nambe, ‘Êê-e aamangg, sale ana,’ le ma de me-la le. ³¹Om noow ango tana wiing lohvu mangganaan lava?” Tombe lanêêl laah nambe, “Nowaatuk.” Tombe Yesu nêêl vu sil nambe, “Sa naanêêl keen vu ham naambe hil sen dako taakis osin vêêh baayamb-aso dawii-having-ambe dalokala having Anutu-te hil damunggin ham. ³²°In Jon valup-ambe taato mopaatôôv anivalok vu ham, le ham-ame awii-having yi le, malis. Lemu hil sen dako taakis osin vêêh baayamb-aso lawii-having yi, tonde ham ahe, le sim ham-ame ahilin ham alompayo be ham-ame awii-having yi le.”

Vakasin pakwesin lak hil anipaya sen danggin kul wain-ato
(Maak 12:1-12; Luk 20:9-19)

³³^d“Ham gango vakasin pakwesin ango. Himbop ti vaalôôh kul wain ti be vaaku ayak hilin, de haav taaku sen davu samu wain-aanôôn aniluk hôôk-ato, tonde haav bayêên vaha salak ti in nambe hil baale hôôk-ambe mend in kul wain-anju having. Tonde vu kul-anju lokala hil vaalu namand-ambe sil danggin, tonde yik la taaku dinaandiin lôôt. ³⁴Busin ngaaho lak in wain naasuuh, tombe kul mangganaan wiing yite hil kul lala vu hil sen danggin kul wain-ato in nambe sil gako nôôn vaalu vu yi, ³⁵°le ma de hil sen danggin kul-ato lalôôh yite hil kul-aso de laveek ti, de layiis ango be yimb, de sil tanga ti lak tatuuh. ³⁶Tombe kul mangganaan wiing yite hil kul vaalu ngeeyaata savok vaalu munggin-ato tombe sil lalaah yesin, le hil sen danggin yite kul-ato, ond yik lawiing nambêênju vu sil yesin laah. ³⁷Tonde sim wiing noow la vu sil lakaneep ahus, in ka vu nambe, ‘Manyinjo sa noongg om sil e lanjêênin yi.’ ³⁸°Lemu hil sen danggin kul wain-ato layi noow, tombe yoo lanêêl vu sil nambe, ‘Omaaho sen-anju le gako mangganaan-ate va pin om ham-o, yaanyiis-ambe jimb-ande kul-anjo naatu yate va.’ ³⁹°Om lalôôh-ambe lakôôh la voon, de layiis-ambe yimb.

⁴⁰“Om kul wain mangganaan nom gato ond le biing naambe vaati vu hil sen danggin yite kul-anjuuto?” ⁴¹Tombe lanêêl vu nambe, “Le nyiis hil anipayaa-ju be lana mend nama lôôt, de bu kul wain-anju be hil vaalu ganggin, le mem busin sen lanjul nôôn-ato ond mem lambu vaalu vu yi.” ⁴²^hTombe Yesu nêêl vu sil nambe, “Mak ham-ame asevin Anutu-te vakasin sen neep hôôk kaapiyaa-to mava? Nambe,

“Tatuuh ti sen hil kul-aso nind baya nambe me-landaav bayêên ak e, ond gêên tu bayêên ahelasu-te kook aniwêêk. Omaaho Bop wiing vaa-jo be yaahe nambe yoo nivasa nôôn.’

° 21:32 Luk 3:12; 7:29-30 ° 21:33 Ais 5:1-2; Mat 25:14 ° 21:35 Mat 22:6

° 21:38 Mat 27:18 ° 21:39 Hiblu 13:12 ° 21:42 Saam 118:22-23; Sin 4:11; Lom 9:33; 1Pi 2:6-8

⁴³Om sa naanêl vu ham naambe Anutu le juus ham naambe ham-ame mando gaving yite hil e, tombe le jiinggis vu hil vaalu sen sil lambiing-ambe yite vakasin nôôn jak-ato naambe sil landukana gaving yite hil. ⁴⁴ⁱ[De naambe omaaho ti dupake be nyiis yi jak tatuuh-anju ond le naamuvin daka daka, le naambe tatuuh-anju gato tanga omaaho ti, ond le matelak lôôt.]”

⁴⁵Kul vaha sen datung salivangin-ato silate yêêv-aso osin hil Palisai lango vakasin pakwesin sen Yesu nêl-anjo, tombe lalak ni nambe nanêl lak sil, ⁴⁶^jom lawiingin nambe lanôôh yi, le ma de layêênin hil ngeeyaataa-ju, in kand navu nambe Yesu nanêl Anutu-te vakasin langaah.

Vakasin pakwesin lak vanôôn bop
(Luk 14:16-24)

22 ¹Yesu nêl vakasin pakwesin ti vu hil nambe, ²“Anutu nanggin yite hil-ato ond lohvu omaaho lulemak ti wiing vanôôn bopaata in noow navu gako vêêh-ato. ³Om wiing yite kul vaha-so be lala lanêl vu hil sen teey sil lung laa-to nambe lanaam lanja vanôôn, le ma de nind baya be dando nêend. ⁴“Tombe wiing kul vaha vaalu lalaah yesin-ambe nêl vu sil having nambe, ‘Ham ana naanêl vu hil sen saateey sil bôôy-ato naambe sa samu sate vanôôn lung la be nando. Saanêl-ambe layiis kao bo-bop osin noow anituvakin vaalu sen danji bopaataa-to lung la, de sa samu va pin lung la gêen-ambe nando, om ham anaam in angga vanôôn-anjo.’ ⁵Om yite kul vaha-so lala lanêl vakasin-anjo vu sil, le nind baya be me-lango le, de lala danjeen. Ti la yite kulaanôôn, de ango la in ganggin yite tatuva, ⁶‘de sil vaalu lalôôh omaaho lulemak-ate kul vaha-so de layiis sil-ambe layimb. ⁷Tombe omaaho lulemak-anju ahekalin lôôt, be wiing yite hil ngaamong vaha-so lala layiis hil sen layiis yite kul vaha-sôôto be layimb pin lôôt, de lasi kin hôôk silate taaku. ⁸Tonde mem omaaho lulemak nêl vu yite kul vaha-so vaalu nambe, ‘Vanôôn nok lung-ambe nando, le hil sen saateey sil bôôy-ato ond sil anipaya om me-lalaam e, ⁹om ham ana baale mop bo-bop, de hil pin sen ham naatovu sil vuu-ju ond ham naanêl vu sil naambe lanaam lanja vanôôn bop-anjo.’

¹⁰“Nêl nambêenjo tombe yite kul vaha-so lala daale mop bop pin-ambe lasupin hil pin sen latovu sil vu mop-anjuuto, hil anivasa osin hil anipaya having, be lalaam dando hôôk bayêên alo be pup. ¹¹Tonde omaaho lulemak lokala in nambe ji sil, tombe yi de omaaho ti me-lop lolop anivasa lohvu mando be ja vanôôn bop-anju le, ¹²tombe omaaho lulemak nêl vu nambe, ‘Hali, nambe vaati om game galop lolop vanôôn bop-ate le? Galokalaam

ⁱ 21:44 Dan 2:44-45 ^j 21:46 Mat 21:26 ^k 22:4 Mat 21:36 ^l 22:6 Mat 21:35

danjeen in?’ Le omaahôô-ju lava ma, ^{13m}tombe omaaho lulemak nêêl vu yite kul vaha-so nambe, ‘Ham naanduuh nama yuuh vaha de ham gaate na, be na mando dôôk taaku mekanu lôôt. Vu taakuu-ju le monaasu osin janga navu be monaangitak.’ ¹⁴Tombe Yesu nêêl nambe, “Ke, Anutu nateey hil ngeeyaata, lemu naholin ti ti lak in landukana gaving yite hil.”

Lalingin Yesu in gaate taakis vu Sisa

(Maak 12:13-17; Luk 20:20-26)

¹⁵ⁿTombe hil Palisai yoo lala landuuh vakasin nambe sil tatuhin Yesu in nambe naanêêl vakasin na paya, ¹⁶om lawiing silate hil vaalu laving Helot-ate hil vaalu be lala vu Yesu be lanêêl nambe, “Kaputung, hey alak ganim nambe hong omaaho sen onanêêl vakasin keen. Yik goo navu tatekin Anutu-te mop keen vu hil, de game nayêênin omaaho ti nambe haale bop me haale pasiv e, ¹⁷om onaanêêl vu hey e. Lohvu nambe yiyi Islel gaate taakis na vu Lom-ate yêêv bop Sisa me malis?” ¹⁸Le Yesu lak sil alondpayo nipayaa-ju ni lung la, om nêêl nambe, “Ham oo natee ham ak. Nambe vaati sen ham nawiingin nambe sahi saa-jo? ¹⁹Ham taato mone taakis ti be saangge le.” Om lavu mone ti la vu be yi, ²⁰le mem lingin sil nambe, “Lati kanu osin haale lakaneep-anjo?” ^{21o}Le lanêêl laah nambe, “Sisa.” Tombe Yesu nêêl vu sil nambe, “Om ham ambu Sisa-te va na vu Sisa, de Anutu-te va na vu Anutu.” ²²Lango vakasin-anjo tombe lavindis lôôt, tombe lavuuh yi de lala.

Lalingin Yesu in omaahonôôn lanjimb-ande kandi jak-ato

(Maak 12:18-27; Luk 20:27-40)

^{23p}Tonde hôôk busin tii-ju hil Sadusi sen danêêl nambe omaahonôôn yimbin-ame le kandi jak naah-ato, ond lala lalingin Yesu nambe, ^{24q}“Kaputung, Mose nêêl nambe omaaho ti noow ma de yimb, ond omaahôô-ju hali le gako vahaahôôv in yuuh gako unoopasiv dukanaah mangganaan sen yimb-ato ahembaan. ²⁵Tombe bôôy omaaho ti sil o halindin namaavaalu be vindak yuuh dando having hey, tombe sil halindin tuk hako vêêh ti be yimb de noow ma, om sil halindin miin hako hali vane vahaahôôv-ambe yimb, ²⁶de gwey wiing nambêênju va timu. Tombe yik sil pin lôôt-ambe la hato sil halindin meey, ²⁷sil pin layimb de sil noondin ma, tombe vahaahôôv yimb lakaneep ahus. ²⁸Om vu busin sen omaahonôôn yimbin kandi jak naah-ato, ond vahaahôôv-anju le naatu hil namaavaalu be vindak yuuh-anjuuto sil ti tana vane, in sil pin lako vêêh timuu-ju lung laa-to.”

²⁹Le sim Yesu nêêl laah vu sil nambe, “Ôôye, ham doosin Anutu-te niwêêk osin yite vakasin sen lukaneep hôôk kaapiyaa-to, ondeey ham nakaas paya

^m 22:13 Mat 8:12; 25:30; Luk 13:28 ⁿ 22:15 Mak 3:6 ^o 22:21 Lom 13:7

^p 22:23 Sin 23:8 ^q 22:24 Diu 25:5

nambêênja. ³⁰ Vu busin sen omaahonôn yimbin kandi jak naah-ato ond vêêh ayuuh moow-ame le gako sil naah e, le nama. Sil e mando nohvu angela-so sen dando baandonii-to. ³¹ Vakasin lak omaahonôn yimbin kandi jak-ato ond mak ham-ame nasevin vakasin sen Anutu nêêl vu ham-ambe neep hôôk yite kaapiyaa-to mava? Nambe, ³²“Abalaam ayuuh Isak-ande Yaakop, yaalate Anutu sa.’ Le hamambe yaal layimb om yaal lala valok-ate? Malis, in Anutu ond hil metumin vu voon osin hil pin sen layimb-ambe lala dando metumin-ato silate Anutu yi.” ³³ Hil lango Yesu-te tanasin-anjo tombe lavindis lôôt.

Anutu-te tanasin tii-jo kaluuh tanasin vaalu pin

(Maak 12:28-31; Luk 10:25-28)

³⁴ Hil Palisai lango nambe Yesu-te vakasin-anju wiing-ambe hil Sadusi lavand ma, tombe lasupin lavuh ti, ³⁵ tombe sil ti omaaho tanasin dangga wiingin nambe sahi Yesu om lingin nambe, ³⁶“Kaputung, Mose-te tanasin ti tana savok tanasin vaalu la?” ³⁷“Tombe Yesu nêêl vu nambe, “Tanasin ti nambe, ‘Gahem gaving gate Omaaho Bop Anutu osin galompayo doos, be okanum doos, de gakam na doos vu yi timu.’ ³⁸ Tanasin danggakook ti nyendoos-anjo ond mem bopaata lôôt-ambe kaluuh vaalu la. ³⁹“Tonde tanasin ango tu yuuh having nambêênjo nambe, ‘Gahem gaving hil sen dando ngaaho vu hong naambe sen gahem oo naving hong-ato.’ ⁴⁰ In Mose-te tanasin osin Anutu-te vakasin sen yite hil danêêl langaah-ato pin ond danggakook neep hôôk tanasin yuuh-anjo.”

Kalisi-te danggakook neep vu lati?

(Maak 12:35-37; Luk 20:41-44)

⁴¹ Hil Palisai lasupin sil-ambe yoo daahen dando, tonde Yesu lingin sil nambe, ⁴²““Ham akam vu nambe vaati lak omaaho sen Anutu yoo holin yi vulôôt in nambe dôôvu yiy-ato? Yite danggakook neep vu lati? Tombe lanêêl nambe, “Danggakook neep vu Devit.” ⁴³ Tombe nêêl vu sil nambe, “Le nambe vaati sen Vavi Vaambuung vêêl Devit alu lak-ambe nêêl omaahô-juuto nambe Omaaho Bop? Sen nêêl nambe,

⁴⁴ “Omaaho Bop nêêl vu sate Omaaho Bop nambe, “Omando sa namangg vasa, de sale aambiing-ambe hil sen dayi hong payaa-to le langgulis hong vaalu kambi.” ’

⁴⁵ Om sen Devit nêêl omaahô-juuto nambe, ‘Omaaho Bop’ le nambe vaati sen Omaaho Bop-anju tu Devit-ate hil vu taamusin-ato ti?” ⁴⁶ Tombe

† 22:32 Eks 3:6; Mat 8:11 * 22:37 Diu 6:5 † 22:39-40 Lev 19:18; Gal 5:14; Mat 7:12; Lom 13:9-10 “ 22:42 Jon 7:42 † 22:44 Saam 110:1; Mat 26:64; Sin 2:34-35

“ Matai 22:45 Yesu nêêl Devit-ate vakasin-anju in nambe bêêl sil alund jak in kand bu naambe omaaho sen Anutu yoo holin yi vulôôt in nambe dôôvu yiy-ato ond yite danggakook neep vu Devit lemu yite niwêêk kaluuh Devit la, ondeey Devit nêêl nambe Omaaho Bop.

omaaho ti me-lohvu nambe naanêêl vakasin ti naah vu Yesu le, tombe hôôk busin-anju layêênin Yesu lakala, de me-dalingin yi yesin laah e.

Hil ganggin sil in hil Palisai osin tanasin dangga-so

(Maak 12:38-39; Luk 11:43,46; 20:45-46)

23 ¹Tombe Yesu nêêl vu hil alu bopaataa-ju having yite maanggêem-aso nambe, ²“Hil tanasin dangga osin hil Palisai danêêl Anutu-te tanasin vu ham lalokalaah Mose ahembaan. ³×Om vakasin sen danêêl vu ham-ato ond ham samu be naapuvu niwêêk, lemu va sen dawiing-anju ond ham-ame sapa dôôk e, in sil danêêl vakasin, lemu me-dawiing va lohvu silate vakasin e. ⁴In sil dasupin silate tanasin vaalu ngeeyaata nambe sen danduuu va nimeen-ambe datung lakando omaahonôôn baanggesak-ambe dalôôhin lôôt, lemu sil ond nind baya de me-dalôôh daka lak namand in nambe landôôvu hil-anju le. ⁵×Va pin sen dawiing-anju ond dawiingin nambe hil lanji, ondeey sil kaavu Anutu-te tanasin-ambe landuuu ak bik naavi vatinin sil damband ond landuuu bik naavi bopaata savok hil vaalu-te, de davu samu vunakin dinaandiin lak silate lolop anye. ⁶×De dawiingin nambe sil oo mando naamunggin in lanja vanôôn bop, de sil mando hôôk hil pin amend vu dumb alo. ⁷Dawiingin nambe hil gako sil ak vu talind, osin hil daanêêl sil naambe Kaputung. ⁸Lemu ham ond hil-ame daanêêl ham

naambe Kaputung e, malis. Yik omaaho timu tu hamate kaputung, nganjo ham pin ham o halim-aso.

⁹“Tonde vu voon-anjo ond ham-ame naanêêl hamate omaaho ti naambe ham mom e, malis, yik ham Mom timu nando baandoni. ¹⁰De me-daanêêl naambe silate yêêvaso ham e, malis, yik hamate yêêv timu Kalisi. ¹¹×Lemu hamate omaaho sen tu bop-ato ond yoo daanggôôl yi be naatu hamate hil kul ti. ¹²×Omaaho ti yoo gako yi jak ond Anutu le daanggôôl yi, de omaaho ti yoo daanggôôl yi, ond Anutu le gako yi jak.”

Yesu nêêl nambe hil tanasin dangga dawiing va nipaya

(Maak 12:40; Luk 11:39-42,44,52; 20:47)

¹³“Ham tanasin dangga osin Palisai, ham e naatovu nimeen. Ham oo natee ham ak. Ham nahilin mop in nambe omaahonôôn-ame landukana gaving Anutu-te hil e. Ham-ame yoo nalokala le, de ham nahilin hil sen dawiingin nambe landokanaa-to having.

¹⁴[“Ham tanasin dangga osin Palisai, ham e naatovu nimeen. Ham oo natee ham ak. Ham nalakin vahaahôôv-asote bayêên ayuuu ame, tonde

× **23:3** Mal 2:7-8 × **23:5** Mat 6:1; Eks 13:9; Diu 6:8; Nam 15:38-39 × **23:6** Mat 6:5;

Luk 14:7 × **23:11** Mat 20:26; Mak 9:35; Luk 22:26 × **23:12** Iyop 22:29; Pro 29:23;

Esi 21:26; Luk 14:11; 18:14

ham navun ham alompaya lak lohakin diin, om ham e naatovu nipaya nyevahaan bopaata lôôt.]

¹⁵ “Ham tanasin dangga osin Palisai, ham e naatovu nimeen. Ham oo natee ham ak. Ham natup hôôk lôôy osin taaku pin in nambe ham naatovu omaaho ti in gilin yi be gako hamate gumbum. Omaahôô-ja tu hamate omaaho lung la, tombe sim ham awiing-ambe tu omaaho nipaya kaluuh ham, be le na taaku nipaya gaving ham.

¹⁶ “Ham hil amekanu, ham navu taato mop vu hil, om ham e naatovu nimeen. Ham nanêêl nambe omaaho ti naanêêl dumb vaambuung haale in kaandu yite vakasin, le ma de tatuhin, ond ham nanêêl nambe va malis, nganjo naambe naanêêl lak gool sen nando hôôk dumb vaambuung alôô-to in kaandu yite vakasin, ond ham nanêêl nambe me-lohvu nambe tatuhin e, nganjo biing-ambe yite vakasin nôôn jak. ¹⁷Ham alumkook ma osin ham amem kanu. Va ango tana nôôn savok? Mak gool savok a? Ma, dumb vaambuung sen wiing gool-ambe tu vaambuung-ato ond mem savok. ¹⁸Tonde ham nanêêl nambe omaaho ti naanêêl alata haale in kaandu yite vakasin le ma de tatuhin, ond ham nanêêl nambe va malis, nganjo naanêêl lak salivangin sen nando lak alata ond ham nanêêl nambe me-lohvu nambe tatuhin e, nganjo biing-ambe yite vakasin nôôn jak. ¹⁹Ham hil amekanu-so, va ango tana nôôn savok? Mak salivangin savok a? Ma, alata sen nawiing-ambe salivangin natu vaambuung-ato ond mem savok. ²⁰Om omaaho ti naanêêl alata haale in kaandu yite vakasin, ond me-nanêêl lak alata mu le, nganjo nanêêl lak alata osin va pin sen nando lak-ato having. ²¹Tonde omaaho ti naanêêl dumb vaambuung haale in kaandu yite vakasin, ond manyinja navu kaandu yite vakasin lak dumb vaambuung osin lak Anutu sen nando hôôk-ato having. ²² Tonde omaaho ti naanêêl keen baandoni, ond manyinju navu kaandu yite vakasin lak Anutu-te sia osin lak Anutu having, in nando lak-ato.

²³ “Ham tanasin dangga-so osin Palisai-so, ham e naatovu nimeen. Ham oo natee ham ak. Keen, tanasin nambe sen vanôôn pasi-pasiv, jaamenjang osin lêêsak-ande maanjêênj, ond ham natung having vanôôn ayuuh ame pin lak lu nomaayuuh, tombe ham navu lu ti natu salivangin vu Anutu, ond Mose-te tanasin tii-jo ond ham napuvu niwêêk. Lemu tanasin bo-bop vaalu nambe sen yaambiing va na nivalok amu, de yakangg pasiv in hil vaalu be yaandôôvu sil, tonde yalonggpaya na timu vu Anutu, ond yik ham oo navuuh tanasin-anjo nala. Om ham samu tanasin-anjo, de tanasin vaalu nambe sen ham navu va lu ti natu salivangin vu Anutu ond ham oo mosamu gaving-ande ham-ame gavuuuh na le.

²⁴ “Ham navu taato mop vu hil, lemu ham amem kanu. Ham navu samu tanasin pasi-pasiv lemu ham navuuh tanasin bo-bop la, yik nambe

° 23:16 Mat 15:14 ° 23:22 Ais 66:1; Mat 5:34; Sin 7:49 ° 23:23 Lev 27:30; Mai 6:8

sen ham napêêh paaniip vêêl in bel kuuh, lemu ham anum bik bopaata ti osin doos having bel-ambe lukala ham alompayô-to.

^{25 f}“Ham tanasin dangga-so osin Palisai-so, ham e naatovu nimeen. Ham oo naatee ham ak. Ham nalipis kap osin pale dami mu, de lopayo ond va hôôndak osin va nindanje-danjeen pup hôôk. ²⁶ Hong Palisai, gamem kanu. Ganjipis kap alopayo vêêl e, mem dami le nivasa jak gaving.

^{27 g}“Ham tanasin dangga-so osin Palisai-so, ham e naatovu nimeen. Ham oo natee ham ak. Ham nambe bandumb avi sen latung pen valôôy ak-ato, tombe hil dayi baandoni nambe mengali, lemu lopayo ond omaahonôôn kook osin va matelakin pin pup hôôk. ^{28 h}Yik nambe sen ham-anja, omaahonôôn dayi ham anim naavi be kand navu nambe ham hil anivasa, lemu vakasin tatuhin osin va nipaya paya pup hôôk ham alompayo.”

Yesu nêêl nambe tanasin dangga-so le gako nipaya nyevahaan
(Luk 11:47-51)

²⁹“Ham tanasin dangga osin Palisai-so, ham e naatovu nimeen. Ham oo natee ham ak. Ham nahaav bayêên anivasa vasa nalakando hil sen danêêl Anutu-te vakasin langaah-ambe layimb bôôy-ato silate bandumb baandoni, de ham navunak hil anivalok-ate bandumb, ³⁰ de ham nanêêl nambe ham mando gaving himbop-aso bôôy, ond ham-ame le andôôvu sil-ambe ham ahondoos anyiis hil sen danêêl Anutu-te vakasin langaah-ato be lanjimb e. ^{31 i}Om nambêênja ham oo nanêêl hamate dangga langaah nambe hil sen layiis sil-ambe layimb-ato ond silate hil moos ham-anja. ³² Om ham-o, ham oo sapa dôôk hamate himbop-aso bôôy vahand.

^{33 j}“Ham nyêêy, nyêêy noondin-aso. Hamambe ham e napak-ambe ham ana, de Anutu me-le naanêêl-ambe ham-ame le ana mando taaku nipaya le? Malis, ham-ame alohvu nambe napak e. ^{34 k}Om sale aambiing-ambe hil sen danêêl Anutu-te vakasin langaah-ato osin hil alukook bop-ande hil tanasin dangga lanaas vu ham, le ma de ham navu anyiis vaalu be lanjimb, de ham e anyiis vaalu jakana haah pako, tonde ham e gaveek vaalu hôôk hamate dumb alo, osin ham ambiing nindanjeen vu vaalu de ham gatiiy sil vu taaku ti be lana taaku ang. ^{35 l}Om hil anivalok pin sen hil kaasêêh sil anind hees-ambe layimb vu voon-anjôôto, ond vu nyendoos sen omaaho nivalok Abel yimb-ambe tok valup Belekaia noow Sakaalia sen hamate himbop-aso layiis-ambe yimb neep dumb alo vaambuung-ande alata lavuun-ato, ond lak sil pin-anju sen ham e gako nipaya nyevahaan dukanaah. ³⁶ Sa naanêêl keen vu ham naambe va pin-anju nyevahaan anipaya le naatovu ham sen gêên-anjo.”

^f 23:25 Mak 7:4 ^g 23:27 Sin 23:3 ^h 23:28 Luk 16:15 ⁱ 23:31 Sin 7:52 ^j 23:33 Mat 3:7; 12:34; Luk 3:7 ^k 23:34 Sin 7:52; 1Tes 2:15; Mat 10:23 ^l 23:35 Jen 4:8; Hiblu 11:4; 2Kro 24:20-21

Yesu su lak taaku bop Yelusalem
(Luk 13:34-35)

^{37m}“O Yelusalem, ham nayiis hil sen danêêl Anutu-te vakasin langaah-ato be dayimb, de hil sen Anutu nawiing sil dalaas vu ham-ato ond ham navu tanga sil lak tatuuh. Balon ngeeyaata ond soo monaawiingin nambe sa naasupin ham anggulis sa baambungg naambe sen kokalêêh nasupin noow-aso dahulis baambuu-to, le ma de ham animbaya. ³⁸ⁿOm ham gango, gêên-anjo ham oo nando malis amu de Anutu havuuh ham. ^{39o}Om sa naanêêl vu ham naambe ham-ame le angge sa jesin naah e, de na lôôt-ambe busin sen ham oo le naanêêl naambe, ‘Yiyy gako omaahôô-ju jak in laam ak Omaaho Bop haale.’”

Yesu nêêl nambe Anutu-te dumb bop e kawiiy
(Maak 13:1-2; Luk 21:5-6)

24 ¹Yesu vu Anutu-te dumb bop alo be hatu la in na, tombe yite maanggêêm-aso lala vu be sil taato dumb-ate bayêên pin vu yi, ^{2p}tombe Yesu nêêl vu sil nambe, “Ham angge va pin-anju, ond sa naanêêl keen vu ham naambe tatuuh sen lahaav dumb ak-ato, ond ango me-le mando jak ango baandoni le, le kawiiy pin-ambe na mando danjeen.”

Yesu nêêl vakasin lak nimeen ngeeyaata
(Maak 13:3-13; Luk 21:7-19)

³Yesu la nando lak kandu Oliv, tombe yite maanggêêm-aso yoo lala vu be lalingin yi kaatokin nambe, “Onaanêêl vu hey e, naangelis e vaa-jo naatok? Hey e anjak ni jak vaati naambe onavu ganom atombe va pin jung na?” ⁴Tombe Yesu nêêl laah vu sil nambe, “Ham ganggin ham in omaaho ango le tatuhin ham, ^{5q}in hil ngeeyaata le lanaam-ambe daanêêl sa haalengg ak sil naambe, ‘Sa Kalisii-jo,’ de sil e tatuhin omaahonôn ngeeyaata. ⁶De ham e gango ngaamong laam ngaaho daandun, osin ham e gango ngaamong banye vu taaku dinaandiin heey. Om ham gango le, ham-ame naham jak e, in vaa-ju le naam, lemu va pin-ame le jung na pavis e, in busin sen-ato naahen. ^{7r}Bayêên bu ngo le kandi be lambiing ngaamong vu bayêên bu ngo, de gaaman ango le kandi be biing ngaamong vu gaaman ango, de jemaapi le jêêy osin meep e biing omaahonôn vu taaku vaalu. ⁸Va nime-meen pin sen navu naatokak omaahonôn-ato ond yite nalu munggin-anja. ^{9s}Tonde mem hil e lambu ham dukana hil namand in nambe lambu nimeen vu ham, de lanyiis

^m 23:37 Sin 7:59; 1Tes 2:15 ⁿ 23:38 1King 9:7-8; Jer 12:7; 22:5 ^o 23:39 Saam 118:26;

Mat 21:9 ^p 24:2 Luk 19:44 ^q 24:5 Mat 24:23-24; Sin 5:36-37; Jon 5:43; 1Jon 2:18

^r 24:7 2Kro 15:6; Ais 19:2 ^s 24:9 Mat 10:22; Jon 15:18; 16:2

ham-ambe ham anggimb, tombe hil pin e nind baya lôôt in ham in sate hil ham. ¹⁰Tombe hil ngeeyaata le nind baya in sa, de langgilin sil naah, tonde sil oo le nind baya lôôt in silate hil-ambe lambu sil landukana hil namand in nambe lanyis sil. ¹¹Tombe hil ngeeyaata le balup-ambe daanêêl tanasin tatuhin naambe Anutu-te vakasin, le ma, tombe sil e palapin omaahonôôn ngeeyaata. ¹²Va nipaya le naatu bopaata jak atombe hil ngeeyaata ahend-ame le gaving sil nivasa naambe bôôy e. ¹³De hil sen sil baale niwêêk lôôt-ambe baaku nimeen pin-ato, ond sil e lana mando metumin gaving Anutu. ¹⁴Tombe sate hil e daanêêl banye nivasa sen Anutu nanggin yite hil-ato langaah-ambe na nohvu taaku pin in hil pin gango, le mem baandoni osin voon-ate busin-ato le jung na.”

Va nipaya osin va nimeen e naatovu hil
(Maak 13:14-23; Luk 21:20-24)

¹⁵“Omaaho ti nambe naasevin vakasin-anjo ond yoo ka bu nivasa be jak dangga ni naambe, “Ham navu angge nipaya dangga sen navu kawiiy vaa-to, ond le dukana baale dôôk taaku vaambuung nohvu sen Daniel nêêl Anutu-te vakasin langaah bôôy-ato, ¹⁶tombe mem hil sen dando Yudiaa-to ond dapak-ambe lana mando kandu lu. ¹⁷De omaaho ti nambe mando lak bayêên alu baandoni, ond me-duus-ambe guli-naah bayêên alo be gako yite vati le, nganjo napak pavis. ¹⁸De ti monambiing yite kul, ond me-gilin-ambe naah gako yite lolop e. ¹⁹Om hôôk busin-anju ond nimeen e naatovu vêêh-aso sen noondin lukaalêê-to, osin vêêh vaalu sen daahen davu sum vu noondin-ato. ²⁰Om ham anohak naambe vaa-ju me-naatovu ham dôôk busin sen lukaahôômb osin vavi jambaa-to le, de me-dôôk busin sawaasin ti le. ²¹Vu bôôy sen Anutu hatung va pin nyendoos-ambe tok laam gêên-anjo ond omaahonôôn-ame laaku nimeen bopaata lôôt e. De vu gêên-anjo ond nimeen bopaata navu naatovu omaahonôôn, tonde vu taamusin ond omaahonôôn-ame le daatovu nimeen ti naambêênjo jesin naah e. ²²Busin sen nimeen bopaataa-ju naatovu omaahonôôn-ato ond Anutu le katôôv vahaan na, le naambe nama ond omaaho lati lohvu nambe mando metumin? Lemu ka navu yite hil sen yoo holin sil ak-ato, om le katôôv busin sen nimeen-anju vahaan na.

²³z“Tombe mem omaaho ango le daanêêl vu ham dôôk busin-anju naambe, ‘Ham angge Kalisi nando nganjo,’ de daanêêl naambe, ‘Kalisi nando nganju,’ ond ham-ame ambiing gaving e. ²⁴“In hil vaalu le lanaam-ambe tatuhin naambe sil omaaho sen Anutu yoo holin yi vulôôt-ato,

‘ 24:11 Mat 24:5,24; 1Jon 4:1 “ 24:13 Mat 10:22 ° 24:14 Mat 10:18; 28:19

° 24:15 Dan 9:27; 11:31; 12:11 * 24:17 Luk 17:31 ° 24:21 Dan 12:1; Joel 2:2; Taato 7:14

z 24:23 Mat 24:5,11 a 24:24 Diu 13:1-3; 2Tes 2:9; Taato 13:13-14

tonde vaalu le tatuhin naambe sil Anutu-te hil sen danêel yite vakasin langaah-ato, de lambiing taahu taahu vaha vaha osin niwêêk, in naambe lohvu ond sil langgilin hil sen Anutu yoo holin sil-ato be lambiing gaving sil.

²⁵ “Ke, va pin sen saanêel banye vu ham gêen-anjo ond taamusin sen nôon jak-ato, ond ham-ame ambindis e. ²⁶ ^bOm naambe daanêel vu ham naambe, ‘Kalisi la nando taaku lumbalaamb-anju,’ ond ham-ame ana le. De daanêel naambe, ‘Kalisi nando hôok bayêen alo,’ ond ham-ame ambiing gaving e. ²⁷ ^cIn Omaahonôn Noow nom-ato ond le lanji nohvu demak navêel pavis vu vaavung be diihin lôôt-ambe lukala hoong. ²⁸ ^dHahaanôn ti yiis nivasa ond manak pin dasupin dala in nambe lanja.”

Omaahonôn Noow e nom
(Maak 13:24-27; Luk 21:25-28)

²⁹ ^e“Busin-anjute nimeen pin jung na le mem taaku mekaalus e mekanu dôok, de kwaav-ame le naatum e, de matam baandoni naatok osin va niwêêk vu baandoni pin e baale ye-yêêy. ³⁰ ^fTombe va sen le taato naambe Omaahonôn Noow navu naam-ato le naatok baale langaah vu baandoni, tonde hil pin vu voon daasu bopaata, de le lanji Omaahonôn Noow mando jak bayiimb baandoni be naam osin niwêêk gaving nikaapulsi bopaata. ³¹ ^gTombe vuuk e naasu bopaata, de Omaahonôn Noow e biing-ambe yite angela-so le lana daasupin hil sen yoo holin sil lak-ambe latu yite hil-ato, vu taaku lavuun osin vu taaku nanyendangga vaalu vaalu pin.”

Mêel suusin nêel busin taato
(Maak 13:28-31; Luk 21:29-33)

³² “Ham akam bu mêêl^h suusin. Ham ange naambe manak pulapul valu-la, ond ham e anjak ni naambe ngaaho lak in yiyi kape mêel jakana jok. ³³ ⁱDe yik naambêenja om ham ange naambe vakasin pin-ato nôon ak, ond ham e anjak ni naambe omaahô-to laam ngaaho lak in navu naatovu ham. ³⁴ ^jDe sa naanêel keen vu ham naambe hil sen dando gêen-anjôoto ond me-le lanjimb e, de va pin-anjo le nôon jak e mem. ³⁵ ^kYendak osin ngaanggis e na menama, de sate vakasin ond ti me-le na menama le, yoo le nanjip danggata.”

^b 24:26 Luk 17:23-24 ^c 24:27 Mat 24:37-39 ^d 24:28 Luk 17:37 ^e 24:29 Ais 13:10; 34:4; Esi 32:7; Joel 2:10,31; 2Pi 3:10; Taato 6:12-13 ^f 24:30 Sek 12:10; Taato 1:7; Dan 7:13; Mat 26:64 ^g 24:31 Ais 27:13; 1Ko 15:52; 1Tes 4:16 ^h Matai 24:32 Yesu tatekin yite vakasin-anjo vu yite hil ond taahu lak silate hahaanôn ti haale nambe pik, le hey pakwe vakasin-anjo lak mêel in nambe mêel ond yiyi oo yate va om yalak ni. De hey kaavu lak yiyi oo yate va vaalu having nambêenjo, in yiyi oo alak silate mopaatôov ani lung la.
ⁱ 24:34 Mat 16:28 ^j 24:35 Mat 5:18

Ham mando mem naatum in ham doosin busin

(Maak 13:32-37; Luk 17:26-30,34-36)

³⁶ ^k“Lemu busin-anju osin taaku me ond omaaho ti me-lak ni le. Angela baandoni doosin, de Anutu Noow doosin, Aamangg timu yoo lak ni lung la. ³⁷ ^lOmaahonôôn Noow nom-ato ond le naambe Noa-te busin bôôy sen hil doosin-ande vati tovu sil pavis-ato. ³⁸ In vu bôôy sen

bel-ame vaal-ambe savun taaku pin e de naahen, ond hil dando mondaya vanôôn osin mondanum, de moow ayuuh vêêh mondako sil-ambe tok valup busin sen Noa-so lalukala sip alôô-to. ³⁹ ^mDe hil oo doosin nambe vati navu naatokak sil, tombe bel vaal bopaata be hako sil la lôôt, ond yik le naambêênju vu sen Omaahonôôn Noow

nom-ato. ⁴⁰ Omaaho yuuhapim e mondambiing kul, tombe Anutu le gako angona, de gavuu angomando. ⁴¹ Tonde vêêh yuuh e mando monggayêêh vanôôn hôôk bayêên alo, ond Anutu le gako angona, de gavuu angomando. ⁴² ⁿOm ham oo mando mem naatum in ham doosin busin sen hamate Omaaho Bop e nom-ato.

⁴³ ^o“Ham oo alak ni nambe bayêên mangganaan ti gango banye naambe omaaho hôôndak navu balup hôôk busin taaku me tii-ju, ond le ganggin nivasa in naambe omaaho hôôndak-ame dukana yite bayêên alo le. ⁴⁴ Om yik nambêênja ham oo ganggin ham nivasa, in busin ti ham-ame le kam bu naambe Omaahonôôn Noow navu naam-ato ond le naam pavis.”

Vakasin pakwesin lak kul vaha nivasa osin nipaya

(Luk 12:42-46)

⁴⁵ “De kul vaha nivasa osin ka bop ond nawiing kul nambe tana? Yik yite yêêv holin yi be nanggin kul vaha-so vaalu in nambe bu vanôôn vu sil jak busin pin, ⁴⁶ tombe yite yêêv monana ti be nom gato vu be ji naambe nawiing yite kul lohvu, ond kul vahaa-jo le ka vasa. ⁴⁷ ^pSa naanêêl keen vu ham naambe yite yêêv e naanêêl-ambe naatu yêêv in ganggin yite va pin. ⁴⁸ Le naambe kul vaha nipayaa-ju yoo le ka bu dôôk lopayo naambe yite yêêv naahen lôôt, ⁴⁹ tombe gaveek kul vaha-so vaalu, de ja osin naanum gaving hil aheta-so. ⁵⁰ Tombe busin ti kul vahaa-ju me-ganggin yite yêêv e, le doosin, ond yite yêêv e nom gato, ⁵¹ ^qtombe le nyiis kul vaha nipayaa-ju be gako nipaya valok-ate, tombe gaate na taaku nipaya be gako nivaane gaving hil sen datee sil ak-ato, tombe vu taakuu-ju hil e daasu bopaata osin navund monaangitak.”

^k 24:36 Sin 1:7; 1Tes 5:1-2 ^l 24:37 Jen 6:5-8 ^m 24:39 Jen 6:13-7:24; 2Pi 3:6

ⁿ 24:42 Mat 25:13 ^o 24:43 Luk 12:39-40; Taato 3:3; 16:15 ^p 24:47 Mat 25:21,23

^q 24:51 Mat 8:12

Vakasin pakwesin lak vехаavu nomaayuuһ

25 ¹“Tonde Anutu nanggin yite hil-ato, ond lohvu vехаavu nomaayuuһ taalungg h  k silate lam pasiv ti ti be lala mondanggin omaaho sen navu balup in gako yite v  h-ato. ²Ond sil namaavaalu lundkook ma, de namaavaalu ond mem sil alundkook neep. ³In vaalu sen sil alundkook maa-to ond lako silate lam lemu me-lako kalaasin heey in nambe sil kaas  h dukanaah e. ⁴Nganjo vехаavu-so sen sil alundkook neep-ato, ond mem sil lako lam-ambe lako kalaasin heey having in nambe sil kaas  h dukanaah. ⁵Tombe omaaho sen navu gako yite v  h-ato me-valup pavis e, om vехаavu-so mend yip pin-ambe deep-ambe kand lingin. ⁶Tonde busin lavuun atombe k  k ti laam nambe, ‘Omaah  -to valup-o. Omaah  -to valup-o. Ham nambiing gatongin ham in ham ana naanggiy naas.’ ⁷Om vехаavu pin-anju kandi be taalungg h  k silate lam-ambe tum bop, ⁸tonde vехаavu-so vaalu sen lundkook maa-to lan  l vu vaalu sen sil alundkook neep-ato nambe, ‘Ham ambu hamate kalaasin daka vu hey e, in heyane  ng lam navu jimb.’ ⁹Le vaalu sen sil alundkook neep-ato lan  l laah nambe, ‘Mu mak me-lohvu yiy pin e, om ham oo ana baanggo haman  m vu tatuva.’ ¹⁰Tombe lala in nambe lana baanggo, tonde omaah  -juuto valup pavis, om vехаavu-so vaalu sen sil samu sil lung laa-to, ond lalukala bay  n alo having omaah  -juuto in nambe lanja van  n bop, tonde laayiy vinavi.

¹¹“^sLung laa tonde sim vехаavu-so vaalu lalo-lato be lateey nambe, ‘Himbop, ongataahin vinavi in hey e.’ ¹²“^tLe n  l laah vu sil nambe, ‘Ham ana, sa doosin ham.’

¹³“^u“Ke yik vakasin-anjo, om ham oo mando mem naatum in ham doosin busin osin taaku me.”

Vakasin pakwesin lak kul vaha yaal

(Luk 19:11-27)

¹⁴“^v“Anutu nanggin yite hil-ato ond yik nambe sen omaaho ti wiingin nambe na taaku dinaandiin, om teey yite hil kul vaha yaal lalaam, tombe vu yite va yuuһ ame lukala yaal namand in nambe yaal ganggin. ¹⁵“^wOnd vu va lohvu yaalate niw  k neep-ato, in nambe yaal lambiing kul ak, om vu mone bopaata l  t lohvu 5 taosen kina vu ti, tonde vu 2 taosen kina vu ang, de vu 1 taosen kina vu ti. Lung laa tonde la.

¹⁶“Tombe ti sen hako 5 taosen kinaa-to ond la wiing kul lak-ambe hako mone nyesavokin vaalu lohvu 5 taosen kina lukala having.

^r 25:1 Taato 19:7; Luk 12:35 ^s 25:11 Luk 13:25,27 ^t 25:12 Mat 7:23 ^u 25:13 Mat 24:42; Luk 12:40 ^v 25:14 Mak 13:34 ^w 25:15 Lom 12:6

¹⁷Tonde ango sen hako 2 taosen kina ond yik wiing nambêênju be hako mone nyesavokin vaalu lohvu 2 taosen kina lukala having,
¹⁸lemu ti sen hako

1 taosen kina ond la haav ngaanggis-ambe vun yêêv-ate mone hôôk.

¹⁹“Tonde sim naalum atombe kul vaha yaal-anjuuto yaalate yêêv lo-valup-ambe wiingin nambe gango mone sen vu vu yaal-ato. ²⁰Om ti sen hako 5 taosen kinaa-to ond hako mone nyesavokin-anju la vu be nêêl nambe, ‘Himbop, gavu 5 taosen kina lukala sa namangg-ato ond gangge, saawiing kul lak-ambe sa hako mone nyesavokin vaalu lohvu 5 taosen kina lukala having-anjo.’ ²¹*Tombe yite yêêv nêêl vu nambe, ‘Ke, mem hong kul vaha nivasa lôôt-ambe omaaho nanyem laas. Ohanggin va pasivdakaa-to nivasa lôôt, om sa navu aambiing-ambe ongganggin va ngeeyaata. Ganaam-ambe hoow mando osin wakangg vasa.’

²²“Tonde ti sen hako 2 taosen kinaa-to la vu be nêêl nambe, ‘Himbop, gavu 2 taosen kina vu sa, tombe gangge, saawiing kul lak-ambe sa hako mone nyesavokin vaalu lohvu 2 taosen kina lukala having.’ ²³Tombe yite yêêv nêêl vu nambe, ‘Been, hong kul vaha nivasa be omaaho nanyem laas, ohanggin va pasivdakaa-to nivasa lôôt, om sa navu aambiing-ambe ongganggin va ngeeyaata. Ganaam-ambe hoow mando osin wakangg vasa.’

²⁴“Tonde sim ti sen hako 1 taosen kinaa-to lukalom-ambe nêêl vu nambe, ‘Himbop, sa lak ganim lung la nambe hong omaaho osin niwêêk bopaata. Hil vaalu daalôôh vave le goo nako nôôn, tonde hil ango dawiiing kul le goo nako va nyesavokin vu sil, ²⁵tombe saayêênin-ambe sala aavun gate mone hôôk ngaanggis, om gate va nganjo.’ ²⁶Le yite yêêv nêêl laah vu nambe, ‘Hong kul vaha nipaya, de onamam valôôy. Galak sa ningg lung la nambe hil vaalu daalôôh vave le sa nako nôôn, tonde hil ango dawiiing kul le sa nako va nyesavokin vu sil. ²⁷Om naambe goo gatung sate mone dôôk beng in saanom ond sa gako sate va nom, de sil lambu mone nyesavokin vaalu gaving, le ma. ²⁸Om ham ambu vêêl mone in omaahôô-ja be ham ambu na vu omaaho sen hako 10 taosen kinaa-to, ²⁹in hil pin sen silate va neep-ato, ond sil e gako va vaalu gaving-ambe silate va naatu ngeeyaata lôôt. Nganjo omaaho paya paya sen yite va maa-to, ond va pasivdaka sen neep vu yii-to le nama na valok-ate lôôt, ³⁰*tonde kul vaha nipayaa-ju ham gaate na taaku mekanu sen neep nanyendanga lôôt-ato, tombe vu taakuu-ju hil e daasu bopaata osin navund monaangitak.’ ”

* 25:21 Mat 24:45-47; Luk 16:10 ʹ 25:29 Mat 13:12; Mak 4:25; Luk 8:18

ʹ 25:30 Mat 8:12

Omaahonôôn Noow e gangoyin hil pin-ate vakasin vu taamusin

31 ^a“Omaahonôôn Noow e nom osin yite nikaapulis gaving yite angela-so pin, tombe mem le mando jak yite sia mengali. ³²^bTombe hil vu voon-anjo pin e daasupin sil baale Omaahonôôn Noow ame, tombe le bayaalin sil jak lu yuuu naambe sen bik heendin dayaalin sipsip nalak lu ngo, de memek nalak lu ngo. ³³^cOnd le balaah sipsip-aso lana baale nama vasa, de memek-aso lana baale nama kêênj, ³⁴tombe omaaho lulemak-anju le naanêêl vu hil sen daale nama vasaa-to naambe, ‘Manggsamu ham nivasa, om ham anaam mando taaku sen Anutu yoo nêêl ham haalem ak vu bôôy sen hatung ngaanggis ayuuu va pin-ato. ³⁵^dIn saahimb ahengg le ham avaata sa, tonde sa longg bambôôv in bel le ham avu be saanum, tonde sa laas vaatêêvak vu ham atombe ham hako sa lak. ³⁶De lolop ma in sa, le ham avu be saalop, tonde sa ningg lak atombe ham alaam monanggin sa, de sa nando hôôk kalaambus ond ham alaam vakaas having sa.’

³⁷“Tombe hil anivalok-anju le daanêêl naah vu naambe, ‘Omaaho Bop, busin tana hey aahe de gahimb ahem atombe hey avaata hong? De galom bambôôv in

bel atombe hey aavu be ganum? Hey akangg-ame vu le. ³⁸De busin tana hey aahe de galaam vaatêêvak-ambe hey hako hong ak, de lolop ma in hong atombe hey aavu be galop? ³⁹Tonde ganim lak osin onando hôôk kalaambus-ato ond naangelis hey alaas aahe hong?’

⁴⁰^e“Le sim omaaho lulemak-anju le naanêêl naah vu sil naambe, ‘Sa naanêêl keen vu ham naambe ham ahôôvu sa halingg-aso nipaya payaa-ju, ond yik lohvu ham ahôôvu sa.’ ⁴¹^fTombe mem le naanêêl vu hil sen daale nama kêênj-ato naambe, ‘Ham navu ana mem nama, om ham ana vêêl in sa be ham anjêê-ana kin sen le monaatum danggataa-to. Kin-anju ond Anutu vaav vu Saalang osin yite angela nipaya-so in nambe gaate sil lanjêê-lana. ⁴²In saahimb ahengg le ham-ame avaata sa le, de sa longg bambôôv in bel, le ham-ame avu be saanum e. ⁴³Tonde sa laas vaatêêvak le ham-ame hako sa lak e, de lolop ma in sa, le ham-ame avu be saalop e. Tonde sa ningg lak osin sa nando hôôk kalaambus, le ham-ame alaam vu sa le.’

⁴⁴“Tombe hil-anju le daanêêl naah vu naambe, ‘Omaaho Bop, busin tana hey aahe de gahimb ahem osin galom bambôôv in bel, de galaam vaatêêvak, osin lolop ma in hong, tonde ganim lak osin onando hôôk kalaambus le hey-ame aahôôvu hong e?’ ⁴⁵Tombe omaaho lulemak e

^a 25:31 Mat 16:27; 19:28; Taato 20:11-13 ^b 25:32 Lom 14:10; Esi 34:17

^c 25:33-34 Luk 12:32 ^d 25:35 Ais 58:7 ^e 25:40 Pro 19:17; Mat 10:42; 18:5; Mak 9:41

^f 25:41 Mat 7:23; Jut 7; Taato 20:10

naanêel vu sil naambe, ‘Sa naanêel keen vu ham naambe ham-ame ahôôvu sa halingg-aso nipaya payaa-to lak va nambêenja, ond yik lohvu ham-ame ahôôvu sa le.’ ⁴⁶Tombe hil-anju le lana monggako nipaya nyevahaan danggata, de hil anivalok ond sil e mando metumin danggata osin danggata.”

Hil landuuh vakasin nambe lanyis Yesu be jimb

(Maak 14:1-2; Luk 22:1-2; Jon 11:45-53)

26 ¹Tombe Yesu nêel vakasin pin-anju lung la, le mem nêel vu yite maanggêem-aso nambe, ²^h“Ham alak ni nambe busin yuuh na vêel e mem yale aangge busin bop busin haluusin, sen Anutu haluuh hil Islel hôôk vu Ijip bôôy-ato, tombe davu lambu Omaahonôôn Noow dukana hil namand in nambe lanyis jak haah pako.”

³Hôôk busin-anju Yuda-te himbop-aso osin kul vaha sen datung salivangin-ato silate yêêv-aso lasupin sil hôôk silate yêêv bop Kaiapas-ato yite bayêên alo, ⁴tombe sil davu salo mop in nambe lanôôh Yesu kaatokin be lanyis-ambe jimb. ⁵Tonde lanêel nambe, “Lemu yame aanôôh dôôk busin bop e, in mak hil ngeeyaata londpayo le naakund.”

Vêêh ti kaasêêh bel galovasa lak Yesu lukook

(Maak 14:3-9; Jon 12:1-8)

⁶Yesu nando hôôk omaaho ti baan vu Betaani, omaahôô-ju haale nambe Simon ond payêês anipaya lak yi. ⁷ⁱDando mondaya vanôôn, tonde vêêh ti hako bel galovasa hôôk buayo tatuuh ti, ond daanggo lak mone bopaata lôôt, be la hato be kaasêêh bel galovasaa-ju lak Yesu lukook. ⁸Tombe maanggêem-aso layi be sil ahend kalin vu be lanêel nambe, “Vêêh-anju nawiiyak bel-anjo in? ⁹Bel galovasaa-jo yaambu be omaaho ango baanggo jak mone bopaata, de yaambu monêê-ju vu hil sen dativak in va yuuh amêê-to ond mem nivasa.” ¹⁰Le Yesu lak silate vakasin-anjo ni, om nêel vu sil nambe, “Ham anêel vêêh-anjo in? Manyinjo yoo samu sa nivasa lôôt. ¹¹^jHil sen dativak in va yuuh amêê-to, ond sil e mando gaving ham nohvu busin pin, nganjo sak, same le

mando gaving ham nohvu busin pin e. ¹²Va sen vêêh wiing-anjo ond kaasêêh bel galovasa lak sa be samu sa ningg naavi munggin in sa navu aanggimb-ambe landaav saa-to. ¹³Sa naanêel keen vu ham naambe vu taaku pin sen hil daanêel banye nivasa langaah-ato, ond va sen vêêh wiing-anjo le daanêel gaving in hil akand bu yi.”

⁸ 25:46 Dan 12:2; Jon 5:29 ^h 26:2 Eks 12:1-27; Mat 20:18; Luk 24:7 ⁱ 26:7 Luk 7:37-38

^j 26:11 Diu 15:11

Yudas liinggis nambe le bu Yesu dukana yêêv-aso namand
(*Maak 14:10-11; Luk 22:3-6*)

¹⁴^kTombe maanggêem-aso nomaayuuu-ambe laam yuuu-ato ti Yudas Iskaliot, ond la vu kul vaha sen datung salivangin-ato silate yêêv-aso, ¹⁵^ltombe nêêl vu sil nambe, “Naambe saambu Yesu dukana ham namam, ond ham e ambu vaati vu sa?” Tombe lavu mone siliva doo-ti be nomaayuuu^m vu yi, ¹⁶le mem yoo salo mop in nambe bu Yesu dukana sil namand.

Yesu ya vanôôn busin haluusin-ate having yite maanggêem-aso
(*Maak 14:12-21; Luk 22:7-14,21-23; Jon 13:21-30*)

¹⁷ⁿBusin bop busin haluusin sen Anutu haluuh hil Islel hôôk vu Ijip bôôy-ato, ond hil datongin balet lemu me-datung yis nalukala le, nganjo daya balet amu, tonde hôôk yite busin nyendoos ond Yesu-te maanggêem-aso lala vu be lalingin nambe, “Gawiingin hey ana samu taaku sen yangga vanôôn busin haluusin mandôô-to vu tana?” ¹⁸^oTombe nêêl nambe, “Ham andukana taaku bop-ambe ham ana vu omaaho tii-juuto, be ham naanêêl sa naambe sa kaputung vu yi, ond ham naanêêl naambe sate busin ngaaho lak om sana angga vanôôn busin haluusin-ate gaving sate maanggêem-aso ham mando hôôk yite bayêên-anju.” ¹⁹Tombe maanggêem-aso lawiing lohvu Yesu nêêl vu sil-ato be sil samu vanôôn busin haluusin-ate hôôk bayêên-anju.

²⁰Tonde busin hôôk atombe Yesu having sil nomaayuuu-ambe laam yuuu-ato be lala dando in nambe lanja vanôôn-anjuuto. ²¹Daahen daya tonde Yesu nêêl vu sil nambe, “Sa naanêêl keen vu ham naambe ham ti navu bu sa dukana hil sen lanyiis saa-to namand.” ²²Tombe maanggêem-aso londpayo nimeen lôôt-ambe sil ti ti lanêêl vu nambe, “Omaaho Bop, mak sa, me?” ²³^pTombe nêêl laah nambe, “Omaaho sen haay namangg la in vanôôn hôôk tii-to, ond le bu sa dukana hil sen lanyiis saa-to namand. ²⁴Tombe Omaahonôôn Noow e jimb nohvu vakasin neep hôôk Anutu-te kaapiyaa-to, lemu omaaho sen bu Omaahonôôn Noow dukana hil namand-ato, ond le naatovu nimeen, de naambe tangganaan-ame gako omaahôô-ju le, ond mem nivasa^q.” ²⁵Tombe Yudas sen taato Yesu langaah-ambe hil lanôôh-ato ond nêêl vu having nambe, “Kaputung, mak sa, me?” Tombe Yesu nêêl vu nambe, “Yik hong-anja.”

^k 26:14 Jon 11:57 ^l 26:15 Sek 11:12 ^m Matai 26:15 Yuda-te mone silivaa-jo ond mone bo-bop. Monêê-jo nôôn timu ond lohvu omaaho ti nawiing kul busin yumbeyuuu-ambe hil daanggo yi nalak. Om sen Yudas hako monêê-jo doo-ti be nomaayuuu ond hako lohvu 300 kina. ⁿ 26:17 Eks 12:14-20 ^o 26:18 Mat 21:3 ^p 26:23 Saam 41:9 ^q Matai 26:24 Yesu nêêl nambêênju in naanêêl taato naambe Yudas tangganaan-ame gako yi le ond mem nivasa, in me-le gako nivaane bopaata vu busin taamusin e.

Yesu vu paasa vu yite maanggêêm-aso
(Maak 14:22-26; Luk 22:15-20; 1 Kolint 11:23-25)

²⁶“Daahen mondaya vanôôn, tonde Yesu lôôh balet ak-ambe lohak vu Anutu, le mem hapok-ambe vu vu yite maanggêêm-aso, de nêêl nambe, “Ham gako naas-ambe ham angga, manyinjo sa ningg naavi.” ²⁷Tonde lôôh kap wain ti lak-ambe lohak osin pêêlis la vu Anutu, le mem vu vu sil-ande nêêl nambe, “Ham pin naanum dôôk-anjo, ²⁸manyinjo sa nihees sen sa kaasêêh in nambe Anutu kawiiy hil ngeeyaata-te va nipaya na, de biing-ambe Anutu-te vakasin sen jôôy lung la be neep-ato nanjip niwêêk. ²⁹Sa naanêêl vu ham naambe same le naanum wain nôôn aniluk jesin naah e, de na nohvu busin taamusin e mem sale naanum moos naah gaving ham dôôk taaku sen Aamangg oo nanggin-ato.”

³⁰“Tonde lawiing laalo ti lung la, le mem laluus-ambe lala kandu Oliv.

Yesu nêêl nambe Pita le jak alu in yi
(Maak 14:27-31; Luk 22:31-34; Jon 13:36-38)

³¹“Tombe Yesu nêêl vu sil nambe, “Peey-anjo ham pin e lompayo nimeen-ambe ham gavuuh sa, nohvu Anutu-te vakasin neep hôôk kaapiyaa-to nambe, ‘Sa navu aanyiis bik sipsip-asote heendin, de sipsip-aso gavuuh taale.’ ³²‘Lemu sale kandi jak naah vêêl-ambe sana Galili naamunggin ham.’ ³³Tombe Pita nêêl vu Yesu nambe, “Sil pin e londpayo nimeen-ambe gavuuh hong, de sak same le gavuuh hong e.” ³⁴“Le Yesu nêêl vu nambe, “Sa naanêêl keen vu hong naambe peey busin-anjo kokalêêh-ame le naasu le, de gale ganjak alum in sa balon yaal vêêl e.” ³⁵“Lemu Pita nêêl vu nambe, “Same le anjak alungg in hong e, yik lanyiis sa be saanggimb gaving hong ond lung.” Tombe yik maanggêêm-aso pin lanêêl nambêênjo having.

Yesu lohak vu taaku Getesmaane
(Maak 14:32-42; Luk 22:39-46)

³⁶“Tombe Yesu having maanggêêm-aso be lala lato taaku Getesmaane, tombe nêêl vu sil nambe, “Ham mandôô-jo de sana nganju be saanohak vêêl e.” ³⁷Tombe hako Pita having Sebedi noow ayuuh Jems ayuuh Jon-ambe sil lala, tombe lopayo nimeen-ambe nahees lôôt, ³⁸“om nêêl vu yaal nambe, “Sa longgpayo nimeen lôôt lohvu saanggimb, om maal mandôô-jo be maal oo mem naatum gaving sa.” ³⁹“De hataah la diin

^r 26:26 Mat 14:19 ^s 26:28 Eks 24:8; Jer 31:31-34; Sek 9:11; 1Ko 10:16; Hiblu 9:20

^t 26:30 Luk 22:39; Jon 18:1 ^u 26:31 Jon 16:32; Sek 13:7 ^v 26:32 Mat 28:7,16

^w 26:34 Mat 26:69-75 ^x 26:35 Mat 26:56; Jon 11:16 ^y 26:36 Jon 18:1

^z 26:38 Jon 12:27 ^a 26:39 Hiblu 5:7-8; Mat 6:10

daka, be la hato pataav baambu be neep voon, de lohak nambe, “O Aamangg, naambe lohvu ond ganôôh kap nimeen-atêênjo vêêl in sa, lemu same naanêêl e, goo gate va.” ⁴⁰Tonde laah hato vu maanggêêm ayaal, le yi de yaal deep, tombe nêêl vu Pita nambe, “Nambe va? Ham-ame alohvu nambe ham mando mem naatum daka gaving sa le? ⁴¹^bHam mando mem naatum-ambe ham anohak in palapin vaha me-kape ham e. Ham alom nawiingin lemu ham anim naavi nitambo.” ⁴²Tonde yik laah tu balon yuuh-ambe lohak nambe, “O Aamangg, sa baaku nimeen-anjo pin de me-lohvu nambe gambu vêêl in sa le ond lung, yik soo le aambiing nohvu gakam.” ⁴³Tonde lo-hato be yi le yaal deep in mend animeen lôôt, ⁴⁴“tonde yoo laah-ambe la lohak vakasin timuu-jo yesin laah tu balon yaal. ⁴⁵Tombe lo-hato vu maanggêêm-aso be nêêl vu sil nambe, “Ham sawaah-ambe naahen nahop a? Ham angge, ngaaho lak in davu lambu Omaahonôôn Noow dukana hil anipaya namand. ⁴⁶^dHam kandi jak in yana. Ham angge, omaaho sen navu taato sa langaah-ato hato ni.”

Lalôôh Yesu

(Maak 14:43-50; Luk 22:47-53; Jon 18:3-12)

⁴⁷Yesu naahen monanêêl vakasin-anjo, tonde sil nomaayuuuh-ambe laam yuuh-anjôôto ti Yudas hato pavis, ond hako hil alu bopaata ti be lalaam having yi. Lako yipak ayuuh tapum having-ambe lalaam, ond Yuda-te himbop-aso osin kul vaha sen datung salivangin-ato silate yêêv-aso yoo lawiing ondeey sil lalaam. ⁴⁸De omaaho sen navu taato Yesu langaah-ato ond samu vakasin lung la vu sil nambe, “Ham angge naambe sa naamuuh omaahôô-ju gaambôôk ond yik yii-ju, tombe ham anôôh.” ⁴⁹Om la vu Yesu pavis-ambe nêêl nambe, “Busin Kaputung.” Tonde muuh^e Yesu gaambôôk, ⁵⁰tombe Yesu nêêl vu nambe, “Hali, va sen galaam in nambe gambiing-ato ond gambiing pavis.” Nambêênju tonde hil lala ngaaho be lôôh namand ak Yesu be lapuvu tatin. ⁵¹^fTombe hil sen daale having Yesuu-to ond ti lôôh yipak ak-ambe sap yêêv bop salivangin-ate yite hil kul ti nanye vaalu be yêêhin. ⁵²^gLe Yesu nêêl vu nambe, “Ganjop gate yipak dukanaah naavi, in hil sen dalôôh ngaamong ak-ambe dayiis omaahonôôn-ato, ond ngaamong e nyiis sil-ambe lanjimb. ⁵³Mak gakam vu nambe same aalohvu nambe sa kataangg Mangg e? Sa kataangg ond le biing angela-so ngeeyaata lôôt lanaam pavis in landôôvu sa. ⁵⁴Le naambe saambiing naambêênju ond Anutu-te vakasin sen neep

^b 26:41 Mat 6:13; Hiblu 2:14; 4:15 ^c 26:44 2Ko 12:8 ^d 26:46 Jon 14:31

^e Matai 26:49 Hil Yuda ond silate gambum nambe silate omaaho ti balup ond sil lana daamuuh gaambôôk, yik nambe yiyate omaaho ti balup ond yiyi naalôôh nama. Ond Yuda-te gambum nivalok-anju, lemu Yudas la muuh Yesu gaambôôk ond tatuhin nambe ahe having yi, le ma de yoo taato Yesu vu hil in nambe lanôôh yii-to. ^f 26:51 Jon 18:26

^g 26:52 Jen 9:6; Taato 13:10

hôök kaapiyaa-to le nôôn jak naambe va? In vakasin-anju nêël taato va sen navu naatovu saa-to.” ⁵⁵ ^hTombe

Yesu nêël vu hil sen lalaam in lanôôh yii-to nambe, “Ham alaam in ham anôôh sa, lemu nambe vaati sen ham hako yipak ayuuh tapum having ham-ambe ham alaam nambe sen ham alaam vu omaaho hôôndak ti? Lohvu busin pin sa nando monaawiing tanasin hôök Anutu-te dumb bop alo, le ham-ame nalôôh sa le. ⁵⁶ ⁱLemu va pin-anjo nawiing in nambe Anutu-te vakasin sen hil danêël langaah-ambe neep hôök kaapiyaa-to nôôn jak.” Nêël vakasin-anjo tonde maanggêêm-aso pin lavuuh yi de lapak-ambe lala.

Yesu naale kaansol-aso mend

(Maak 14:53-65; Luk 22:54-55,63-71; Jon 18:13-14,19-24)

⁵⁷Hil sen lalôôh Yesuu-to ond lako la vu kul vaha sen datang salivangin-ato silate yêêv bop Kaiapas, tombe hil tanasin dangga-so osin himbop-aso lasupin sil lalaam timuu-ju. ⁵⁸Tonde Pita motaamuyin, le ma de yoo naale aheseseey daka, tombe monala be tok la yêêv bop salivangin-ate baan talind, tombe lukala be la hato nando having ahevaavu-so in ji naambe le naambe vaati vu Yesu.

⁵⁹Tombe kul vaha sen datang salivangin-ato silate yêêv-aso osin kaansol-aso pin davu salo omaahonôôn in nambe sil tatuhin vakasin jak Yesu in lanyiiis-ambe jimb. ⁶⁰Tombe hil ngeeyaata lanêël vakasin tatuhin lak yi, le ma de yêêv-aso me-latovu vakasin dangga ti in nambe lanyiiis-ambe jimb e, tonde sim omaaho yuuh lalu-daale ⁶¹^jbe yuuh lanêël nambe, “Hey hangoyin-ande omaahôô-ja nêël nambe, ‘Saalohvu nambe sa kawiiy Anutu-te dumb vaambuung de nohvu busin yaal ond sa daav jesin naah.’” ⁶²Tombe yêêv bop salivangin-ate kandi naale be nêël vu Yesu nambe, “Game nanêël vakasin ti laah e? Omaaho yuuh-anjo danêël vaaheey lak hong?” ⁶³^kLe Yesu yoo naale lava masin lôôt, tombe yêêv bop salivangin-ate nêël vu nambe, “Saanjingin hong jak Anutu metumin haale be onaanêël vu hey e, naambe hong Anutu Noow sen yoo holin hong vulôôt in nambe gandôôvu hey-ato, me malis?” ⁶⁴^lLe Yesu nêël vu nambe, “Yik ganêël-anja. Om sa naanêël vu ham naambe ham e angge Omaahonôôn Noow e mando Niwêêk Danggakook nama vasa, de mando jak bayiimb baandoni be naam.”

⁶⁵^mTombe yêêv bop salivangin-ate hango Yesu-te vakasin-anjo, om kweek yite lolop nambe Anutu le ahekalin vu Yesu, de nêël vu yêêv-aso nambe, “Ham hil, laanggôôl Anutu, om yiiy navu salo

^h 26:55 Luk 19:47; 21:37 ⁱ 26:56 Mat 26:31; Jon 16:32 ^j 26:61 Jon 2:19-21

^k 26:63 Ais 53:7; Mat 27:12 ^l 26:64 Saam 110:1; Dan 7:13; Mat 24:30 ^m 26:65 Sin 14:14; Mat 9:3; Jon 10:33

omaahonôn in nambe le daanêêl vaati gaving? In ham hango nambe nêêl Anutu palêê-jo, ⁶⁶ "om ham akam vu nambe vaati?" Tombe sil lanêêl laah vu nambe, "Nêêl vakasin anipaya om yaanyis-ambe jimb." ⁶⁷ Tombe sil kasuv ak Yesu me, de sil layiis osin sil patap, ⁶⁸ tonde lanêêl pale nambe, "Hong omaaho sen Anutu yoo holin hong vulôôt-anja keen a? Om onaanêêl omaaho ti sen yiis hong-ato langaah vu hey e."

Pita lak alu in Yesu

(Maak 14:66-72; Luk 22:56-62; Jon 18:15-18,25-27)

⁶⁹ Pita naahen nando talind voon, tonde vêêh kul ti hato vu be nêêl nambe, "Hong-anja navu taamuyin Yesu vu Galili having-ato." ⁷⁰ Le ma de Pita lak alu vu hil pin sen dando talind-anjuuto mend nambe, "Sa doosin va sen ganêêl-anja." ⁷¹ Tombe seelin hato laah naale hôôk vinavi voon, tonde vêêh ango yi, tombe nêêl vu hil sen

daalêê-juuto nambe, "Omaahôô-ja having Yesu Nasaale." ⁷² Le Pita lak alu yesin laah nambe, "Sa doosin omaahôô-ju, keen baandoni."

⁷³ Daahen daale daka tonde hil sen daalêê-ju lala vu Pita be lanêêl nambe, "Keen, hil-anjuuto silate ti hong-anja, in hey hango olavam kaangesin." ⁷⁴ Le Pita nêêl Anutu haale osin nêêl nambe, "Sa doosin omaahôô-ju, keen baandoni." Tonde pavis atombe kokalêêh su, ⁷⁵ tombe mem Pita ka vu vakasin sen Yesu nêêl vuu-to nambe, "Kokalêêh-ame naasu le, de gale ganjak alum in sa balon yaal vêêl e." Ka vu vakasin-anju, om hato la voon-ambe ka pasiv-ambe su lôôt.

Lako Yesu la vu Pilata

(Maak 15:1; Luk 23:1-2; Jon 18:28-32)

27 ¹ Samiinaanôn atombe Yuda-te himbop-aso osin kul vaha sen datung salivangin-ato silate yêêv-aso pin lanjôôy vakasin nambe lanyiis Yesu be jimb, ² om sil talu de laandiiy-ambe lala vu yêêv bop Lom ti, haale nambe Pilata.

Yudas vaaku ka

(Sinaale 1:18-19)

³ Tombe omaaho sen taato Yesu langaah-ato Yudas, ond yi de yêêv-aso lango Yesu-te vakasin-ambe lanêêl nambe jimb, tombe lopayo nimeen ak in nambe yoo wing Yesu paya, om hako mone siliva doo-ti be nomaayuuh-anju laah vu yêêv-aso salivangin-ate osin himbop-aso, ⁴ tombe nêêl nambe, "Soo aawiing omaaho sen nipaya me-neep vu yii-

ⁿ 26:66 Lev 24:16; Jon 19:7 ^o 26:67 Ais 50:6; 53:5 ^p 26:75 Mat 26:34

^q 27:3 Mat 26:14-15

juuto paya, be saavu lukala ham namam in nambe ham anyiis-ambe jimb.” Le sil lanêêl nambe, “Hey-ame heyate va le, goo gate va.” ⁵Tombe Yudas haate monêê-ju lukala dumb vaambuung alo, tonde hatu laah voon-ambe la vaaku ka be yimb.

⁶Tombe yêêv-aso salivangin-ate paatuk monêê-ju be lanêêl nambe, “Monêê-jo yiyi vaanggo omaaho ti nihees ak, om me-lohvu nambe yiyi gatung dukana gaving mone salivangin-ate le.” ⁷Om sil lakaas in lung la tonde mem lako monêê-ju be lala laanggo ngaanggis boow ti vu hil sen dawiing kul in davu samu dêêngg-ato, in nambe landaav hil bamaan vu taaku ango danjip hôôk ngaanggis-anju, ⁸ondeey danêêl taakuu-ju haale nambe Ngaanggis Ngaamong Nihees-ate be neep-ambe gêên-anju. ⁹’Ond vaa-ju wiing-ambe Anutu-te vakasin sen Yelemia nêêl bôôy-ato nôn ak nambe, “Lako mone siliva doo-ti be nomaayuuh sen hil Islel laliinggis nambe sil e baanggo yi jak-ato, ¹⁰tombe laanggo ngaanggis boow ti vu omaaho sen navu samu dêêngg-ato, lohvu Omaaho Bop nêêl vu saa-to.”

Pilata lingin Yesu

(Maak 15:2-5; Luk 23:3-5; Jon 18:33-38)

¹¹Tombe Yesu la naale yêêv bop Pilata me, tombe yêêv lingin nambe, “Yuda-te omaaho lulemak hong a?” Tombe Yesu liinggis nambe, “Yik ganêêl-anja.” ¹²“Tonde kul vaha sen datung salivangin-ato silate yêêv-aso osin himbop-aso lanêêl vakasin lak yi, lemu Yesu me-nêêl vakasin ti laah e. ¹³Tombe Pilata nêêl vu Yesu nambe, “Game nango vakasin ngeeyaata sen danêêl lak hong-anja le?” ¹⁴‘Le ma de Yesu me-nêêl vakasin ti laah vu le, om yêêv-anju ka la ngeey.

Pilata liinggis nambe lanyiis Yesu jak haah pako

(Maak 15:6-15; Luk 23:13-25; Jon 18:39–19:16)

¹⁵Lohvu ta pin hôôk hil Yuda-te busin bop busin haluusin sen Anutu haluuh hil Islel hôôk vu Ijip bôôy-ato, ond silate gambum ti neep nambe sil davu kataangg kalaambus-aso ti de Pilata navu kavaayin kalaambus tii-ju be navu la malis vu sil. ¹⁶Tombe hôôk busin-anju ond kalaambus ti haale nambe Balabas nando, ond hil pin lango haale, ¹⁷om sen hil Yuda lasupin sil lala vu Pilataa-to ond lingin sil nambe, “Om ham awiinggin nambe sa kavaayin omaaho ango tana vu ham? Sa kavaayin Balabas me sa kavaayin Yesu sen danêêl nambe Kalisii-to?” ¹⁸“Pilata lingin sil nambêênjo in lak ni nambe sil ahend anipaya vu Yesu, ondeey sil laandiiy la vu yi.

¹⁹Tombe Pilata naahen nando nangoyin vakasin, tonde vane wiing vakasin la hatu vu nambe, “Game namam jak omaaho nivalok-anju le, in

^r 27:9 Sek 11:12-13; Jer 32:6-9 ^s 27:12 Ais 53:7; Mat 26:63 ^t 27:14 Jon 19:9

^u 27:18 Jon 11:47-48; 12:19

saahé mavin ti lak yi gêên, tombe wiing-ambe sa nahangg lak lôôt.” ²⁰ Le ma de kul vaha sen datung salivangin-ato silate yêêv-aso osin himbop-aso laanjiihin hil ngeeyaataa-ju nambe sil daanêêl vu Pilata naambe kavaayin Balabas vu sil, de nyiis Yesu be jimb. ²¹ *Tombe yêêv-anju lingin sil yesin laah nambe, “Om ham awiingin nambe sa kavaayin omaaho yuuh-anju ango tana vu ham?” Tombe lanêêl nambe, “Okavaayin Balabas.” ²² Tombe Pilata nêêl vu sil nambe, “De Yesu sen danêêl nambe Kalisii-to ond saambiing vaati vu?” Le sil pin lanêêl nambe, “Ganyiiis jakana haah pako.” ²³ Tombe lingin sil nambe, “In? Wiing vaati paya deey?” Le ma de sil oo lateey niwêêk lôôt nambe, “Ganyiiis jakana haah pako.”

²⁴ *Tombe Pilata yi nambe sil-ame le gango lava le, ma, ngaaho lak in lambiing ngaamong, om hako bel-ambe lipis nama nambe sen valoochin yi hôôk hil ngeeyaataa-ju mend de nêêl nambe, “Sa kaasêêh omaahôô-ju nihees ond nyevahaan-ame le nanjip vu sa le, ham oote va.” ²⁵ *Tombe hil pin lanêêl laah vu nambe, “Sen nihees kaasêêh-ato ond nyevahaan yoo le nanjip vu hey o noongg-aso.” ²⁶ Tombe Pilata kavaayin Balabas-ambe vu la vu sil, de Yesu ond nêêl-ambe ahevaavu-so laveek lôôt, le mem vu lukala hil Lom ngaamong vaha-so namand in nambe lanyiiis jakana haah pako.

Hil ngaamong vaha-so pale Yesu lôôt

(Maak 15:16-20; Jon 19:2-3)

²⁷ Yêêv bop-ate hil ngaamong vaha-so lako Yesu be lalukala yêêv-ate taaku lopayo, tombe ngaamong vaha-so pin lasupin sil lalaam vu. ²⁸ *Tombe sil lakaah Yesu-te lolop-ande lalop lolop anihees ti lukala yi, be davu taahu omaaho lulemak lak yi. ²⁹ Tonde lasêêy hees aniyin-ambe lambuuhin tombe latung lakala Yesu lu, tonde lavu paatôôn ngasing lukala nama vasa osin latung kaatu vu, de sil pale yi nambe, “Yuda-te omaaho lulemak, omando.” ³⁰ *Tombe sil kasuv ak me, de lalôôh paatôôn ngasing-ambe laveek Yesu lukook ak. ³¹ Sil pale Yesu lung la, le mem sil lakaah lolop anihees-anju vêêl in Yesu, de yoo lalop yite lolop lukalaah yi, tonde mem lako be lala in lanyiiis jakana haah pako.

Layiiis Yesu lakala haah pako

(Maak 15:21-32; Luk 23:26-43; Jon 19:17-27)

³² Lala lak atonde latovu hil Sailini ti haale nambe Simon, tombe hil ngaamong vaha-so lanêêl niwêêk lôôt vu yi om kava Yesu-te haah pako.

° 27:21 Sin 3:14 ° 27:24 Diu 21:6-9; Mat 27:4 ° 27:25 Mat 23:35; Sin 5:28

° 27:28 Luk 23:11 ° 27:30 Ais 50:6

³³Lala lato taaku ti haale nambe Golagaata, dangga nambe taaku lukook, ³⁴^atombe sil kaasêêh malaasin anikalin ti^b lukala wain-ande lavu vu Yesu in nambe naanum, tombe tep, le ma de nimbaya. ³⁵^cTombe hil ngaamong vaha-so layiis Yesu lakala haah pako lung la, tonde sil laate tatuuh-ambe tambe lak Yesu-te lolop-ande latiiy lohvu sil.

³⁶Lung laa tonde mondanggin yi be dandôô-ju,

³⁷tonde sil kaavu vakasin sen lanêêl ak yii-to lakala neep haah pako lu baandoni nambe, “Yesu sen Yuda-te Omaaho Lulemak-anjo.” ³⁸^dTombe layiis hil hôondak yuuhapim daale having Yesu, ango naale nama vasa, de ango naale nama kêênj. ³⁹^eTombe hil sen daale danjung-anjuuto layi be lalaah namand vu, de laanggôôl Yesu ⁴⁰^fnambe, “Wopo, hong sen ganêêl nambe gale kawiiy Anutu-te dumb vaambuung, de nohvu busin yaal gale gandaav naah-ato, om goo gandôôvu hong. Naambe hong Anutu Noow ond goo gavuuha haah pakôô-ja de ganduus-ambe ganaam voon-o.” ⁴¹Tonde yik kul vaha sen datung salivangin-ato silate yêêv-aso osin tanasin dangga-so de himbop-aso lawiing kangasin vu Yesu nambêênju having nambe, ⁴²^g“Hôôvu hil vaalu de me-lohvu nambe yoo dôôvu yi le. Om naambe Islel-ate omaaho lulemak yii-ju ond duus-ambe naam voon, tomem yaambiing gaving yi. ⁴³^hYoo wii-having Anutu be nêêl nambe Anutu

Noow yi, om peey naambe Anutu wiingin ond dôôvu yi.” ⁴⁴Tombe hil hôondak yuuh sen layiis yuuh daale having Yesuu-to ond yuuh lanêêl Yesu pale nambêênju having.

Yesu yimb la

(Maak 15:33-41; Luk 23:44-49; Jon 19:28-30)

⁴⁵ⁱTonde taaku mekaalus laam naale lavuun atombe taaku mekanu hôôk lohvu taaku pin-ambe laam soosin hôôk lohvu taaku me yaal. ⁴⁶^jTombe taaku me yaal-anjo Yesu teey bopaata lôôt nambe, “Eli, Eli, lama sabatani?” Dangga nambe, “Sate Anutu, sate Anutu, nambe vaati om ohavuuha sa la?” ⁴⁷Tombe hil sen daalêê-juuto vaalu langoyin-ambe lanêêl nambe, “Nateey Eliya.” ⁴⁸^kTonde sil ti saloongg pavis-ambe la hako malumak-ambe laanggôôl hôôk bel anikalin, tombe havingin malumak-anju hôôk ngasing vaha de hako be la vu lukala Yesu avi in nambe dasuvin. ⁴⁹Le hil vaalu lanêêl nambe, “Ham baale de yaangge

^a 27:34 Saam 69:21 ^b Matai 27:34 Malaasin anikalin tii-jo haale nambe mul, ond haah ti nikanggi, ond davu vu hil in nambe sil anind naavi me-gasêêng e. Om sil lako be lavu vu Yesu tombe tep le ma de nimbaya, in wiingin nambe yoo gango nivaane be jimb.

^c 27:35 Saam 22:18 ^d 27:38 Ais 53:12 ^e 27:39 Saam 22:7; 109:25 ^f 27:40 Mat 26:61; Jon 2:19 ^g 27:42 Jon 11:50 ^h 27:43 Saam 22:8; Jon 5:18 ⁱ 27:45 Emo 8:9

^j 27:46 Saam 22:1 ^k 27:48 Saam 69:21

naambe Eliya le naam dôôvu yi me le nama.” ⁵⁰Tombe Yesu teey bopaata lôôt yesin laah-ande yimb la.

⁵¹Tombe tôômb bopaata dinaandiin lôôt, yik tôômb-anju yakaluuh Anutu-te dumb vaambuung alopayôô-to, ond kweek la yuuh vu vaavu be la hoow, tonde taaku yêêy osin tatuuh bo-bop hapok. ⁵²Tonde bandumb avi hataahin-ande Anutu-te hil ngeeyaata sen sil layimb lung laa-to ond sil kandi vasa hôôk osin nind naavi doos, ⁵³tombe sil lavuuh bandumb, tonde Yesu kandi lak vêêl e mem lalukala taaku vaambuung Yelusalem atombe hil ngeeyaata layi mend ak sil.

⁵⁴Tombe hil Lom ngaamong vaha-sote yêêv osin yite hil ngaamong vaha-so sen sil mondanggin Yesu-te haah pakôô-to having ond sil langoyin jemaapi yuuh va pin, tombe layêênin lôôt de lanêêl nambe, “Omaahôô-jo Anutu Noow keen.” ⁵⁵Tomde vêêh ngeeyaata daale diin daka be mondayi, ond sil sen sil mondahôôvu Yesu lak busin pin-ato ond sil taamuyin Yesu vu Galili be lalaam. ⁵⁶Tombe sil-anju yaal ond ti Malia vu Magadala, de ango Malia sen Jems ayuuh Yusep taandin-ato, tonde tik Sebedi noow Jems ayuuh Jon taandin.

Lambe Yesu naavi lukala lavandangga

(Maak 15:42-47; Luk 23:50-55; Jon 19:38-42)

⁵⁷Soosin hôôk atombe omaaho kupak dangga ti haale nambe Yusep vu Alimatia valup, ond Yesu-te hil ti yi, ⁵⁸ond la vu Pilata be kataangg Yesu naavi nambe gako be na gambe na, om Pilata nêêl-ambe lavu Yesu naavi vu yi. ⁵⁹Tombe Yusep hako Yesu naavi be vayum hôôk tôômb valôôy moos ti, ⁶⁰tombe yoo la hambe lukala neep hôôk yite lavandangga sen naahen sap hôôk tatuuh danggaa-to. Lung laa tonde tatolin tatuuh bopaata ti laah hilin bandumb avi jeen-ande la, ⁶¹tonde Malia Magadala yuuh Malia ango dando mondayi lavandanggaa-ju nando vaalu.

Ahevaavu-so mondanggin bandumb

⁶²Busin sen hil Yuda samu sil in nambe lanja vanôôn busin haluusin-atêêto lung la, tonde kul vaha sen datung salivangin-ato silate yêêv-aso osin Palisai-so, sil lavuh ti be lala vu Pilata ⁶³be lanêêl nambe, “Yêêv bop-e, mem gêên hey akangg vu vakasin ti sen omaaho tatuhin vahaa-ju naahen nando metumin-ande nêêl nambe, ‘Busin yaal jung na le mem sale kandi jak naah.’ ⁶⁴Om onaanêêl-ambe ahevaavu-so lana ganggin bandumb-anju tatin-ambe busin yaal jung na le, in yite maanggêem-aso le lana langgôôndak ninaavi de daanêêl vu hil naambe kandi lak vu hil yimbin-ate, tombe sil e tatuhin hil lôôt savok sen yoo tatuhin hil lung laa-to.” ⁶⁵Tombe Pilata nêêl vu sil nambe, “Hamate ahevaavu-so dando, om

¹ 27:51 Eks 26:31-33; Hiblu 10:19-20 ^m 27:55 Luk 8:2-3 ⁿ 27:56 Mat 20:20

^o 27:58 Diu 21:22-23 ^p 27:60 Ais 53:9 ^q 27:63 Mat 12:40; 16:21; Jon 2:19-21

ham ana gatung sil mando in sil oo mongganggin bandumb avi nivasa lôôt.” ⁶⁶Tombe sil lala langgi va nikanggi lak tatuuh nanyendanga la vatinin bandumb avi, de latung ahevaavu-so dando mondanggin.

Yesu kandi lak

(Maak 16:1-10; Luk 24:1-10; Jon 20:1-18)

28 ¹Busin sawaasin lung la tonde Sonda samiinaanôn atombe Malia Magadala yuuh Malia ango, yuuh lala in lanji bandumb. ²Tonde pavis atombe jemaapi yêêy ak taaku lôôt-ande Omaaho Bop-ate angela ti vu baandoni be lukalaam, tombe la tatolin tatuuh-anju la vêêl in bandumb avi, de nando lak tatuuh baandoni, ³tombe ninaavi natêêlang nambe demak navêêl-ato, de yite tôômb ayuuh ame valôôy malis nambe bayiimb ahevalôôy. ⁴Tonde ahevaavu-so layi tombe layêênin lôôt-ambe lahees, tombe lalupake be lala deep nambe sen hil yimbinato. ⁵Tombe angela nêêl vu vêêh ayuuh nambe, “Mame anjêênin e. Sa lak ni nambe muuh navu salo Yesu sen layiis ak haah pakôô-to, ⁶le me-neep-anjo le, in kandi lak lung la lohvu yoo nêêl-ato. Manaam angge ahembaan sen neep-ato, ⁷le mem mana naanêêl vu yite maanggêêm-aso pavis naambe kandi lak vu hil yimbin-ate, tombe le naamunggin-ambe na Galili, le mem ham e angge yi vuu-ju. Yik saanêêl vu muuh lung laaja.” ⁸Tombe yuuh lavuuh bandumb pavis-ande yuuh lalaah, tombe yuuh layêênin osin lapêêlis lôôt, de yuuh latup in nambe lana daanêêl banye vu Yesu-te maanggêêm-aso. ⁹Tonde pavis atombe Yesu tovu yuuh vu mop be nêêl vakasin osin melaas vu yuuh, tombe yuuh lala lato latung kaatu be lambe namand ak vaha, de yuuh lako haale lak, ¹⁰tombe Yesu nêêl vu yuuh nambe, “Mame anjêênin e, mana naanêêl vu halingg-aso naambe sil lana Galili tombe sil e lanji sa vuu-ju.”

Ahevaavu-sote vakasin

¹¹Vêêh ayuuh daahen dalaah atonde ahevaavu-so vaalu lalaah taaku bop-ambe lanêêl va pin sen tovu sil vu bandumb-ato vu kul vaha sen datung salivangin-ato silate yêêv-aso. ¹²Tombe yêêv-aso lasupin having himbop-aso be landuuh vakasin lung la le mem lavu mone bop vu ahevaavu-so, ¹³de lanêêl vu sil nambe, “Ham naanêêl vu hil naambe ham nahop busin-ande Yesu-te maanggêêm-aso lulup lahôôndak ninaavi. ¹⁴De naambe yêêv bop gango vakasin-anja ond hey e samu vakasin vu yi de ham-ame le naatovu nimeen e.” ¹⁵Tombe ahevaavu-so lako mone be lala lanêêl vakasin vu hil lohvu sen yêêv-aso lanêêl vu sil-ato, tombe vakasin-anjo la lohvu hil Yuda be neep-ambe gêên.

^r 27:66 Dan 6:17 ^s 28:3 Mat 17:2; Sin 1:10 ^t 28:6 Mat 12:40; 16:21 ^u 28:7 Mat 26:32

^v 28:10 Hiblu 2:11 ^w 28:13 Mat 27:64

Yesu vu kul vu yite maanggêêm-aso
(Maak 16:14-18; Luk 24:36-49; Jon 20:19-23)

¹⁶ ^xYesu-te maanggêêm nomaayuuu-hambe laam tii-to lala Galili, tombe lala lalup kandu ti sen Yesu nêêl taato vu sil nambe lanaa-to, ¹⁷tombe sil layi Yesu om latung kaatu vu be lako haale lak, le vaalu kand yu-yuuu. ¹⁸ ^yTombe Yesu laam ngaaho vu sil-hambe nêêl nambe, “Anutu vu niwêêk pin vu sa in nambe sa ganggin baandoni osin voon, ¹⁹ ^zom ham ana ambiing-hambe hil pin daatu sate hil, tombe ham anjipis sil jak Mangganaan ayuuu Noow-ande Vavi Vaambuung haalend, ²⁰ ^atonde ham tatekin sate tanasin vu sil in nambe sil samu tanasin pin sen saanêêl vu ham-ato. De ham gango le, sale mando gaving ham nohvu busin pin lôôt-hambe baandoni osin voon-ate busin jung na.”

^x **28:16** Mat 26:32; 28:7,10 ^y **28:18** Dan 7:14; Mat 11:27; Jon 13:3; Ep 1:20-22

^z **28:19** Sin 1:8 ^a **28:20** Sin 18:10; Jon 14:23